





62014/3

VOL. 1, PART 3

VOL. 1, PART 4

MEDICAL SOCIETY  
OF LONDON




ACCESSION NUMBER

PRESS MARK

ADVERSARIA...



ADVERSARIA  
MEDICO PRACTICA.



VOLUMINIS I. PARS IV.

---

L I P S I A E

APUD HAEREDES WEIDMANNI ET REICH

MDCCLXX.







# I.

## Tractatio de morbosa lymphae ad colatoria organa conversione.

**S**anguis, in corpus universum distributus, ex se passim secretiones varias humorum absolvit et depuratur, optimamque sui partem in nutrimentum corporis convertit; cum vero in sanis et vegetis animalibus tanta ejus copia sit, quanta omnis fibræ minimis apponi nequeat, in universi corporis cellulas partim gelatinosus et lymphaticus humor, partim in oleum plus minus densum coactus, pinguedo nimirum et medulla, colligitur et in futuros nutritionis usus asservatur. Humor autem lymphaticus et pinguis, post brevem remoram ex his cellulis per singulare genus lymphaticarum venarum resorptus, ad glandulas conglobatas vehitur, ut, in illis ulterius elaboratus, ad cisternam lumbarem et ductum thoracicum ducatur, postea sanguini venoso admixtus et per circulationis et sanguificationis vires cum cruore subactus, in novo ad minima corporis vasa progressu, nutriendae fibrae omnino idoneus fiat. Haec breviter indicata, ul-





terius declarat physiologia, anatome accuratioribus vias monstrante.

Lymphae, sanguini admiscendae, indoles ejusque mutatio in motu progressivo et intestino, per arterias ad minima usque vasa directo, difficulter explicatur. Cum enim in sana et optima humorum crassi sanguis, in arteriae ramos undique distributus, lymphaticam partem intime sibi admixtam habeat, quaestio illa, cur subtilissimas has partes non protinus in varia et amplissima organa colatoria dimittat, ardua profecto est, quam physiologi, licet chemicis tentaminibus adjuti, accurate solvere nequeunt. Ex phaenomenis tamen omnino patet, neque sudorem, neque urinam, nec mucum, in glandulis folliculosis secretum, nec salivam, quamquam nonnulli ex his humoribus particulis gelatinosis referti sunt, veram lymphem comprehendere, bilem nunquam lymphaticam partem admixtam habere, sperma autem virile et lac in mammis et in naturali sua mixtione lymphaticis particulis abundare.

Hypotheses varias, quibus elaborationes humorum in <sup>universum</sup> et figillatim secretionum rationem declarare conantur, fusius nunc recensere et dijudicare a nostro consilio abhorret; ex effectibus  
tantum

tantum concludimus atque ut certum statuimus, moderatum et cuilibet homini aequabile partium solidarum robur, elasticum et vitale, hanc circulationem et successivam elaborationem cruoris ita efficere, ut tandem in singulis organis secretoriis diversi humores secernantur. Quidam ex his protinus e corpore promoventur, alii tum deum, cum in varios usus distributi sunt, ex quibus etiam variae particulae per vasa venosa iterum reforbentur et in circulum humorum universalem redeunt, lymphatica autem et nobilior sanguinis pars, ad minima vasa ducta, in eorum fibris nutritionem efficit et, si superflua est, in cellulis minimis reconditur, interea fluidum subtilissimum, nerveum scilicet, ex optima parte sanguinis, per nobilissimum encephali organum secernitur et vigorem totius corporis in solidis minimis, per fibras medullares eo ductum, efficit.

Nostrium vero est, in hac tractatione ex phaenomenis, in variis morbis obvenientibus, declarare, quare interdum optima et lymphatica sanguinis pars, quae in prospera corporis valetudine ad varia organa secretoria non deferatur, post actiones universales laesas, tandem eo deferatur, quae morbosa lymphae ad colataria organa conversio est.





Quod vero monuimus, in sanis etiam hominibus aliquam partem lymphae nutritiae ad sperma virile et lac in mammis accedere, id porro nunc, et primo quidem loco, ita explicemus, ut, quomodo in morbosis mutationibus evidentius appareat, intelligamus.

Qui sani ceteroquin sunt, sed vel veneris abusu vel illicitis artibus sperma nimium profundunt, languidi et tabidi redduntur. Hoc in adolescentibus, qui ad plenarium corporis incrementum nondum pervenerunt, luculentius apparet; hi enim saepe adeo languent, ut, fracto abinde corporis vigore, trigesimo saepe aetatis anno vel citius marasmo quodam afficiantur. Et si vero iis, qui ad vicesimum annum accesserunt et, ossibus ubique confirmatis, in longitudinem non amplius excrescunt, hoc spermatis dispendium non tam exitiosum est, in nimia tamen huius humoris profusione defectum virium, nutritione acquirendarum, ratione vigoris elastici atque vitalis sentiunt et tabe sic dicta dorsali afficiuntur. Mittimus nunc argumentum, ab iis petatum, quibus testiculi praescissi sunt, qui, inprimis si large nutriuntur, pinguedine ultra modum collecta, ad summam saepe obesitatem disponuntur, idque propterea, quod saepenumero nu-  
tritio-

tritionem fluidorum tantum acquirunt, vigore solidarum partium ut plurimum prorsus deficiente. Cum itaque spermatis masculini indoles abunde demonstret, moderatam lymphae copiam eidem accedere; quae tunc universae nutritioni et vigori corporis nihil detrahit, in nimia tamen hujus humoris profusione, lymphæ, ad nutritionem veram requisita, justo copiosius eo defertur et corpori vigor elasticus, a lymphæ, ut glutine fibrarum, pendens et vitalis a fluido nerveo, in secretionem suam et vi quoque turbato, detrahitur.

Hujus rei phaenomena in gonorrhæa benigna quoque patent. Quoniam vero in hoc morbo non semper spermatis ipsius, sed saepe tantum liquoris prostatici profluvium observatur, id quod summam, ut constat, hujus glandulae laxitatem indicat, quaestio omnino movenda est, annon et huic liquori plus lymphatici succi accedat, quam reliquis mucosis glandulis, et simplicibus, et compositis in cavitate urethrae deprehensis. Consistentia quidem liquoris glandulae prostaticae in sanis, a mucis glandularum folliculosarum maxime diversa, id evincit; quod si vero et hoc probari non posset, dubium tamen non est, a nimio hujus humoris, cum vel sine





spermate, effluxu, lymphae quoque nutrientis dispendium fieri.

Quae cum ita sint, etiam ad feminas, nimio veneris usu debilitatas, provocare possumus. Etsi igitur in his verus humor spermaticus, cum virili comparandus, non effluit, ex orificio tamen et cervice uteri blandus quidam et lymphatico humori similis mucus accedit, cujus dispendium non solum in crebriori coitu, sed etiam in gonorrhæa muliebri seu fluore albo, qui, quod acrimonia et contagio caret, benignus dicitur, observatur. Monendum enim omnino est, benignam sic dictam gonorrhæam in viris et feminis talem vere non esse, sed viribus insidiosam, corpori exitiosam et certe malignam dici et posse et debere, quoniam summam saepe corporis debilitatem affert.


Haec tractatio attentionem nostram ad optimos humores, in glandulas folliculosas, ut organum muci secretorium universum, dirigeret, nisi instituto nostro magis accommodatum videretur, secretionem lactis in mammis antea sub examen revocare. In feminis nimirum aliqua pars lymphae ad mammas derivatur; mater enim, quae hucusque foetum ex lymphaticis suis humoribus, scilicet ex  
optimo



optimo sanguine, his particulis scatente, nutrit, nunc post puerperium simile nutrimentum ex mammis infanti nato tradit. Quamquam enim chyli singulares dotes in lacte se offerunt, non citius tamen chylus in lac convertitur, quam tum, cum lymphæ, in corpore reflua, ei jam admixta est; sic enim ille ad sanguinem et ex hoc celeri secretionem ad mammas progreditur, et in iis lac, ut primum infantis recens nati nutrimentum, elaboratur. Quoniam vero hæc naturæ via est, feminae vegetae et robustae, durante lactatione, nullum virium defectum sentiunt, imbecilles autem, quæ tempore graviditatis humores magis in foetum, quam in se ipsas convertunt, ideoque non raro languores sentiunt, paullo post in lactatione tantam lymphæ copiam ad mammas ducunt, ut, ea in minimis corporis vasibus deficiente, marcescant et, nisi a lactatione omnino removeantur, tabidae fiant.

Possem hic nonnulla de abscessibus lacteis puerperarum, sive de conversione lactis et lymphæ per metastasin ad varia strata contextus cellulosi commemorare: sed cum ardua hæc doctrina paucis absolvi nequeat, nosque ideo a consilio tractationis hujus nimium avocaret, eam mittendam ducimus. Postquam vero exempla conversionis lymphæ ad






colatoria organa, per experientiam quotidianam satis confirmata proposuimus, alia et, quae rarius eveniunt, consideremus. Inter multos enim aegros, qui tabe et phthisi laborant et morbo lento misere conficiuntur, languoris et mortis causas, hac in re positas, perspicimus. Consideremus autem primum muci colatoria in glandulis folliculosis, deinde diarrhoeas colliquativas dijudicemus, quo porro ad salivationem nimiam declarandam progrediamur, tum urinam diabeticam et denique sudorem colliquativum examinare queamus.

In cavitatibus faucium et pulmonum, in quibus aeris accessus perspirabilis humoris facilem dissipationem et viarum nimiam siccitatem efficeret, glandulae folliculosae collocatae sunt, in quarum cavis mucus tenuis exsudat et collectus non nihil inspissatur, quo illiniendis his partibus inserviat. Viscidus & nimis spissus redditus mucus secreatu et tussi eliminandus est, saepe vero insignis copia viscidum humoris ex pulmonibus excernitur, qui interdum pituitam tenuem pellucidam, nonnunquam purulentam materiem refert, ex cujus rejectione imprudentes saepe observatores ad ulcera pulmonum concludunt. Quod si tamen ad omnia phaenomena recte attendimus, non ulcere laesi, sed tantum

tantum relaxati pulmones sunt, qui ex interna potissimum tracheae et bronchiorum tunica uberio-rem et, lymphae accessione gelatinosam magis faciliam muci copiam excernunt. Haec lymphae conversio in pulmones non tantum in iis, qui phthisi pulmonali laborant, ad pus, ibi in ulceribus collectum, copiosius accedit, sed etiam tum, cum tussis catarrhales diutius protrahuntur, cum continua pulmonum agitatio, humores in universum et praecipue relaxantem mucum allicit, uberio-rem quoque lymphae accessionem inducit, qua non solum corpora debilitantur, sed ex hac quoque causa decubitus ad pulmones peiores redduntur.

Et si vero in adultis et vegetis saepe hominibus tussis catarrhales, diutius durantes, hanc ob causam exitiosae sunt, id tamen rarius in his, quam in senibus accidit, quippe qui in primis ad has tussis marasmodos proclives sunt. Infantes autem saepissime hac tussi ad maciem disponuntur, quae, cum tussi stomachicae ferme similis sit, hujus causa cum causa alterius nonnunquam confunditur. Praeter causas vero, in nutritione et reliqua infantum diaeta accuratius distinguendas, haec nostra non tam specifica est, quam languida phthisicorum similis, caret etiam nostra, edendi cupiditate, quae in stomachica  
fre-





frequentius observatur. Haec infantum tussis similis certe indolis est atque tussis marasmodi senum; ut enim in diversa aetate accidat, tamen, cum vires a defectu verae nutritionis jam languentes vehementer frangat et ad lentam mortem disponat, cum illa certe comparari potest et debet.

Liceat paucis tangere novum morbum infantum, quem Cl. HOME \*) suffocationem stridulam & anglico, in vulgus recepto nomine, *Croup* appellat. Refert enim ille, in aspera arteria densam tunicam nasci, quae subito indurescit et inflammatorio morbo similis videtur, quamvis nulla ferme in pulmonibus labes reperiatur; quoniam vero infantes ad suffocationem disponit, eosque raucedine singulari seu voce stridula afficit, suffocationem stridulam vocat. Est autem profecto, nisi nos omnia fallunt, tussis catarrhalis, in qua lympham nimio impetu ad pulmones fertur, quae coagulata in tunicam seu crustam densatur et, liberam respirationem impediens, infantes sine inflammatione suffocat.

Et ex naribus, ut amplissimo colatorio muci, in tunica pituitaria distributo, saepe non solum excremen-

\*) An inquiry into the nature, cause and cure of the Croup. by FRANCIS HOME M. D. Edinburgh 1765. 8. maj.



crementitius mucus excernitur, sed ei quoque lymphaticus humor accedit. Quamquam vero in his viis non tam copiosius materiae lymphaticae accessus, quam in bronchiis observatur, tamen si post gravedinem mucus copiosior excernitur, is in principio tenax et lentus, paulo post tenuis et lymphaticus profluit, in primis si excretio longius producit, summus aegris languor creatur, qui, non nisi robore universali restituto et tunica pituitaria liberi aeris accessu confirmata, corrigitur. Senibus quidem crebra destillatio ex naribus ut plurimum molesta est, quae, etsi ex acrimonia humorum in iis pendere videtur, non solum erosiones narium affert, sed etiam ob aliquem boni humoris accessum debilitatem senii auget.


In universo tubo alimentari, a faucibus ad anum usque extenso, copiosae glandulae folliculosae, mucum secernentes, positae sunt, quae non raro nobilem lympham admittunt. In imbecillis quidem hominibus, qui victu molli nutriuntur et vitae sedentariae indulgent, haud raro appetitus ciborum adeo dejicitur, ut contabescant, simul tamen magna saepenumero muci tenuis copia exspuitur. Haec quidem potissimum ex faucibus et viis salivalibus profluere videtur, sed cum leves vomendi conatus  
acce-





accedunt, ipsi aegri, eam ex ventriculo surgere, sentiunt. Tussis sic dicta stomachica non in infantibus solum, sed in adultis quoque his molestiis stipata, reperitur, attamen et in aliis aegris saepe sine tussendi conatu, sine vomitu vehementi, cibum assumptum exprimente, haec sputatio lymphatica observatur, in qua turgens quasi materia ex oesophago surgit et rejectionem ferme continuam urget. Est certe materia, in vasculis sputatoriis collecta, pituitae similis, alba, pellucida, ponderosa, et, nisi ejus profluvium coercetur, aegros, tabe confectos, tollit. Vidimus saepenumero medicos parum cautos, vomitoriis datis, salutem huic malo quaesivisse, mortem tamen iis accelerasse. Neque tamen alia et facilis huic morbo medela affertur, cognovimus enim istum, ubi quodammodo adoleverit, vel optimis propinatis medicamentis, compesci haud posse.

Simili ratione compertum est, diarrhoeas saepe nobilissimam corporis lympham subducere. In crebrioribus causis, quae a perversa infantum et adultorum nutritione excitantur et morbos generant, repetitis purgantibus opus est, sed caveat medicus, ne nimio et saepe leniorum salinorum et lubricantium usu, quae imbecillis convenire videntur,



tur, alvum moveat, propterea quod diarrhoeae continuae inducuntur, quibus durantibus, aegri languent. Saepius vero hoc malum tum imminet, cum alvus varia est, mox sicca, mox fluida. In adultis tunc clanculum obrepit lenteriae species et cibi semidigesti cum muco excernuntur; in infantibus autem coeliaca passio, sub fallaci specie lactis, a nutricibus copiosius dati, accedit, quam multi sine noxa ferri posse credunt et dejectiones lacteas, *Milchstühle*, appellant. In his certe omnibus nisi primarum viarum robur cito instauretur, et clandestinae vasorum lacteorum obstructiones referantur, languor et atrophia ingruit, nullis remediis compescenda.

Et in adultis, si cum tabido statu frequens mucus per diarrhoeas excernitur, attendat medicus, sitne mucus ille tenuis, subalbidus, pellucidus, an alius generis, is enim lymphatici quid habet, cujus excretio nullo modo promovenda est. Non minus diligenter oportet attendi ad eos, qui haemorrhoidibus, quas vocant mucosas, laborant. Noveram virum, duriori vitae generi assuetum, qui, cum haemorrhoidibus mucosis, largius fluentibus, laboraret, hoc fluxu maxime vexabatur, si equo fuerat vectus, quod tamen propter vitae genus, quo utebatur,





batur, necessarium erat. Hic sub continuo purgantium et saepe drasticonum usu adeo contabuerat, ut non nisi longa et taediosa curatione, per victum idoneum et exquisita roborantia medicamenta restitueretur. Ex hujus et alius, ex hoc fere genere aegri inuco secedente, posteaquam examinaveram, cognovi, lymphaticas particulas ei fuisse admixtas; praeter alia enim signa, passim a me indicata, odor non ita putridus, sed subdulcis et nauseosus erat, et acida et ignis coagula, albumini ovorum similia, prodebant. Hae diarrhoeae, quae in acutis morbis, ut colliquativae, considerantur, in chronicis morbis saepe negliguntur, prae reliquis tamen ventris fluxibus debilitatem insignem afferunt.

Sed et lymphæ, in salivam conversa, minime negligenda est. Si lues venerea omnes humores corporis, et lymphaticos praecipue, inquinavit, mercurii, ut potentissimi resolventis medicamenti, vario usu humores ita resolvuntur, ut semper ferme salivatione mercuriali subducantur. Saliva, quae tum temporis exspuitur, vere lymphatica, alba, pellucida et ponderosa est, ejusque affluxu aegri maxime enervantur. Etsi vero salivam, pondere notabili insignem, nonnulli medicorum mercurio admixto tribuunt, tamen vere lymphatico et nobili humori

humori illud pondus adscribi debere, examen accuratius docet; observavimus enim, urinam eorum, qui salivationem mercurialem subeunt, saepe etiam ponderosam esse, lymphamque ipsam sub mucosi sedimenti specie secedere. Accedunt tunc saepe diarrhoeae colliquativae, non a sola saliva acri deglutita, sed ex indole humorum per diarrhoeas simul subducendorum. Cum itaque in gravi hoc morbo miasma malignum et contagiosum dissipari non possit, nisi pinguedine et lymphâ penitus resoluta, conversio ejus in varia colatoria organa, ex ipsa medentium indicatione sequitur: Sed caute omnino hac in re versandum est, ne ex una parte incompleta resolutio viscerum et inde pendens dissipatio venerei contagii, ex altera vero nimia corporum destructio existat. Dolendum sane est, quod gravissimae hae curationes ab iis suscipiantur, qui, vel verae medicinae ignari sunt, vel si et ipsi medici appellantur, phaenomena elaborationis lymphae, secretionis et nutritionis nunquam ad genuinam doctrinam physiologicam exigunt, quod tamen in his curationibus summe necessarium est. Quod si denique examinemus novas, sed saepe mancas et imperfectas lues venereae curandi rationes, quae miasma movent, minime vero pro-

P p

movent;





inovent; nonne post eas absolutas aegri semper languent? nonne vestigia pristini morbi et ipsi nihilominus sentiunt et liberis, ex se genitis, eadem impressa vident? Non lubet, hoc loco damna, in rempublicam exinde redundantia, prosequi, sunt vero tanta, ut severam medicorum provincialium attentionem poscant.

Adjiciamus his pauca de herbae nicotianae et medicamentorum masticatoriorum usu. Qui in hauriendo herbae nicotianae fumo modum excedunt et salivam copiose exspuunt, sanitati non consulunt; quanquam enim lymphatici humores largo flumine non secedunt, aliquid tamen gelatinosi salivae semper admixtum est, ex qua re non subita quidem, at lenta noxa oritur. Ex consilio quidem medicorum masticatoria medicamenta v. c. radix pyrethri vel pimpinellae, nec non caryophylli et alia aromata in doloribus dentium aliisque congestionibus serosis ad fauces adhibentur et feri affluxus cum saliva augetur, his tamen remediis non nimis utendum est, ne tenuiorum et forte lymphaticorum humorum evacuatio nimium promoveatur.

Ad urinae secretionem quod attinet, illa quidem prima est, quae superfluos humores ex corpore subducit et imprimis aquosum potum, copiosius haustum,

haustum, protinus ex corpore derivat. Etsi igitur ut humor mere excrementitius considerandus est, tamen largior ejus excretio attentionem nostram exigit.

Hic quidem monendi sunt copiosae aquae potatores, qui sibi, et interdum a medicis seducti, persuadent, omnem sanguinis acrimoniam aqua pura corrigi et sine omni damno posse per renes subduci. Quemadmodum vero haud consultum est, sanguinis massam nimia aquae copia onerare, quae eidem vere non immiscetur, sed cum rubicundis sanguinis globulis fluit, sic et porro cum largiter per tubulos urinarios effluat, has vias ita relaxat, ut secretiones non salutares, sed colliquativas efficiat, idque propterea, quod non mere serosae, sed subtilissimae lymphaticae particulae, corpori utiles, subducuntur.

Profluvium hoc, quod per depravatam consuetudinem saepe fit, in morbis acutis longe evidentius, quam in ceteris, ut noxium cognoscitur. Accidit enim saepius, ut in iis, qui gravi morbo acuto debilitantur, imprimis si larga crisis per urinam praecesserit, peculiaris quaedam infirmitas in renibus relicta maneat. Tum igitur, cum in statu convalescentiae nutrimentum largius suscipitur, idque vel





ob copiam, vel ob corporis imbecillitatem, non satis subigitur, optima ejus pars in renes convertitur, urina haud raro lymphatica, fero lactis quodammodo similis, excernitur et longae imbecillitatis causa est. Ad hanc rem medici diligenter attendant, ut, roborantibus medicamentis caute datis, et sicco potius, quam nimium jurulento nutrimento, noxam inde metuendam avertant. Etsi enim experientia abunde docet, post gravissimos morbos acutos superatos, chronicos ex variis causis, quas hic fusius commemorare nolo, succedere, inter eas tamen, largum hoc et diabeticum profluvium urinae, clandestinum saepe et maxime exitiosum damnum, in imbecillis corporibus non solum habet, sed robustos etiam haud raro ad tabem disponit. Negari quidem non potest, veram diabetem, quae in chronico morbo lymphaticam urinam excernit, inter rariores morbos referri debere, ille tamen, quem nunc commemoravimus, morbi gradus, in chronicis et acutis frequentissimum symptoma est et viscida nubecula, in urina subsidens, non semper excrementitius mucus, sed saepe lymphae est, cujus excretio si permaneat, facit, ut vires colliquescant.

Quem-

Quemadmodum urina crassas, tartareas et viscidas, sic aucta perspiratio et sudor subtilifatas magis et volatiles humorum particulas subducit. Quamquam vero nostra aetate prophylacticae sudationes, quae olim tam frequenter in usu erant et balnea calida, quae eas fovent, a medicis exercitatis maxime repudiantur, tamen, cum a nonnullis adhuc commendentur, pauca de iis proferre, instituto nostro consentaneum judico. Languores febriles, ex causa catarrhali saepius inductos, sudor largus et spontaneus nonnunquam corrigit. Quidam igitur, qui similia incommoda sentiunt, hanc excretionem solam necessariam esse judicant, neque examinant: utrum languores illi, ex labe primarum viarum, an ex cacochymia sanguinis & humorum oriantur? sed sudorifico medicamento mitissimo v. c. roob sambuci et aliis saepe calidis aromaticis volatilibus et interdum theriacis vel aliis electuariis opiatis sudorem sibi movent, quae quidem medendi ratio interdum in robustis et succiplenis cum levamine, aliquando et in imbecillis cum praesente auxilio, in his tamen non raro cum insigni virium dejectione applicatur.

Neque vero tantum ad prophylacticas has sudationes respiciendum est, sed et ad sudores noctur-






nos, qui in multis obesis et in nonnullis macilentis ex consuetudine foveantur. Isti enim etsi utiles videntur, semper tamen, si diutius durent, exitiosi sunt. Stragula calidiora, plumis infarcta, vestimenta ex pellibus animalium, quibus se plures onerant, hujus rei saepe primae causae sunt, praecipue si molli vitae assueti, in conclavibus calefactis dormiunt. Crebriores autem sunt hi sudores colliquativi in infantibus nostris, in quibus saepius ex acri victu, potu calido et universo regimine calorifico moventur. Atrophici inde fiunt infantes, quanquam nonnulli medici hos sudores non causam, sed symptomata tantum atrophiae infantum dicant. Vere enim regimen nimis calidum infantibus nostris nocere, ex eo patet, quod adultos etiamsi adsuetos, subinde ad cacochymiam et scorbuticas purpuras disponit.

Etsi vero subtilisata cacochymia in febribus acutis saepe largo et foetido sudore dissipatur et amplissimum cutis colatorium copiosas et salutares acrium particularum dissipationes admittit, earum tamen ratio bene exploranda est, utrum ex vi vitae, an ex vi morbi pendeant? Quemadmodum enim de symptomaticis sudoribus supprimendis sedulo cogitandum est, ita de criticis salutaribus non semper

valida



valida medicamentorum vi, sed melius regimine promovendis et moderandis solliciti sumus, ne colliquativi et viribus vitae insidiosi evadant. Sudoris sic dicti anglici descriptio in morbo acuto, vel sudores perpetui viscidi in tabidis et feбри lenta affectis, lympham ipsam subtilem sub sudoris hujus specie incutim converti, clare demonstrant. Quod si igitur cutis jam prorsus relaxata et ostia perspirationis nimis aperta sunt, nulla medela afferri potest, initiis igitur horum morborum omnino resistendum est. Perspiratio blanda naturae vegetae indicium est, sudor semper exitiosus, quanquam noxa, corpori inde illata, in aliis citius, in aliis serius cognoscitur.

Ex iis, quae hucusque a nobis proposita sunt, satis apparet, quomodo lymphatica et nutriens corporis materia in varia colatoria convertatur, ideoque in detrimentum corporis excernatur. Neque tamen modo ad ea, quae in praxi clinica obveniunt, exempla, sed etiam ad alia, in chirurgicis annotanda, respicere oportet. Suppuratio est resolutio partium destructarum in tumore inflammatorio, blando lymphae affluxu temperata, qui si moderatus est, sine insigni corporis detrimento abscessus et vulnera pura reddit et ad consolidationem disponit; contra ea largior suppuratio in abscessibus





et vulneribus magnis saepe exitiosa est, ita, ut vel ex natura vulneris pendens, vel nimio digestivorum emollientium usu excitata, corpora infirma tabidaque reddat et consolidationem vulnerum retardet et impediat. Ulcera quoque diuturna, ex abscessibus et vulneribus, non recte tractatis, oriunda, quin etiam in infantibus, adultis et senibus ex dyscrasia humorum, sine vulnere sponte nata, omnem vim sanguinis, in lymphatico humore positam, ex impuris etiam ulceribus simul cum sanie derivant, ex qua causa febres lentae inducuntur. Si enim hanc rem accurate perpendimus, sanies ipsa est lympa saepe attenuata et acris facta.

Quoniam vero perspeximus, doctrinam hanc, ample satis a nobis consideratam, in variis morbis sub varia specie apparere, atque medicos in ea declaranda variis nominibus uti, his examinandis paullulum immorabimur. Sunt autem nomina, quae inter se comparari et in universum examinari debent, haec: glutinosum spontaneum, pituita vitrea, diabetes, excretiones colliquativae.

Ex victu viscido vegetabili et animali, per languida viscera non satis subacto, in primis viis non solum viscidus mucus ceu pituita iners et tenax colligitur, sed ille per vias lacteas subinde in sanguinem

nem ducitur, ideoque etiam in reliquos corporis humores derivatur et glutinosum adscititium, hoc est, per diaetae vitia acquisitum, commode dici potest. Ab hoc itaque omnino differt glutinosum spontaneum, quod humores tenues lymphaticos, in corpore ex optimo sanguine elaborandos, vere coagulatos et immobiles exhibet et, vegetis minimarum partium solidarum motibus deficientibus, coagula haec spontanea lymphae non amplius gelatinosae, sed glutinosae efficit, vel admittit. Itaque plures medici dum causas occasionales et praedisponentes examinant, adscititium a spontaneo non satis distinxisse, mihi visi sunt. Ill. van SWIETEN in commentario ad §. 69. Aphorismorum BOERHAAVII Tom. I. p. 92. in glutinoso spontaneo ad adscititii causas, effectus, cet. respicit et de pituita senum, in nares et pectus conversa, quaedam admonet, quae ad nostram tractationem pertinere videntur, sed vera ratio inde non peti potest, quam tribus verbis in Pathologia nostra edit. 1767. §. 162. inter causas praedisponentes indicavimus.

Equidem non negaverim, viscidum adscititium, ex eo, quod solida relaxat, generando glutinoso spontaneo ansam praebere, sed est tamen alia particularum indoles, in viscido non subacta, et in





lymphā, in viscidum seu glutinosum subinde mutata. Quemadmodum enim in inflammationibus valida humorum circulatio, calorem excitans, sanguinem ad coagula lymphae disponit: sic lenta et chronica dispositio humores circulantes male miscet, ut lymphā non solum coagulata, sed etiam motu peccans, non in robur elasticum corporis per nutritionem, sed in colatoria convertatur, ibique interdum sub tenui, interdum tamen sub viscida et glutinosa indole se offerat.

Phlegma, mucus et pituita a veteribus interdum distinguuntur, sed distinctionis rationes incertae sunt. Pituitam vitream a tenaci et inertī pituita, seu muco abundanti, distingui, dubium non est; vitrea enim pituita, quae cum summa, omni pituitae communi, tenacitate pelluciditatem vitream conjunctam habet et alba, tenuis, gelatinosa apparet, omnino diversa est. Etsi enim ortum ex lymphatica sanguinis parte non declarare solent, tamen in morbis quibusdam, cum virium defectu conjunctis, vitream quasi pituitam secerni, cognoverunt.

Nequaquam vero semper viscida materia cogitur, sed in quibusdam secretionibus humores optimi, in usus nutritionis impendendi, ex corpore effluunt; a διαβαίω itaque diabetem, ut profluvium



vium nimium, indicarunt et ad secretionem urinae largiorem attenti, non tantum in copioso, sed in lymphatico potius profluvio verae diabetis ideam posuerunt.

Cum tandem sub hoc vel alio nutrientium humorum egressu vires corporis imminuantur et infringantur et hoc in universum colliquescat, in sudore nimio et diarrhoeis colliquativis has secretionem ponendas, putaverunt.

Has et reliquas ideas, a nobis expositas, ad lymphae, optime in corpore elaboratae et ad nutriendas corporis fibras derivandae, vel si aliter loqui velis, ad gluten fibrarum naturale impendendae derivationem ad colatoria sive excretoria corporis organa referri et posse et debere, hac tractatione evincere sumus conati.

Ut autem ea, quae hactenus proposita sunt, ad causas universales revocentur, ex quibus tandem ad particulares in speciali examine progrediendum est, aliae ad diætam in universum spectant, aliae ex therapeutice indicationibus, male applicatis, cognoscuntur.

In universum hic ad vitam molliorem et infirmitatem naturalem multorum hominum respicimus, qua corpus, ceteroquin sanum, ad nimias atque pro-





profusas evacuationes pronius reddunt, quas postea in morbis, ex variis causis evenientibus, in secretionibus quibusdam profusis et debilitantibus experiuntur, et tandem optimam quoque lympham ad haec colatoria convertunt, prout vel aetatis vel vitae generis ratio laxitates partiales relinquit. Non est hujus instituti, diaetae errores omnes, ut causas occasionales, recensere, quae in vita molli et lauta animadvertuntur. Nam victus jurulentus, neglectus diaetae vegetabilis, potus magis calidus, quam frigidus, somnus largior in molli lectulo, fuga omnium exercitationum corporis, nimia animi contentio ac industria et plures aliae causae deberent commemorari, quibus abundantia humoris boni colligitur, qui, quoniam non recte subigitur et in corporis nutrimentum convertitur, sed potius per varia colatoria subito excernitur, languores universales relinquit.

Videbis igitur hos homines ad varios fluxus ventris, maxime debilitantes, ad sudores profusos aliasque excretiones proclives, qui nunquam nisi universa diaeta mutata, ad illud robur pertingunt, quo incrementum et conservatio corporis efficitur. Ad haec omnia eo diligentius attendendum est, quando in tenera aetate, vel in adolescentia, vel  
tum,



tum, cum vires, post incrementum corporis in longitudinem absolutum, confirmandae sunt, verus et optimus nutritius succus per vias laterales derivatur.

Verum non tantum volo attendi ad causas occasionales lymphae in infirmis hominibus, ceteroquin sanis, ad colatoria conversaë, sed ad eas quoque, quae a variorum morborum perversa curatione proficiuntur. In his autem attendatur primum abusus medicamentorum resolventium, quae non solum in vero viscido largius adhibentur et ideo nocent, sed etiam in lymphâ, sub specie muci considerata, damnum inferunt. Plures certe in omni excretionē pituitosa, nondum recte dijudicata, non gummi saponacea et amara tantum, quae forte non ita nocent, quia aliquam interdum nervinam vel roborandi vim conjunctam habent, sed salina et mercurialia medicamenta largius adhibent, ex qua re non solum solidorum laxitas et debilitas, sed fluidorum nimia resolutio et cacochymia serosa efficitur et porro fovetur. Hanc noxam vel unicum tabidorum hominum exemplum evidenter indicat, quot enim sunt medici, qui in causas tam diversae tabis non satis diligenter inquirent, sed quoniam tussis symptomatrica phthisin pulmonalem ulcerosam  
menti-





mentitur, aegris magnam bechicorum, emollientium et resolventium copiam offerunt, quibus lymphæ, parcissime in his elaborata, omnis ferme ad pulmones convertitur. Consideremus multos asthmaticos obesos, qui hucusque victu viscido et tenaci abusi sunt, hi in decremento corporis jurulento saepe victu ad nutritionem sustinendam replentur, quo tamen, cum in laxitate corporis non subigi possit, pituita viscida magis resolvitur, nunquam vero gelatina nutriens elaboratur. Forte et tunc moderata purgantia et roborantia non inutilia forent, ad viscerum abdominalium infarctum arcendum et veram digestionem restituendam, sed abusus resolventium bechicorum omnem lympham resolvit et in pulmones convertit.

Non permittit hæc tractatio, arctioribus limitibus circumscribenda, ut aliis exemplis hanc rem illustrem, neque necessarium judico, cum ea, quæ huc faciunt, phaenomena jam superius declarata sint, quibus omnibus ad dispositiones universales corporis attenti medici instruuntur, quomodo in variis hominibus et imprimis aegris, nimias has lymphæ evacuationes attendere et a pituita excrementitia distinguere debeant. Quod si vero et summaria quaedam de therapia proposita aliquis cupiat, huic

huic loco antea de prognosi nonnulla adspargamus.

Morbis, a lymphæ conversione ad colatoria organa obortis, in principio aptis roborantibus occurrendum esse nemo est, quin perspiciat, haec autem ex fonte diaetetico pariter, atque ex pharmaceutico petantur. Etenim si, his neglectis, adleverit morbus, is nunquam curatur. Solida enim non nisi per lympham bonam nutriuntur, nec aliter, nisi robore elastico, in universo corpore restituto, lymphæ recte elaboratur. Quod si itaque hic circulus elaborationis et nutritionis turbatur, sanitas et vigor corporis nunquam recte restituitur.

Et si ob magnam morborum, in quibus haec lymphæ conversio in colatoria observatur, varietatem, de curandi methodo in universum quidem nihil dici potest, juvat tamen quaedam particularia monita subicere. Sunt autem haec:

Ante omnia aeger eo dirigendus est, ut exercitationem corporis in aere libero et puro suscipiat. Sint vero exercitationum corporis varii gradus, ita quidem, ut a minoribus ad majores sensim progrediaris, neque enim in minoribus subsistendum, neque ad vehementiores cito pergendum. Aer esto  
tem-





temperatus matutinus, magis frigidus, quam calidus, magis humidus, quam siccus, nunquam tamen nebulosus, sed ventis nonnunquam agitatus et roridis plantarum perspirantium particulis repletus, in his enim peculiaris est reficiendi vis, nervina quasi. Imitatio horum auxiliorum in conclavibus, nimis coacta, vix sufficit. Imbecilles post balnea mediocriter frigida initium exercitationis a frictionis vi faciant, cui subinde alia motus genera interponenda sunt. Quemadmodum vero hunc motum maxime urgemus, sic reliqua quoque auxilia in victu et potu, laxitati et debilitati opponenda, non oportere negligi, apparet.

Excretiones, quae arte moventur, iis contrariae sint, quas materia, in morbo excernenda, sibi elegit. Hae tamen caute excitandae sunt et tum potissimum, cum vires aegri nondum penitus fractae sunt. Sic forte lene vomitorium coercet diarrhoeam colliquativam, ut in aliis dysenteriam, et urinae nimium profluvium sudor coercet. Verum istae evacuationes regimine magis efficiantur et lenioribus tantum stimulantibus.

Roborantia non nisi post nutrientia debent propinari, atque in his roborantia diaetetica praeferenda censeo medicamentosis. Horum autem delectus  
caute



caute debet haberi. Praecipua ad hanc indicationem facientia medicamenta, martialia nempe et cortex peruvianus, peculiarem distinctionem admittunt, ut in mixtione, sic in effectibus; hi tamen non nisi ex tentaminibus patent. Ita aliis alia v. c. vitriolum martis, alumen, fantalum rubrum, rubia tinctorum, guinini laccae, immo tormentillae et bistortae radix conveniunt, dummodo apta dosi et praeparatione aegri viribus accommodentur; haec omnia enim non solum cujusque aetati, sed et temperamento conveniunt, imprimis cum vigor juvenilis, qui vel in senectute interdum superesse solet, omnem curationem adjuvet.







## II.

Commentatio de natura variolarum earundemque noxis propter insitionem metuendis. \*)

Legi in parte prima voluminis primi Adversariorum medico practicorum Responsum Inclytae Facultatis medicae Lipsiensis super insitionem variolarum, legi quoque in parte secunda ejusdem voluminis animadversiones in libellum Ill. DE HAHN, quo de ratione variolarum exponit, legi denique responsa quaedam Ill. DE HAHN ad D. LUDWIGII animadversiones de natura variolarum, contra novum eorum systema directas; sic autem perlegenti mihi denuo in mentem venerunt dubia super insitionem variolarum, quae olim, Lipsiae degens, cum auditoribus meis communicavi. Omnes fere, non solum medici, sed et alii eruditi et nobiles viri, et vel vulgus adeo insitionem variolarum claimant; pauci certe abhorrent et pauciores medici,

\*) Communicata nobiscum est a Medico, in facienda medicina et chemia exercitatissimo, qui, licet a nobis in admittenda variolarum insitione dissentiat, dissensus tamen rationes ita exposuit, ut easdem judicio Lectorum nostrorum subjicere, haud dubitemus.



medici, immo paucissimi torrenti se opponunt. Complures libellos ad probandam insitionem variolarum et commendandam confectos legi, inque nonnullis graves sane rationes, quae insitionem tueantur, reperi, ita tamen comparatas, ut, examine sollicito instituto, multa dubia, eaque haud levia, contra eas moveri possent. Nondum ego rationibus, pro insitione laudatis, commotus, in partes faventium descendere possum. Concedam, decursum variolarum, arte productarum, mitiorem esse naturali; concedam, pauciores multo succumbere; concedam denique, homines, in quibus variolae per artem excitatae sunt, per totam vitam a naturalibus immunes manere; concedam haec omnia, tamen ego non moveor, licet nunquam haec concedi plane posse, persuasus sim et multas rationes subesse, quae dictis omnino repugnent. Verum his immorari non placet; Thesis mea contra insitionem variolarum haec esto: *Posteritati nocet variolarum insitio*. Antequam vero rationem hujus asserti reddam, nonnulla primo de natura variolarum praemittere liceat.

Variolis non commode morbi nomen datur: objicias, symptomata morbosa v. g. convulsiones, vomitus, tormina, diarrhoeas variolas antecedere,





horrorem, aestum, febrim eas comitari; hinc, cum similia in aliis morbis observentur, morbi nomen promereri variolas, putes. Ad haec respondeo: foeminam concipientem saepe vomere, horrores, lipothymias etc. pati, gravidam anxietatibus, insomniis, fame insolita, aestu insolito vexari, parturientem brevi ante partum non raro vomere, tormina, tremores, febriles motus saepe experiri, interdum adeo convelli et multa pati, dum foetum enititur, neque tamen conceptioni, graviditati et partui morbi nomen datur, nec dari potest. Dicas, in variolis, ut in morbis acutis certas periodos observari, esseque stadia eruptionis, inflammationis, supurationis, desquamationis et intra viginti unum diem totum morbum absolvi. Respondeo; periodos morbi notionem non involvere, alias multi periodici status e. g. foeminarum menstrua, tempus pubertatis, graviditas, per novem menses durans, somni vigiliarumque vicissitudines morbi essent. Obicias potiora, dicasque, variolis laborantes interdum perire, superantes languescere et, ut feбри decumbentes, lecta relinquere. Respondeo; ab initio et in vita simplicissima variolarum facies nec ita fuit. Eamus ad gentem rusticam et talem quidem, quae a more urbium luxuriantium longe aliena

aliena est, quae victu simplici vivit et labore corpus exercet, quaeque rara et fervida venere utitur, et progeniem sanam, succis laudabilibus turgidam, nullis parentum vitiis contaminatam, dat; attendamus quaeso, ad rusticae talis gentis variolosos, nonne symptomata antecedentia vix symptomatum faciem habent? vomunt certe lenissime, vel alvum solito paullo liquidiores et crebriores depouunt, inter ludendum maculae rubentes papulaeque exsurgunt, vix lecto detinentur, saepe in aere libero corpore, variolis pleno, versantur, vix dietam consuetam mutare tenentur et variolis, absque ullo incommodo relicto, nullis medicamentis usurpatis, liberantur, vegeti sanique statim sub desquamazione variolarum inter non variolosos salientes. At hoc nunquam dixerim, inter omnes rusticos talem faciem variolarum hodie conspici. Qui enim non vivunt, ut prisca gens mortalium, quive corruptam urbium dietam cum rurali commiscent, inter illos certe bona variolarum indoles vix aut raro locum habet, immo quo propiores civitatibus rustici, eo magis corpora, urbanis similia, sub veste cannabina pelleque ovilla latent. Hoc certum est, quo simplicius vitae genus, eo benignioris indolis variolae, eoque magis a morbo-





rum facie eadem alienae sunt. Hinc cum inter rurícolas respectu urbanorum simplicior semper diaeta et in universum corpora saniora, succisque minus corruptis praedita, deprehendantur, ibi quoque genuinam et veram variolarum indolem disquirendam esse, autumo. Cum mihi interdum contigerit, inter rusticos variolas observare, inque urbe ego vivens, variolosis tum ex plebe infima, tum etiam ex civibus honestis, medicum auxilium adferre, variolas sane inter rusticos et plebem infimam semper benigniores, quam inter cives molles observavi, immo et inter ipsos cives, honestos quidem, sed quibus res angusta domi fuit, multo benigniores plerumque, quam inter ditiores inveni. Observavi porro, variolosos, quibus medicamenta vel nulla vel admodum pauca propinabantur, saepe melius se habuisse, quam eos, quibus saepe de die, ne dicam, omni hora, remedia ingurgitabantur. Cum demum epidemice grassarentur variolae, multo pauciores inter plebem infimam et rusticanos homines, quam inter cives ditiores et praeclaros succubuisse, reperi. Haec sedulo animadvertens, animo per saepe volvi, quaenam forte sit variolarum indoles, numque eae morbi ortum habeant, vel alio prorsus modo eveniant. Experientia docet, variolas  
plerum-

plerumque in infantili aetate, rarius in juvenili, et multo rarius in adultiori et senili statu erumpere. Ostendit quoque experientia, raro quemquam per totum vitae cursum a variolis immunem manere. Constat denique, variolas inter ruricolae, simpliciore diaeta utentes, plerumque benignas esse et absque ullo auxilio medico evanescere, sique sint, qui pereant, plerumque labem quandam, diu ante eruptionem variolarum latentem, habuisse, vel ob admota remedia, minus convenientia, succubuisse. At vero, variolarum status, siue morbosus siue naturalis sit dicendus, tamen ea, quae ex usu rerum et experientia cognoveram, attentum me reddiderunt, quo perpenderem, anne per variolas *naturalis quaedam corpori contingat depuratio*, qua facta, boni laudabilesque succi, per totam vitam circumferendi, evolvantur, vel ortui eorundam ansa praebeatur. Fateor quidem, evolutionis ideam novam non esse, pluraque extare scripta, in quibus variolae ad evolutionis cujusdam statum referuntur. Verum ad evolutionem vasorum, per variolas praestandam, respexerunt Cll. Viri, neque ita ad evolutionem humorum, neque ad corporis quandam depurationem. Dico, per variolas sanguinem humoresque corporis, praegressa quadam depuratio-





ne, evolvi. Corpus infantum succis mucidis acidisque scatet, sanguisque eorum, indolem sanguinis densi et oleosi non habet. Ab initio corpus non nisi merum viscidum est, viscidum tamen, ut ita dicam, organisatum, cujus vasa sensim sensimque evolvuntur, ita tamen, ut, si ad adolescentiam pervenerit, evolutio desinat. Intra haec vasa succi statim ab initio maximam partem viscerum circumferuntur, qui quidem de die in diem mutantur, aliamque faciem induunt, diu tamen et in homine, in lucem edito, viscerum manent. Hoc quidem provido naturae consilio fit: cum enim ex humoribus solidae partes augmentum capiant et ex iis constet corpus, ex quibus nutritur, cumque in tenello corpore solidae partes magis molles sint, mollisque earum status requiratur, quo evolutio et elongatio necessaria bene succedat, factum est, ut succi copiosiores viscerum praesto essent, ne alias substantiae nutrientis inopia sensibilitatis et irritabilitatis statum pessundet et, evolutione nimis cito praepedita, corpus vel pereat vel ocysime ad morbos disponatur. Itaque insignem viscerum copiam per totam humorum massam corporis infantilis distribuit natura, corpusque tenellum adeo constituit, ut quotidie etiam insignis copia viscerum substantiae per alimenta,



ta, corpori tenello adaequata et quidem per haec ipsa alimenta, qualia lac et farinacea, rite praeparata, praebent, multo plus, quam in adulta aetate generaretur. In tali nunc statu non potest fieri, quin insignis copia viscidae substantiae semper adsit, totaque humorum massa, viscido oppleta reperiatur. Ob copiosum hoc viscidum fit omnino, ut sanguis in infantili aetate nunquam eam densitatem habeat, quae in adultiori aetate observatur. Cumque ex sanguine, tanquam ex penu communi, omnes reliqui succi, ideoque etiam succus nutritius separentur, sequitur exinde, succum quoque nutritium in infantibus minus densum, quam in adultioribus, ad solida apponi. Rem ita se habere, observationes, ritae institutae, ostendunt: gluten enim, ex partibus animalium juniorum, minus densum minusque firmum est, quam ex adultioribus eductum. Requiritur autem in juniori aetate talis status, siquidem ex viscido, seu glutine minus denso solida generari debent, quae a vi cordis facile extendi se patiuntur. Si enim gluten nimis cito densum fieret, vera elongatio fibrarum vix locum haberet, siquidem cordis vires resistentiae illi impares essent, ut fieri solet, quando corpus ad incrementum pervenit; tunc enim, glutine densiori facto





et solidorum robore inde aucto, talis per totum corpus enascitur resistentia, ut, cum cordis impulsus vim hanc superare nequeat, solida elongari desinant. Exinde autem novus suboritur corporis status. Cessante enim fibrarum elongatione et robore solidorum aucto, vires cordis etiam augentur; cumque solida elongari ultro se non patiantur, sanguinis humorumque densitas ob actionem cordis vasorumque auctam augetur, corpusque, in universum magis confirmatum, nunc ad varia in hac vita subeunda negotia, aptum fit. Cum denique densitatis et firmitatis status in corpore de die in diem crescat, tanta demum suboritur cordi resistentia, ut, cum vincere eam nequeat, victum denique quiescere incipiat et mors naturalis subsequatur.


Ex his cunctis, quae observationibus anatomico-physiologicis confirmata sunt, patet, in juniore aetate corpus molli viscido plenum esse, ita ut, quo propius origini corpus, eo viscidius illud reperitur et, quo idem remotius cernitur, eo minor viscidii mollis copia deprehendatur. Licet autem viscidum illud molle necessarium sit, nimia tamen ejus copia obesse etiam poterit; siquidem corpus, quo diutius viscido illo abundet, eo tardius ad acquirendum robur solidorum

et

et densitatem humorum aptum fit. Ne autem hoc fiat, natura per varios modos se liberare conatur, ita tamen, ut, cum viscidum hoc in aliis plus, in aliis minus adsit, separatio haec in aliis citius, in aliis tardius succedat. Praeter hoc viscidum ad aliam quandam, magis activam, substantiam respiciendum est, quae partim in ipso viscido latet, partim absque arcta cohaesione in corpore cum humoribus oberrat. Cum quaeritur, quatenam sit illa substantia, cujus indolis esse soleat, eam sane, in genere consideratam, acré quid esse et acrimoniae nomen promereri, constat. Ut autem acrimonia ista definiatur, ad experientiam et observationes primo recurrendum est. Docet experientia, infantes acido facillime obnoxios esse. Sudor eorum acidum spirat, halitus ex ore acidus exit, faeces virides acidum subesse docent, eademque acidum sui foetorem spargunt. Si morbos infantum disquiramus, plurimos, ne dicam omnes, in tennellis vel ab acido vel viscido vel ab utraque causa simul conjuncta provenire, reperimus. Si in causas inquiramus, cur in infantibus acidum tam facile colligatur, res explicatu non difficilis est. Primo ad ventriculi actionem et humorum, inprimis bilis, efficaciam respiciamus. Ventriculi et intesti-

norum





norum actio in tenellis debilis est, bilis autem magis aquosa minusque oleosa et acris, quam in adultis, longeque minus efficax deprehenditur. Cibi itaque vix adeo subiguntur, ut indolem pristinam plane exuant. Victus carnosus solidior vix subigitur, sique mutationem aliquam patitur, corrumpitur potius, inque viscidum abit; victus jurulentus animalis prosapiae, si solus deglutitur, tantam quidem corruptionem, quantam solidior, non patitur, aliquantulum tamen corrumpitur, si quidem ob bilem aquosam non subigitur. Vegetabilis victus durior itidem non subigitur, inque viscidum crassum et acidum degenerat; tenuior, ut lac, pulmenta tenuiora, panis albus etc. magis quidem, quam ullus alius victus subigitur, nunquam tamen ita mutatur, ut indolem genuinam exuere prorsus possit. Tenellis interim optimum nutrimentum praebet, ex quo gluten nutriens facili negotio educitur, quod tamen a glutine adultiorum diversum est. Hoc enim in sanis vegetisque indolem gelatinosam et ammoniacalem, illud vero viscidam et acidam naturam habet. Si itaque victus in juniore aetate acidae indolis est acidumque in corpore transformari nequit, sique gluten, cum acido conjunctum, per corpus distribuitur, fieri aliter haud potest, quin  
acidum



acidum sanguini humoribusque inhaereat. Inde quoque patet, substantiam illam, quam supra in genere activam dixi et acrem, ad acidi naturam vergere, quod vero, cum in corpore aliquam nihilominus mutationem patiatur, cum nullo alio cognito acido comparari poterit, sed acidum singularis indolis, tamen acidum est. Quodsi nunc acidum hoc in corpore copiose colligatur, perque corpus cum humoribus oberret, natura autem corporis humani acida non sit, sequitur omnino, acidum hoc absque noxa in corpore manere non posse. Huic rei optime prospexit natura, quae cor irritabile nervosque sensiles fecit, ita, ut horum illiusque ope ea, quae contra naturam sunt, quaeque ob irritantem indolem cordis nervorumque vires sollicitant, vario modo evolvantur, perque varia colatoria expellantur. Atque haec experientia confirmare videtur. Sic acidum viscidumque, in primis viis infantum copiose collectum, has vias ita sollicitat, ut partim per vomitum, partim per alvum egredi cogatur. Viscidum acidumque subtilius in secundis viis hospitans, neque tamen intime cum sanguine et humoribus commixtum, partim per vias urinarias, partim per cutim, scabie, achoribus aliisque vitiis cutaneis excitatis, evacuatur.

Licet





Licet autem hac ratione copia non exigua viscerum acidique expellatur, nondum tamen per hos modos omne viscidum et acidum, tenuius cumque humoribus et glutine intimius conjunctum, ejicitur, sed in interioribus recessibus latens, modo singulari evolvi ejicique debet, quo demum corpus, istis evacuatis, eam naturam acquirat, quae ad indolem gelatinosam et ammoniacalem vergit. Evolutio haec viscerum acidique subtilioris in aliis lento gressu procedit, in aliis autem et quidem plurimis, motu subito satque conspicuo fit, ita, ut subtilis illa materies viscida, cum acido conjuncta, nunc evoluta, ad superficiem corporis internam et externam propellatur, ibidemque ob acrem indolem ruborem et ob viscidam naturam pustulas efformet, quibus facili, eum statum adesse cognoscimus, qui variolarum nomen habet.

At enim vero, quot quantisque objectionibus expositum me video! Acida viscerumque variolarum indoles obstat. Sed, quaeso, cur acidum spirent variolosi? unde viscidum in tenellis variolosis cum faecibus, inque adultis cum saliva ejiciatur? Objiciant porro, confluentium variolarum naturam ad putridam indolem vergere, ideoque acidae naturae adversari. Respondeo ad haec, confluentes variolas ob perversum aegrotantis



tis statum, per varias vitae rationes inductum, a naturalibus variolis multum degenerare. Concedam tamen, variolas confluentes veras variolas esse; nihil obstat. Putredo enim pro diversa substantiarum indole diversa est. Quid v. c. est oleum rancidum, tetrum pessimumque foetorem spargens? nonne putrescit oleum? et tamen status olei corruptus ab evoluto acido pendet. Perpendant porro adversarii, cur infantes, etiam tenerriimi, variolis superatis, tot morbis, ab acido viscidoque dependentibus, non perinde obnoxii sint, atque ii, qui nondum variolis correpti fuerunt. Laborant quidem adhuc morbis, ab acido spontaneo viscidoque provenientibus, horum tamen morborum vis tanta non est, quanta in iis deprehenditur, qui nondum variolosi fuerunt. Objiciant insuper adversarii, materiem, pustulis variolosis contentam, ne minimum quidem signum acidi cujusdam praebere. Respondeo; multum ne minimam quidem particulam spirituosam cujusdam ebriantis continere, et tamen per evolutionem, depurationem, attenuationem et transpositionem particularum attenuatarum spiritum praebere; acetum porro vel acerrimum, motu intestino suborto, alcalinam substantiam reddere. Quid quaeso sunt pustulae variolosae? Materiem continent, quae  
per





per evolutionem et attenuationem substantiae acidoviscidae, vitae virium ope praestitam, novum productum sistit. Pustulae variolosae effectus morbi sunt, nequaquam causa. Aliud dubium moveant adversarii, dicantque, si acidum subsit, alcalina certe remedia praestarent in variolis, quod tamen contra experientiam. Obiectio pondus non habet. Si motus ad evolutionem materiae variolosae necessarii in corpore suboriuntur, motusque evolutionis incipit, quid facient alcalina? Turbabunt motus, compescent evolutionem salutarem, aliosque motus resolutorios et destructorios producent, corpusque ad interitum disponent. Alia forte erit quaestio, anne alcalina lenissima remedia, cum evacuantibus diu ante motum variolosum cauta manu infantibus vel a primis incunabulis saepius propinata, prodesse, idque forte praestarent, ut corpus sensim eo disponatur, ne unquam variolae prodeant. Concedent forsan adversarii acidam variolarum causam, concedent etiam materiem, variolis contentam, effectum esse, neque materiem ultro acidae indolis reperiri; objicient vero, dicentque, si materies, pustulis variolosis contenta, acidae indolis non sit et tamen motus variolosi primi a motu materiae acido viscidae intestino incipiant, alcali-



na autem remedia certo noceant, motumque impedi-  
ant; unde, pergunt adversarii, materies vario-  
losa, ex pustulis deprompta et per insitionem cum aliis  
corporibus communicata variolas, producat? Victo-  
riam certe clamabunt! Ast, ne victoria ante trium-  
phum! Dico, materiem variolosam, pustulis con-  
tentam, acidum mutatum sistere, neque tamen  
affero, alcalinam naturam habere. Urgeant ad-  
versarii quaestionem, cur tamen materies insita va-  
riolas producat? Quid obstat, cur non halituosam  
materiae variolosae indolem cum fermento com-  
paremus? Flores faecesque cerevisiae multum a  
cerevisia differunt, hordei tamen decocto additae,  
motum in eo excitant intestinum, per quem cere-  
visia producitur. Licet autem fermentum hoc ab  
ipsa cerevisia differat, inter utramque tamen sub-  
stantiam aliqua est affinitas, quae in subtilissima illa  
aereo inflammabili parte quaerenda est. Haec, in  
fermento in motu constituta, in rebus ad fermenta-  
tionem aptis eidem substantiae aereo inflammabili  
ob affinitatem cito se jungit, inque motum ducit,  
ita, ut ejus ope omnes particulae, antea quietae,  
nunc moveantur, ex situ suo diducantur, atte-  
nuentur, motuque immutato nova ratione con-  
jungantur, inque substantiam ab ea, quam antea  
constituerunt, diversam abeant. Anne simile quid  
R r in






in variolis observetur? Examinemus materiem variolosam. Substantiam viscidam, puri similem, praebet, cui subtilissimum principium halituosum inest. Fac vero, applicetur ista materies levi vulnuscule, in cute alius non variolosi hominis facto; quid fiet? Halituosa substantia, ab absorbentibus vasis suscepta, cum humoribus commiscetur, horumque ope per corpus circumducitur. Circumducta substantiam acido viscidam, nondum evolutam, in motum ducit, haecque in motum ducta, cordis vasorumque vires ad vividiores motum excitat; eadem tunc his ipsis magis evolvitur, attenuatur, ab interioribus sedibus removetur et ad peripheriam fertur, ibidemque, cum crassiores partes viscidae cum subtilioribus conjunctae sint, statim corpus non derelinquit, sed in cute sub cuticula figitur, quam in pustulas elevat, sensim tamen sensimque exhalat, dum interim crassiores viscidae partes magis exsiccantur, ita, ut cum cuticula destructa demum decidant, corpusque depuratum et a singulari illa materia acido viscida nunc liberatum relinquant.

Sed haec de natura variolarum dicta sufficiant; accedo ad id, cujus gratia haec dicta sunt. Examinanda nimirum quaestio est, num insitio variolarum tantam utilitatem, ut vulgo putetur, praestet? Dicant

Dicant infitionis fautores, homines, quibus per artem variolae excitantur, minus de vita periclitari, decursum morbi leniorem esse, inoculatos a naturalibus immunes manere, multoque rarius, ac de naturalibus observetur, succumbere et mori. Homines inoculatos minus de vita periclitari et raro quemquam mori, morbiq[ue] decursum leniorem esse, experientia confirmare videtur, omnes autem inoculatos a naturalibus immunes manere, nondum evictum est; siquidem manifesta exempla passim et in nostris quoque regionibus prostant, quae doceant, inoculatos naturalibus nihilominus correptos fuisse variolis. Licet vero contra has rationes multum disputare possem, in praesenti tamen eas non tangam, sed alia opponam.

Omnes mutationes periculosae sunt, et natura aegre fert insolita quaeque. Periculum non semper praesens tempus spectat, sed futurum saepe. E. g. febre intermittente tertiana quis laborat; utitur aeger post unum alterumque paroxysmum medicamento minus apto, adstringente; profligatur febris, aeger nullum incommodum per menses, per annum sentit, sensim vero sensimque viscerum infarctus suboritur et post sex, septem, pluresve annos in hydropem, omnem medelam respicientem,





conjicitur misereque perit. Anne profligatio febris, absque vitae periculo primo suscepta, tamen periculo plena fuerit, cum causam morbi insanabilis mortisque inevitabilis, citius omnino accersitae, dederit? Inoculatio variolarum non absque concomitante malo est; idque eo majus est, quo minus cognoscitur. Non nocet inoculatio, eo tempore, dum suscipitur; nocebit futuris. Humor crasin mutat, corporaque pessundat; inoculati, parentibus debiliores, progeniem dabunt vitiosorem, haecque vix sexagesimum vitae annum attingere sibi spondeant, cum illi jam annos mosaicos attingere, frustra expectent. Ut tamen res clarior fiat, illustremus inoculationem per exempla, ex chemia et physica desumpta. Mustum, egregium naturae productum, depuratione et evolutione indiget, ut nobilius diutiusve duraturum productum, vinum, praebet. Si musto, blanda dulcissimaque indole donato, calor moderatus applicetur, aerisque liberior accessus concedatur, paulatim motus in interioribus suboritur, cujus ope partes musti constituentes attenuantur et evolvuntur, crassiores separantur, aliquae earum rursus uniuntur, ita, ut, motu intestino demum cessante, productum purius, laudabilius et durabilius, quam mustum fuit, obtineatur.

Fac



Fac vero, addatur musto fermentum, id est substantia particulis inflammabilibus et elasticis motuque intestino jam agitatae turgens! quid fiet? citius incipiet motus intestinalis, celerius idem progredietur et certe vinum dabit, vix vero duos tresve annos duraturum et corruptioni multo facilius obnoxium, licet statim post fermentationem pungens fatis fatisque exhilarans appareat. Aliud exemplum addam. Pyra, pruna, mala etc. sub finem aestatis maturescunt et substantiam acidodulcem, gustu gratissimam, viribusque solventibus, abstergentibus, lubricantibus, quin et nutrientibus egregiis praeditam largiuntur. Fac vero, in hybernaculo artis et caloris artificialis ope pyri, mali, pruni idque genus aliae arbores eo disponantur, ut mense januario, februario, martio, alioque maturos fructus praebeant, habitus certe externus idem fere erit, pulpamque dabunt succo plenam. Quid vero? succi certe aquosi magis sunt, particulis acidodulcibus non abundant; caeterum iidem fructus vix unum duosve menses asservari poterunt, et cito fatis corrumpuntur. Transferamus haec ad variolas seu potius ad corpus humanum, variolis obnoxium! Corpus hominis subiectum dabit, quod ad subeundum motum intestinum aptum est.

Rr. 3

Homo






Homo ad mutationes subeundas natus vel a primis vitae horis mutationes patitur. Sanguis recens nati nondum sanguinis adulti hominis crasin habet, sed sensim per varias mutationes ad eam acquirendam disponitur. Hae mutationes in omnibus non uno eodemque tempore fiunt, sed pro varia idiosyncrasia mox citius, mox tardius eveniunt. Sic in nonnullis infantibus dentes quidam ante annum, in nonnullis non nisi anno praeterlapso, erumpunt. Alii ante annum decimum quartum pubescunt, alii post eum etc. Certum autem est, per has ipsas mutationes, siue eae citius, siue tardius eveniant, corpus varie mutari et ad novum semper statum disponi. Idem istud ratione variolarum observatur. In aliis eae citius, in aliis tardius erumpunt, prout nimirum dispositio corporis et humorum imprimis esse solet. In nonnullis certe eruptio ista accelerari, in aliis forte retardari poterit, prout materiae illius dispositio se habet. Interim certus quidam materiae illius gradus, ut ita dicam, maturitatis requiritur, si evolutio bene succedere debeat. Adest certe in plerisque illa materies, ita, ut etiam ante spontaneam evolutionem per insitionem aut commercium cum variolosis evolvi possit. Si tamen ante maturitatis tempus evolvitur, corpus  
quidem

quidem ab ista materie liberatur, vix vero tam purum, quam per spontaneam evolutionem fit, fieri videtur. Sicut enim per additum fermentum musti fermentatio vinique generatio quidem acceleratur, neque tamen liquidum adeo purum ac durable producitur, ita quoque per insitionem materies quidem variolosa evolvitur, vix vero corpus adeo purum reddi poterit. Cum enim ante materiae illius dispositionem evolutio nimis cita excitetur, fieri aliter haud potest, quin phures particulae crassiores, nondum maturatae relinquantur, per quas alius mixtionis humorum status producitur. Illustratur praeterea ista res fermentatione musti accelerata. Mustum enim, cujus fermentatio acceleratur, majorem copiam faecum relinquit, quam illud, quod modo naturali et spontaneo fermentat. Quod si itaque particulae non retinendae in corpore relinquantur, haeque cum sanguine misceantur et jungantur, sicque alia sanguinis mixtio producat, solidae etiam partes, cum nutrimentum ex sanguine accipiant, aliam indolem acquirant. Quid vero inde expectandum? anne status solidorum pejor et a naturali multum diversus fit? Certe partes retentae, alias cum materie variolosa per ipsam naturam evoluta evacuandae,

Rr 4

nunc





nunc cum sanguine reliquisve humoribus mixtionem ingrediuntur, alia proinde et naturali non consentanea humorum mixtio suboritur, ex quibus succus gelatinosus alius indolis secernitur et ad solida apponitur. Solidorum ergo status alius et a naturali diversus producitur, hinc totum corpus mutatur, hacque ratione eo disponitur, ut, cum partes viscidae acres blandis corporis humani partibus solidis fluidisve intertextae fuerint, ad acrimonias subigendas et expellendas minus aptum sit, injuriisque externis minus resistat. Inde autem alia novaque mala metuenda sunt. Forte posterius de morbis plane novis, nostro aevo sane incognitis, olim tamen metuendis, conquerentur, cum novae nunc generentur causae et tales omnino, quae, corpus debile jam magis defatigantes, ad citiorem mortem disponent. At haec non solum, pejora adhuc metuenda sunt. Cum enim parentes, per inoculationem jam debilitati minusque laudabilibus humoribus referti, sobolem debiliorem vitiosioremq; procreent, haecque, si inoculationem pateretur, progeniem multo vitiosiore daret, natura certe humana ita mutaretur, ut plurimi hominum morbis plane singularibus antea vexatorum et debilitatorum, vix annum quinquagesimum attingere possent. Supererunt  
tamen

tamen semper aliqui non inoculati homines, qui si cum inoculatis per conjugium jungantur, progeniem non adeo quidem vitiosam dabunt, debiliorem tamen semper, quam illa, quae a parentibus utrisque non inoculatis producta fuit. Sana itaque semper valetudinariis mixta erunt, hoc tantum discrimine, ut post saecula, nisi inoculationis fervor cesser, multo plura corpora debiliora magisque morbida, quam nostris his temporibus, observanda forent. Optandum ergo esset, ut inoculationis fautores experientiae suae non tantopere confidant. Fallax enim et hic saepe est experientia, praestatque semper, non, quod praesens modo est, videre, sed illa, quae futura sunt, prospicere. Perpendant, quaeso, mala extimescenda! Primum, quod metuo, ad ossa pertinet. Cum enim per variolas, hoc est, per motum, quem ipsa natura in evacuanda materie, ad maturitatem evecta, praestat, materies acido viscida ejiciatur, per inoculatas autem eadem evacuatio incompleta fiat, multae partes materiae acido viscidae relinquentur, quae, ad ossa delata, mollitiem praeternaturalem eis conciliabit, immo pejora forte mala efficiens ulcera in iisdem producet. Eadem haec materies, incomplete evacuata, non solum ossibus, sed etiam nervis infensa esse videtur, metusque est, ne in his

Rr 5

ipsis





ipsis peculiares debilitates et motus convulsivos producat. Lymphae etiam nutriendi obesse poterit et metuendum est, ne plures inoculati, macie sensim confecti, citius pereant. Perpendant insuper inoculationis fautores, an ne inoculorum infantes, si his ipsis variolae inoculentur, magis ac parentes in ipso variolarum decursu de vita periclitentur, siquidem corpora magis impura, quam illi, praebeant. Objectionem certe praevideo, quae ab ipso communicato contagio desumi poterit. Dicant nimirum insitionis auctores, eadem mala, quae statim recensui, extimescenda esse, si variolae per susceptum contagium ex solo commercio, absque inoculatione, producantur. Pondus quoddam habet haec obiectio. Sed perpendant, quaeso, discrimen, quod inter effluvia, corpori per halitum quasi communicata et inter materiem, halituosum noxium principium foventem, esse solet. Per hanc, vulnuscule applicatam inque substantia susceptam, mutationes insolitae subito et uno quasi impetu excitantur, per illa vero, non nisi per inhalantia vasa suscepta, sensim sensimque eadem mutationes insolitae producuntur; et concedo, mala etiam extimescenda esse, tanta autem, ut illa, non videri. At vero, concedo totum argumentum, et optarem,



optarem, ut commercium semper inter variolosos et variolis nondum correptos interdiceretur. Dicant quidem adversarii, hoc saepe fieri non posse. Fieri tamen potest, respondeo. Si pestis saevit, optimum auxilium seu consilium in fuga consistit. An pestilentialis materies corpori applicanda, ut pestis excitetur, quo postea, hac cum vitae periculo superata, a peste liberum maneat corpus? Aliam quaestionem forment inoculationis fautores, dicantque, cur saepe homines anno aetatis vigesimo, trigesimo et multo serius variolis naturalibus corripiantur et anne corpus interea multa ob diutius retentam materiem variolosam patiatur? Responsio facillima est: forte materies variolosa nondum in ejusmodi corporibus ob idiosyncrasiam in infantili aetate ad eum gradum maturitatis pervenit, ut evolvi posset, forte etiam eadem materies per varias, nobis incognitas, causas impedita fuit, quo minus evolveretur. Quid? si in ejusmodi corporibus inoculatio diu ante tentata esset, anne corpus magis debilitatum foret? Urgeo, ejusmodi corpora nos potius de eradicandis variolis seu de immutanda materie variolosa, ne unquam prodeat, sedulo admonere. Nonne melius esset, exhibere vel a prima jam infantia ea remedia, quae viscidum





dum attenuent, acidumque sensim immutent sensimque evacuent, ne unquam variolae prodeant, sed corpus paulatim ad acquirendum hominis sani sanguinem disponatur? Aliam insuper quaestionem forment inoculationis fautores, dicantque, cur saepe homines ad summum senium usque per totam vitam a variolis immunes maneant, nunquam tales, cum tamen in corpore retineri videretur materies variolosa, aliam sanguinis crasin, quam in aliis reperiatur, habeant? Habere certe possunt; interim majus argumentum oppono, si dicam, forte in iisdem naturam sensim sensimque materiem variolosam immutasse et modo plane insensibili expulisse, ita ut salvos postea eosdem redderet. Quid, si dicam, inoculationem frustra saepe tentam fuisse? Nonne in ejusmodi corporibus materies variolosa jam expulsa aut adeo imminuta esse videtur, ut motus excitari nequeant? Nonne inde argumentum iterum, de eradicanda potius, quam propaganda materie variolosa desumi poterit? Sed pedem hic figo et quemlibet inoculationis fautorem rogo, ut de futuris quoque cogitet, nec committat aliquid, ut aliquando dicendum sit: Non putaram. Ego vero, de utilitate inoculationis nondum persuasus, vereor fane, ne apophthegma illud




Stahlianum ad infitionem variolarum omnino quadret: *In rebus quantumcunque dubiis & controversis, quod maxima sentientium pars amplectitur, plerumque error est.*



### III.

De Belladonnae viribus et efficacia, in Epilepsia habituali, tentamen. Auctore Lic. I. E. GREDING.

uanquam nonnullis visum est, aegros tantum, optimis remediis jam ad nauseam usque abufos, nullamque amplius curationem admittentes, in Ptochotropheum Waldheimense deferri; omniaque, vel eam quoque ob rationem, superflua, et prorsus inutilia esse, quod de optimorum licet remediorum, praesumptione hic nihil praestare volentium, efficacia, certi quid nunquam erui, vel definiri possit: quilibet tamen facile perspiciet, ejusmodi tentamina, ex Serenissimi, Optimique PRINCIPIS ELECTORIS Nostri benignissimo consilio, tam aegrorum ipso-  
rum,





rum, quam boni publici causa, subinde instituen-  
da, nusquam melius, quam in aedibus nostris, ad  
eruendam veram medicamentorum viam, et effi-  
cacia, institui, et ad finem usque desideratum  
perduci posse. Magnus enim, et septingentos jam  
attingens, hic nutriendorum numerus, quorum  
quingenti ad minimum, ob mentis insignem im-  
becillitatem, melancholiam, furorem, epilepsiam,  
vel alium quemdam chronicum, eumque utplu-  
rimum graviores, morbum, huc delati sunt, de-  
cedentes vero, novis semper colonis, fere quotidie  
restituuntur, augenturque, copiam variorum, ad  
ejusmodi tentamina paratissimorum, hominum fa-  
cile suppeditat. Horum plerique antea, ob egesta-  
tem, vel nullis remediis, vel certe incongruis,  
usi, convenientiore medicamentorum administra-  
tione, amissam saepenumero sanitatem, vel omni-  
no, vel saltem quoad maximam partem, non ita  
difficiliter recuperant; id quod haud rara, tam  
epilepticorum habitualium, quam melancholico-  
maniacorum, subinde pristinae sanitati restituto-  
rum, jam optime, partim hic adhuc valentium,  
partim vero ad pristinos lares, laboresque reverso-  
rum, exempla, abunde testantur.

Si loci porro, vitae generis, et consuetudinum, antea contractarum, mutatio, in allevandis his morbis, quidquam valet; naturalis certe Ptochotrophei, oppidique ipsius, in valle quidem brevi et angusta, sed ad alluentis Zschopae, rapidi fluminis, ripam siti, salubritas; aquarumque e montibus, vallem undique cingentibus, tam silvis et fruticetis, quam agris fertilibus, hortis, pascuisque, amoeno adspectu, undiquaque tectis, uberri- ma unda scaturientium, puritas; summumque munditiei, quod externos etiam, spectandi gratia huc venientes, toties jam in admirationem abripuit, studium, instituendae curationi haud parum prod- esse debent. Sic aerumnosa quoque, et a pleris- que antehac victu duro, interdum vix protracta vita, cum liberaliore, ex vegetabilibus et animalibus optimi generis, cuilibet aegro, in aedibus nostris, ab ipso medico convenienter ordinandis, commutata, et cum corporis exercitio, in amoe- nissimi, aedes nostras proxime ambientis, et per- quam spatiosi, horti cultura, obambulationibus, variisque aliis, sanitatis praecipue recuperandae gratia, pro lubitu, et virium ratione, institutis laboribus, conjuncta, depressos animos erigere, et languentes aegros, nulla re hic indigentes, a curis,   
animum





animum discruciantibus, liberos, et a rebus, animum irritantibus, remotos, non solum reficere, sed et suscipiendam quandam curationem egregie juvare potest. Et cum praeterea in comparandis, cuilibet necessariis, optimisque remediis, nullis sumptibus parcatur, medicus quoque et chirurgus, in quotidiano aegrorum, iis utentium, examine, eorundem effectus quam commodissime annotare, et dijudicare possunt. His etiam potestas demortuorum cadavera, ad perscrutandam morbi mortisque causam, pro lubitu incidendi, concessa est, quorum descriptiones, jam a multis retro annis collectas, proximo forsitan hoc Adversariorum Medico-Practicorum Volumine, partitis vicibus, exhibiturus sum.

De novo igitur, cum epilepticis praecipue qui nullo haecenus remedio allevari potuerant, instituendo tentamine cogitanti mihi, Solanum lethale, belladonna *μελανοκέρασον*, seu Atropa LINNAEI dicta, vel ob sui famam in curando morsu canis rabidi, nuperrime celebratam, aliis facile praeferenda videbatur, cujus infusum aquosum, ante hos duodecim, et quod excurrit, annos, et ex eo tempore aliquoties, in cancro labii inferioris, uteri et mammarum vario successu adhibue-

ram;



ram; certissime persuasus, eventum, sinisteriorem quoque, ideo tamen medicinam facientibus non prorsus displiciturum, quod pericula ex aliorum infortuniis cognita, longe tutius ab aliis caveantur, prosperiorem vero, iisdem fane eo gratiorem fore, quo minus parva etiam mitigatio, in morbis adeo diris, ab ullo artis perito, negligi soleat. Cum vero aegris infusi loco, extractum et pulverem foliorum belladonnae, hic nullibi reperiendae, exhibere apud animum constituiissem; extremo augusto et ineunte septembri anni 1769, ab admodum perito Henrico Godofredo Kiefsling, Werdayensium Pharmacopoeo, plantam, istic sat copiose crescentem, colligendam, siccandam, exprimendam, succumque lenissimo, ne ad extracti consistentiam inspissandum curavi. Optima tantum siccata folia, egregie viridia conservans, succum, e planta recente, foliis succulentis, floribus et bacis immaturis viridibus, quippe quae, ob praecedentis anni nimis frigidam, humidamque tempestatem, istic locorum, nequaquam ad maturitatem pervenerant, instructa, expressum, illico leni igne inspissaverat. Hujus igitur extracti aequae, ac herbae siccatae, libra una instructus, ex humanissimi quoque LUDWIGII nostri liberalitate, aliquam





ficcatae hujus plantae copiam accepi, quam superiore aestate, in horto suo collectam, solertissime siccandam curaverat; quamque pulverisatam, saccharoque mixtam duobus epilepticis (no. 19. 23.) et tribus epileptico - maniacis (no. 17. 20. 22.) a d. 24. decembris usque ad d. 30. martii, solam, dein vero pulverem foliorum belladonnae Werdaviensis, tandemque a d. 15. maji 1770. pillulas iisdem exhibui.

Sed ne aegris ab initio statim nimia forsitan dosi nocerem, tam pulverem, quam extractum, tantae sacchari quantitati permiscui, ut in partes, granum dimidium belladonnae continentes, ter de die exhibendas, commode dividi posset, quas ad sesqui granum sensim auxi. Quam cum sine molestia ferrent, reliquo belladonnae extracto, unciarum quindecim et drachmae unius pondere, uncias octo pulveris foliorum admiscui, pillularumque, unciarum viginti duarum cum semisse, hinc obtentorum, grani unius pondere, reliquorum cuilibet sub initium tres, dein vero sensim plures et quibusdam (no. 11. et 18.) octo, novem, quin et (no. 18.) decem, spatio viginti quatuor horarum, partitis vicibus, exhibui a).

Quid

a) Si quis autem dosin trium vel quatuor granorum, nimiam esse censeat, is perpendat quaeso, Cl. MARTEAU, feminae,



Quid vero in epilepsia habituali praestiterit, ostendent

I) Juvenis, J. A. S. viginti novem annorum, epilepsia ab infantia laborans, anno autem elapso, ex quo carcere detinebatur, eadem crebrius vehementiusque correptus, in aedibus nostris per novem menses ab illa immunis, mense decembri eadem denuo saepius et praesertim nocte d. 28. decembris 1769, vehementer excruciatu, d. 30. decembris belladonna uti coepit, cujus ad d. 6. martii 1770. drachmas quatuor cum dimidia sensim deglutivit. Die 1. januarii post levem noctu accessionem, frigori febrili similem, de corporis caloribus, nonnunquam subito accedentibus, crebra urinae missione et membrorum lassitudine conquerens, sequente nocte binas ejusmodi paulo fortiores, cum vertigine, et siti expertus est. Die 3. januarii sponte vomens et vertiginosus parum volatici caloris, et d. 5. binas ejusmodi admodum leves

Ss 2


acces-

feminae, de scirrho mammae dolente conquerenti, tandem undecim belladonnae grana infusi spirituosi et Cl. COLLIGNON, drachmam integram quotidie, infusi aquosi forma, moniali virgini, cancro mammarum laboranti, tuto et cum levamine, exhibuisse. Vid. Journal de Medecine par Msr. VANDERMONDE. tom. XIV. janvier 1761. pag. 18. 22. seq.





accessiones cum imminuta vertigine, copiosiore vero urina et alvo consueto laxiore percepit. Die 7. januarii notabilem omnium membrorum tremorem, qui duas horas durabat, cum insigni oculorum hebetudine sentienti, sequente die, post brachiorum concutientes spasmos, oculorum etiam dolor ardorque accessit, quae omnia tamen d. 12. januarii penitus evanuerunt. Die 15. sequentibusque magnam urinae copiam reddidit et d. 18. januarii subito clamando per breve tempus manibus pedibusque tremuit. Hinc cibos optime adpetens, valensque d. 4. februarii seqq. post ventris tormina continua, die 6. seqq. crebriore diarrhoea cum ciborum adpetitu imminuto laboravit; hinc belladonnae loco, aliis remediis adjutus, a d. 14. februarii demum ad d. 6. martii usque, eadem denuo usus est. Die 22. februarii autem de artuum tremore et lassitudine conquerens, a d. 28. februarii quolibet mane per tres horas frigus quasi febrile cum subsequente parvo, vel potius nullo calore et continuante lassitudine, solo d. 5. martii excepto, sensit. Hinc d. 7. martii belladonnae loco, cortice Peruviano aliisque adjutus, ab epilepsia quidem ad hunc usque diem prorsus immunis, qualibet tamen hebdomade bis vel ter, oriente praesertim sole, levissimum, brevique desinentem



finentem capitis calorem, cum leni quadam vertigine, ad finem maji usque percepit. Nunc vero bene valens, rarissime tantum, matutino praesertim tempore, post momentaneos capitis dolores punctorios, parvo adhuc, citissimeque desinente capitis tremore, adficitur.

2) A. M. Z. b) ex aliquo rursus tempore epilepsia crebrius et vehementius adflicta, a d. 22. januarii ad d. 4. aprilis belladonnae drachmas quinque cum scrupulis duobus sensim deglutivit. Die 25 et 26. crebriorem nauseam et vomituritiones sentiens, d. 27. januarii a leni emetico nullos vomitus, sed insignem alvi evacuationem experta, circa vesperam et sequentis diei principio epilepsia ter sat vehementer corripiebatur. Die 29. januarii ab epilepsia quasi in glomerem contracta, facie admodum pallescens, de insigni vertigine conquesta est. Hinc leviores tantum insultus observabantur. Post menstruorum, a d. 20. ad d. 22. februarii, fluxum fortiter convellebatur, id quod etiam a d. 2. martii sequentibusque crebrius accidit. A d. 14. martii per quosdam dies de oculorum hebetudine conquesta, menstrua a d. 18. ad d. 20. martii rite ex-

Ss 3

perie-

b) Haec Stramonii extracto usa, Adversar. hor. Medic. Pract. P. II. pag. 305. no. 33. reperitur.





periebatur. Nauseam, d. 21. martii praesentem, lene emeticum fustulit. Cum vero epilepsiae paroxysmis denuo et crebrius et vehementius corripere-  
retur, d. 4. aprilis e continuantium numero penitus exclusa est.

3) Femina quadraginta circiter annorum c) post iram d. 3. et 4. januarii vehementer convulsa, ex eo tempore usque ad d. 25. aprilis parum supra drachmas septem pillularum belladonnae sensim deglutivit. Sequentie die jam alvum, consueto laxiorem, d. 12. januarii oculorum hebetudinem et a d. 17. ad d. 24. januarii menstruum fluxum experiebatur. Lateris dolorem d. 3. februarii sequentibusque, per vices accedentem, alvus consueto laxior plerumque fustulit. Die 7. februarii parum salivare incipiens, d. 14. februarii epilepsiae paroxysmo, mensstruis a d. 12. ad d. 19. praesentibus, sat graviter laboravit. Die 26. februarii de frontis, lateris sinistri et coxendicis dolore conquerens, a d. 8. usque ad d. 15. martii, mensstruis praesentibus, epilepsiae insultibus, plus minus vehementibus obnoxia, d. 30 martii post nauseam, vertiginem, faciei, oculo-

c) Eadem, quae loco b) citato pag. 286. sub no. 25. descripta est.

rumque ruborem cum febricula conjunctum, postero die mane catamenia et vesperi vehementem epilepsiae paroxysmum experta est. Ex eo tempore vero, menstruis licet d. 9. aprilis cessantibus, bene valuit usque ad d. 25. aprilis, quo epilepsia aliquoties quam vehementissime cum furore quodam correpta cadens, caput, in sinistri bregmatis anteriore parte allidendo, ad cranium usque laesum reportavit; quam ob rationem quoque e continuantium numero excludebatur. Die 6. maji post febriculam dextrum faciei latus subito cum colli glandulis intumuit adeo, ut d. 8. maji palpebrae clausae manerent; vulnus vero ad cranium usque incisum, consueta ratione mediocriter suppurando, d. 10. maji plane clausum, ipsaque d. 17. maji a faciei etiam tumore et glandularum inflatione penitus restituta erat. Quod vero ad epilepsiam attinet, ex eo tempore nullam ejus imminutionem potui observare.

4) J. C. R. d) juvenis viginti quatuor annorum, post vehementes d. 15. et 16. decembris epilepsiae paroxysmos, quotidie leviores ejusmodi insultus, cum insigni capitis calore, deliriis, praecordiorum

S s 4

anxietate

d) Idem l. cit. pag. 278. no. 20. invenitur.





anxietate et siti, expertus erat, cum d. 20. decembris 1769. belladonna uti inciperet, cujus ad d. 30. martii drachmas septem cum scrupulo uno consumsit. Faciei rubor, capitis calor et deliria, brevi imminuta, d. 25. decembris prorsus cessabant, profluente largiore urina et rerum solummodo vacillatione quadam ante oculos continuante. A d. 28. decembris de capitis dolore conquerenti, d. 31. ventris tormina, phlogoses, brevi transeuntes, cum ciborum adpetitu imminuto et respiratione paulo difficiliori jungebantur, quibus d. 5. januarii oculi dextri dolor, posteaque deglutitio parum impedita accedebat, ad d. 15. januarii plus minus continuantibus. D. 16. januarii delirium levisque furor, cum ciborum adpetitu vario et d. 24. januarii ingens capitis calor per vices ad d. 7. februarii continuans observabatur. Die 12. februarii deliria denuo reversa, ad d. 18. plus minus continuarunt, ex eo tempore vero bene valuit. A d. 6. usque ad d. 27. martii de saliva viscida, tantum in faucibus subinde collecta, conquerens, hac nocte vehemente epilepsiae paroxysmo, per tres horae quadrantes, cum insequente insania, correptus, d. 30. martii e continuantium numero exclusus, ad d. 10. aprilis, per intervalla plus minus insaniit. Hinc modo de  
capitis

capitis et oculorum, modo de faucium dolore conquestus, d. 19. aprilis copiosam pituitam exscreans, d. 20. longe majorem ejusdem copiam evomit, salivatione cum rerum ante oculos obversantium vacillatione sat diu continuante. Post vehementem denuo d. 7. maji epilepsiae paroxysmum, per quosdam dies insaniens, in eundem tandem statum, quo ante hanc coeptam curationem fuerat, recidit.

5) Virgini, quae post stramonii usum e) epilepsia habituali auctumno 1769, licet bene semper menstruata, quotidie aliquoties afflicta, exeunte novembri de sanguinis commotionibus, praecordiorumque anxietatibus conquerebatur, mens nequaquam constabat, nec facile quidpiam in memoriam revocare, nec interrogata apte respondere poterat. Praecordiorum anxietates d. 4. decembris adeo augebantur, ut nocte proxima sibi moriendum esse, persuasissimum haberet, cum vespera belladonna uti inciperet, cujus ad d. 13. martii 1770. drachmas septem cum dimidia sensum, deductis menstruorum feriis, octoginta quinque diebus deglutivit. Cessabant quidem commemoratae anxietates haud ita multo post, reminiscencia vero non

S s 5

nisi

e) Cujus descriptio l. c. pag. 292. no. 28. legitur.





nisi cum menſtruorum fluxu d. 13. decembris rite  
accedente, plenarie revertebatur, quae tamen a  
d. 23 - 26. decembris iterum inſigniter perturbaba-  
tur. Die 7. decembris urinae largior profluxus,  
dieque 12. decembris oculorum, quaſi ab inſperſis  
arenulis, preſſio, ad menſtruorum profluvium con-  
tinuans obſervabatur. Die 28. decembris ſequen-  
tibusque, nec non d. 6. et 7. januarii oculorum  
hebetudinem ſentiens, d. 3. januarii jam conſueto  
pallidior, magisque ſiticulofa erat, iterumque men-  
tis cogitata verbis exprimere nſciebat. Menſtruo-  
rum negotio a d. 11 - 14. januarii ſine incommodo  
peracto, d. 24. januarii demum duos vehementiſ-  
ſimos epilepſiae paroxyſmos ſuſtinuit. Die 5. fe-  
bruarii poſt lenem morbi inſultum ſat diu ſubri-  
dens, dieque 7. praeter conſuetudinem varia in-  
congrua per breve tempus loquens, menſtrua a die  
10. ad d. 13. februarii tertium experta eſt. Die  
18. poſt meridiem et velperi ter ſponte evomuit  
ingefſta, lene emeticum, d. 20. februarii ſumtum,  
bis inſuper pituitam vomendo evacuavit. Die 22.  
februarii pallidior, ciborum adpetitu majore gavifa  
eſt, quem vero d. 25. februarii epilepſiae pa-  
roxſinus vehementior, cum foecum alvinarum,  
urinaeque excretionem, dieque 27. februarii riſus  
prae-



praeter consuetudinem frequentior, cum mentis notabili perturbatione exceperunt. Oculorum hebetudinem d. 1. martii reversam, d. 3. levis epilepsiae insultus, cum capitis antrorsum dependentis vehementi, in utrumque latus, quassatione, et d. 4. martii similis cum dentium stridore et diuturniore risu insecutus est. Paroxysmos vero, ex aliquo tempore, ab hora tertia ad quartam matutinam, semper accedentes d. 7. martii belladonnae loco cortex Peruvianus, exhibitus, non nisi per tres continuos dies compescere valuit. Post menstruorum enim d. 9. martii accessum, d. 10. sat fortis paroxysmus revertebatur. Cessantibus iisdem, d. 12. martii ad belladonnam regrediens, sequente nocte quatuor sat vehementes epilepsiae paroxysmos experta, et d. 13. martii e continuantium numero prorsus exclusa, toto hoc curationis tempore, non nisi a die 17-24. januarii ab epilepsia immunis, iam in eodem, quo antea statu, miserandam vitam agere pergit.

6) E. R. L. viginti circiter annorum, quae ab hyosciamo f) breve, a stramonio g) vero magis con-

f) l. c. pag. 90. no. 25.

g) ibid. pag. 296. no. 30.





conspicuum, longiusque durans, morbi levamen experta erat, extremo novembri 1769 epilepsia iterum et crebrius et vehementius corripitur coepit. Hinc a d. 4. decembris usque ad d. 3. aprilis 1770. eidem integram fere belladonnae unciam exhibui, quae, per totum paene curationis decursum, largum sudorem, et a d. 13. decembris copiosum urinae profluvium excitavit. Proximo d. 5. decembris a meridie de spasmo sinistri brachii dorisque, admodum dolente, circa vesperam in crura se extendente, conquesta est, quem, intermedia nocte, epilepsiae paroxysmus vehemens, cum duobus debilioribus, et nocte proxima, fluxus menstruus, d. 10. decembris desinens, cum largo sudore, exceperunt. Post levissimos tantum d. 11. et 13. decembris artuum spasmos, levesque d. 19. faucium dolores, ventris quaedam tormina, cum insequente leni diarrhoea, sensit, ad d. 22. saepius revertentia. Auctum vero sudorem et urinae profluvium d. 28. decembris scabiei eruptio, circa pedum talculos, insequabatur, quam die sequente jam adeo leves, solo clamore tantum transeuntes, insultus exceperunt, ut, quod antea nunquam factum erat, omnium, quae interea ipsi acciderant, recordaretur. Levis simul accedens diarrhoea, hoc et sequente die, sudorem quoddam.



modo imminuit, postea largiter iterum, cum urinae profluvio, continuantem. Scabie sensim ad genua proserpente, d. 4. januarii jam longe pacatior, mentisque magis compos, d. 11. januarii media nocte vehementem singultum, d. 16. insignem capitis quassationem, et postero die clambrem solummodo, cum urinae inscio profluvio, quinquies experta est. Fluentibus a d. 21. ad 25. mensstruis, d. 22. januarii justo loquacior, dieque 25, post menstruorum cessationem, bis tantum clamavit subsequente tussi. Die 30. januarii iterum loquacior salaciorque, d. 31. a meridie aliquoties clamando humi procumbens, momento citius surrexit, viridemque pituitam ex ore stillavit; dato igitur leni emetico, d. 2. februarii vomuit; nihilominus tamen nausea, subiti clamores cum corporis vacillatione, integra tamen reminiscencia, quotidie semper aliquoties, cum labris longam salivam manantibus, continuarunt. Hinc d. 5. februarii iterum, dieque 13. tertium emetico dato, ventriculum exoneravi. Die 16. et 17. februarii largiter sudavit; cum vero d. 18. dentium stridores cum salivae copioso effluxu denuo experiretur, d. 20. februarii leni iterum emetico sumto, quinquies pituitam flavam evomit. Post duos d. 21. februarii levissimos insultus






insultus parum singultivit, levissimamque d. 5. martii corporis circumgyrationem menstrua exceperunt, d. 10. martii cessantia. Scabie tunc manus totumque corpus occupante, d. 18. martii demum levem, et media nocte fortio rem, epilepsiae insultum experta est. Levissimum emeticum d. 20. martii tres vomitus tresque alvi evacuationes excitavit, id quod d. 25. martii post tres vehementissimos epilepsiae paroxysmos, eodem fere cum effectu repetebatur. Cum vero d. 2. aprilis a meridie, scabie licet in dies magis propullulante, ter insuper epilepsia quam vehementissime corripere tur, e continuantium numero exclusa, jam aliis remediis utens, vehementibus tamen, quin et vehementissimis epilepsiae paroxysmis, quos menstrua, a d. 27. aprilis ad d. 3. maji, largissime promanantia, perparum mitigare valebant, saepius correpta, mense junio demum, scabie undique scatens, priori epilepticorum insultuum lenitati, raritatisque restituta est.

7) J. M. S. triginta quinque annorum h), d. 2. januarii 1770. bis vehementer convulsus cum  
sub-

h) Idem l. c. p. 322. no. 42. erronee C. G. S. vir, quadraginta, et quod excurrit, annorum, dictus est.



subsequente infania, ad d. 4. januarii usque nihil degustaverat, hoc die autem belladonnae pilulis, quarum ad d. 1. junii unciam unam consumsit, uti incipiens, bene dormivit, pauloque pacatior factus cibos bene adpetiit. Sequenti nocte delirans, interdum pacatus, urinam crebro dimisit, delirio, ad d. 14. januarii, plus minus continuante. Post mediocrem d. 10. et 12. januarii longeque vehementiorem d. 13. epilepsiae paroxysmum, fatis pacatus, pilulas tamen saepius respuit. Die 22. januarii levis insultus cum subsequente diuturniore somno, et d. 28. januarii paullo vehementior cum clamore aderant. Die 7. februarii parum infaniens, pilulasque saepius respuens, d. 19. et 20. februarii epilepsia denuo aliquoties tentatus, per intervalla iterum infaniit. Cum vero d. 3. et 11. martii leviter iterum epilepsiae insultu adficeretur, et sequente die victum contemneret, d. 30. martii lene vomitorium sexies alvum laxam cievit, et ex eo tempore pacatissimus, ast paullo languidior, pallidusque visus est. Post levissimos d. 18. 28. martii d. 6. 15. 20. et 26. aprilis d. 6. 7. et 27. maji insultus bene valuit, ita tamen, ut interdum per brevissima intervalla paululum insaniret, de reliquo autem ad hunc usque diem, se longe melius,





lius, quam ante coeptam hanc curationem, haberet.

8) Nobilis, e generosa stirpe oriundus, juvenis, viginti et amplius annorum, hyosciami extracto i) quondam usus, a catalepsios et epilepsiae paroxysmis, quos capitis dolor, manuumque tremor sudorque, cum praecordiorum anxietatibus, annunciabant, quolibet mense semel, vel aliquoties, vehementer correptus, jam insignem mentis hebetudinem contraxerat. Cum igitur d. 8. 9. et 10. januarii 1770. ejusmodi paroxysmis quater sat vehementer laborasset, a d. 26. januarii usque ad d. 5. julii drachmas novem belladonnae sensim deglutivit. Die 27. januarii jam de parva oculorum hebetudine, et oris siccitate conquerens, levia ventris tormina sensit, sequenti tempore saepius revertentia. Perpetuus fere quondam manuum tremor sudorque d. 1. februarii jam insigniter, et post levissimum d. 3. februarii insultum, magis imminutus, laxante d. 1. martii sumto, demum per vices revertebatur. Die 15. februarii levis capitis dolor, sequente die, scapulas occupaverat. Levem autem, post iram d. 3. et 4. martii, capitis dolorem, cum  
prae-

i) vid. l. c. pag. 100. no. 33.

praecordiorum anxietate, d. 5. mediocris, d. 6. sex  
 leves cum vehemente, et d. 7. martii denuo medio-  
 cris epilepsiae paroxysmus, cum summa anxietate,  
 et lateris sinistri dolore, exceperunt. Sanguis  
 d. 9. martii e brachio missus, densus, tenuique  
 crusta inflammatoria obductus, conspiciebatur. Sa-  
 porem oris depravatum, lene emeticum, iteratis  
 vicibus, d. 11. 13. et 15. martii propinatum, in-  
 credibilem pituitae copiam, tam superius, quam in-  
 ferius evacuando, prorsus sustulit. Parva tamen  
 anxietas a d. 20. ad d. 30. martii per intervalla re-  
 vertebatur, manuumque d. 6. aprilis moderatum  
 sudorem, d. 7. levis iterum insultus excepit. Die  
 17. aprilis vero, bis sponte vomens, et sequente  
 insuper die ructus putridos sentiens, d. 19. lene  
 denuo vomitorium cum levamine sumsit, id quod  
 etiam d. 16. maji eandem fere ob causam eodem-  
 que cum successu repetebatur. Levissimos d. 22.  
 aprilis et d. 19. maji insultus, solo manuum tre-  
 more, oculorumque motu perverso brevissime  
 transeuntes, d. 20. maji paulo fortior cum subse-  
 quente salivatione mediocri sat diu continuante, et  
 d. 21. maji levis iterum insultus excepit. Die 29.  
 aprilis sequentibusque, alvum consueto laxiorem,  
 d. 4. et 5. junii levissimum capitis dolorem, et die





14. crebros urinam mittendi stimulos sentiens, d. 16. junii epilepsiam, ex signis imminentem, leni vomitorio illico sumto, feliciter avertere potuit, ad hunc usque diem, ab epilepsia liber, egregie valens.

9) M. E. R. k) ante et post menstruorum fluxum, d. 11. januarii 1770. cessantem, epilepsiae paroxysmis aliquoties sat vehementer correpta, die 13. januarii belladonna uti coepit, cujus ad d. 13. maji drachmas novem cum dimidia sensim deglutivit. Die 14. et 19. januarii bis levissimis accessibus afflicta, d. 20. januarii ventris dolorem obtusum, levissimam diarrhoeam, vertiginem, et aurium fufurros, d. 21. continuantes, nec non venti cujusdam, ex aure sinistra, explosionem sensit. Diebus 22. 24. 27. 29. januarii d. 1. 2. 6. nec non, durante catameniorum fluxu, d. 8. et 9. vt et d. 16-18. et 24. februarii levissimis insultibus tentata, d. 17. 20. et 26. februarii, ter leni vomitorio sumto, magnam bilis et pituitae copiam evomit. Cum vero ex eo tempore ad d. 13. maji, quo menstrua quartum regulariter accedebant, nullam fere morbi allevationem perspicerem, e continuan-

l) Eadem, quae l. cit. p. 289. no. 27.prehenditur.



tinuantium numero exclusa, ad hunc usque diem, in eodem propemodum, quo antea fuit, statu obambulat.

10) A. R. a stramonii extracto 1) superiori anno allevata, mense octobri ab epilepsia denuo, quolibet die aliquoties, sat vehementer corripiebatur; etsi igitur paroxysmorum vehementia frequentiaque, mense novembri, quodammodo remiserat, raro tamen noctem sine insultibus quibusdam, et interdum sat vehementibus, transigere poterat. Haec a d. 4. decembris 1769. usque ad d. 4. aprilis 1770. belladonnae sensim parum supra drachinas decem deglutiens, d. 8. et 9. decembris ructus, dieque 12. sequentibusque mediocrem sudorem, et d. 17. decembris meliorem ciborum adpetitum sensit. Sudore a d. 20. decembris sensim imminuto, die 30. sitis increvit, cum decrescente ciborum adpetentia, dieque 31. somno consueto diutius indulgit. Sudore hinc mediocri, cum siti, semper continuantibus, d. 16. januarii vehementissimo epilepsiae paroxysmo correpta, dieque 23. et 24. januarii perparum degustans, parumque sudans, de capitis dolore conquesta est; d. 25. januarii vero victu

T t 2

rursus

1) Vid. loc. cit. pag. 281. no. 22.





rursus egregie delectabatur. Die 4. 5. et 11. februarii quolibet die vehementem epilepsiae paroxysmum sustinens, dieque 20. februarii valde iterum sitiens, ad d. 26. februarii quotidie levioribus quibusdam insultibus tentata, d. 27. sequentibusque, longe copiosiore sudore adficiebatur. Post vehementem d. 4. martii epilepsiae paroxysmum, et raucitatem d. 6. martii brevi transeuntem, ob crebriores a d. 11 - 14. martii epilepsiae insultus, lene emeticum, magno cum levamine propinatum, d. 20. martii, eandem ob causam, pari cum successu, repetebatur. Cum vero leviores insultus ex eo tempore crebrius reverterentur, illaque d. 3. aprilis, post meridiem et vesperi, epilepsia bis quam vehementissime corriperebatur, postero die e continuantium numero exclusa, tandem in eundem, quo antea fuerat, statum relapsa est.

II) I. G. B. qui anno aetatis tertio ab ictu fortiore oculi sinistri usum visumque penitus amiserat, puer, stipem mendicans, ab alio, spiritu frumenti fortissimo, summe inebriatus, ab epilepsia primum quam vehementissime convulsus est. Adolescens autem, decimum sextum annum agens, in aedibus nostris, eadem saepius, praesertim nocte, et quam diutissime, quolibet sexto vel octavo die vehementer,



ter, cum insequente notabili, per tempus quoddam, stoliditate, vexatus, d. 4. decembris 1769. ejusmodi paroxysmo bis laboraverat, cum illa ipsa vespera belladonna uti inciperet, cujus ad d. 21. martii drachmas decem cum scrupulis duobus deglutivit. Die 12. et 13. decembris leves tantum insultus, frigori febrili similes, cum pectoris dolore punctorio, et majore stupiditate conjuncti, observabantur. Hinc, post levem d. 18. decembris diarrhoeam, parum sudavit, bene cibos adpetiit, multumque urinae dimisit. Sudore hinc parum aucto, d. 22. decembris mentis serenitas rediit, die 26. vero, post leviolem, frigori febrili similem, insultum, per dimidiam horam amens cubiculum pererravit, dein, perseverante modico sudore, mentis magis compos, a d. 20. januarii ad d. 2. februarii, quo denuo ejusmodi horrore corripiebatur, bene valuit. Die 5. februarii levi diarrhoea, brevi desinente, laboravit. A d. 27. februarii autem, post ejusmodi horrorem, aliquamdiu iterum, et d. 2. nec non d. 6. martii per plures horas prorsus amens relictus, d. 7. ventris torminibus, brevi tamen cessantibus, adflictus, nondum prorsus respuerat, cum d. 12. martii epilepsia rursus vehementer corriperetur. Granis igitur quinque radicis ipe-





cacuanhae, d. 13. martii deglutitis, quinquies vomuit, et quater alvum deposuit cum levamine; a d. 15. martii autem epilepsia fere quotidie semel consueto vehementius vexatus, belladonnae loco aliis remediis adjuvabatur. Quamvis igitur lene vomitorium, ob biliosos vomitus, d. 24. et 29. martii sua sponte ortos, d. 30. propinatum, septies insuper, pituitam viscidam viridescentem, evacuavit, nihilominus tamen, tam epilepsiae paroxyfmi, quam mentis stupiditas, in dies increverunt. Die 3. aprilis tam capite, quam toto reliquo corpore, in sinistrum latus inclinatus, et sinistrorsum quasi et retrorsum tractus, conspiciebatur, vix incedere, corpusque sustentare, nec quidquam cernere, valens: pupilla enim oculi dextri maxime dilatata, exiguum sese contrahendi facultatem retinuerat. Facies saepenumero pallidissima, momento citius rubore suffusa, frontem calidam, et genas frigidas exhibuit. Toto sinistro latere, et praesertim brachio crureque, prorsus paralytici, crus dextrum, durantibus epilepsiae paroxyfmiis, in dies non minus vehementia, quam frequentia incrementibus, semper, cum oris angulo dextro extrorsum trahebatur, cum interea stupidissimus ciborum nihil adpeteret. Die 23. aprilis brachium dextrum cum  
crure

crure dextro paralyticum erat, pollicibus contra manus pedisque sinistri in epilepsiae paroxysmis convulsis. Postero die jam melius res visu discernere poterat, pupilla facilius se contrahente. A d. 25. aprilis autem usque ad d. 12. maji epilepsia quotidie creberrime, vehementissimeque et interdum vel tricies correptus, postea ad d. 1. junii ab epilepsia prorsus vacuus, visu optimo, et pro corporis imbecillitate, membrorum omnium vigore, et mentis quoque alacritate praeditus, optime valuit, postea, quam a d. 1. aprilis usque ad d. 12. maji quadringentos et sexaginta cujusvis generis epilepsiae paroxysmos sustinuerat.


12) F. K. epileptico - maniacus triginta trium annorum m), qui post quatuordecim dierum inducias, d. 3. decembris 1769. sex vehementes, nocte proxima, duos ejusmodi, et d. 4. decembris binos debiliores, epilepsiae paroxysmos sustinuerat ita, ut, sub cujuslibet initio, caput cum thorace antrorsum versus pedes, quasi in glomerem contraheretur, antequam in artuum convulsionibus terminarentur, a d. 4. decembris ad d. 11. maji belladonnae propemodum undecim drachmas sensim deglutivit.

T. t 4

Ad

m) vid. loc. cit. p. 317. no. 39.






Ad d. 9. decembris quotidie ter vel quater epilepsia vehementer correptus, fere prorsus nihil comedit. Die 9. et 10. decembris ab epilepsia liber, faciem creberrime pugnis contundens, d. 11. ex octo diebus primum aliquid gustare incipit, obambulat, ineptit, faciemque interdum adhuc alapis ferit. Die 13. denuo furibundus se aliosque pugnis caedens, nihil degustans, urinam largiter dimittens, multumque bibens, nasum, quoad tactum, frigidissimum habebat, cuius apex non nisi d. 20. decembris naturalem sensum calorem induebat; furor autem sequentibus diebus adeo increvit, ut vinculis illum vinciri oporteret. Nocte, inter 15. et 16. decembris media, bis epilepsia vehementer correptus, postea primum insigniter sudavit, furore plus minus ad d. 3. januarii permanente. Interea cibos optime adpetiit et per vices plus minus sudavit, alvo quotidie rite aperta, multaue secedente urina. Die 29. et 31. decembris levissimi insultus, artuum tantum extensione, oculorum distorsione et vocis crispatione, brevissime transeuntes, observabantur. Die 5. januarii iusto calidior parum comedit, medio autem januarii pacatissimus vix fatiari potuit. Die 25. januarii semel vehementer, a d. 27-30. januarii vero, magna cum alvi constipatione, quotidie

tidie epilepsia aliquoties quam vehementissime correptus, et e lecto excussus est: insimul vehementer sitiit, vomiturivitque. Unicum vomitum sat fortem, ipacacuanha d. 30. januarii sumpta, somnus altissimus, cum alvo naturaliter aperta, insequebatur. Insigniter stupidus, d. 1. februarii post paslum semper tussire coactus, sitim potu vix extinguere potuit. A d. 7. februarii quoque post prandium quotidie vehementer incaluit toto corpore, inprimis tamen capite, adeo, ut facies interdum ruberrima appareret. Calor iste ruborque faciei post paslum die 5. februarii sensim decrescens, d. 8. februarii illum prorsus dereliquit ita, ut mentis compos et affabilis ad ea, quae interrogabatur, satis apte responderet. Bene valens, libere obambulans, mentisque in dies magis compos factus d. 19. februarii sacrae coenae quam devotissime interfuit, id quod antea in nostra domo semper recusaverat. A d. 25. ad 27. februarii quotidie semel, et d. 28. ter ab epilepsia vehementer distentus, debilitatusque, d. 3. martii jam ineptire incipiens, d. 4. ad meridiem usque dormivit. Die 8. martii sub finem cuiuslibet duorum epilepsiae paroxysmorum, vomitione, et frontis sudore largo, per horae quadrantem, vexabatur. Ipecacuanhae scrupulus illico





propinatus nec nauseam, nec vomitum, sed binas tantum alvi evacuationes praestitit, insequente denovo vehemente paroxysmo epileptico. Die 9. martii vehementissimo ejusmodi tres horae partes durante, et hinc usque ad d. 17. martii quotidie bis, ter, vel quater quam vehementissime distentus, et plerumque ructibus et vomituritionibus, cum ventris torminibus, alvi constipatione et copiosiore urinae fluxu vexatus, d. 18. martii demum alvum rite exonerare potuit; amentia tamen usque ad finem martii plus minus manente. Hinc bene valuit usque ad d. 12. aprilis, quo ad d. 15. aprilis quotidie semel vel bis, mentis tamen egregie compos, epilepsia correptus est. A d. 18. ad d. 27. aprilis per intervalla brevina ineptiens, hinc biduo bene valens, d. 30. aprilis demum ab epilepsia quotidie, cum stupiditate quadam et sopore, aliquoties vehementer distentus, fere nihil ciborum adpetens, et dies noctesque dormiens, d. 11. maji ab ulteriore belladonnae usu arcebatur, jam in eodem, quo, ante coeptam hanc curationem, flatu, vitam transfigens.

13) G. H. viginti octo annorum, anno aetatis vicesimo tertio melancholico - maniacus factus, postea etiam in epilepsiam quotidianam fere, et  
unico

unico saepius die aliquoties incidit. Furiosissimus per intervalla a vinculis saepenumero se ipsum liberans, persuasissimum habet, se genium quendam album videre, qui senis parvi statura saepius compareat, ipsumque continuo ad caedem, incendiumque incitet. Sat robustus juvenis, a scabiei, sub finem anni 1768. et initium 1769. diuturna praesentia, temporariam tantum, parvamque admodum, furoris imminutionem sentiens, a d. 4. decembris 1769. ad d. 15. maji 1770. belladonnae sensum drachmas undecim deglutivit. Die 7. decembris parum, sequentibus vero longe magis sudare coepit, adeo, ut indusium etiam d. 12. decembris maculis fuscis exinde conspurcaretur, de reliquo satis pacatus. Die 13. decembris urinae largius profluvium, una cum copioso sudore animadvertebatur, aegro inter haec, cum ciborum appetitu majore, alvoque solito laxiore, paulo magis ineptiente, d. 23. decembris vero consueto longe alacriore. Sudore hinc sensim imminuto, d. 9. januarii post meridiem tumor in gena sinistra prope nasum oculumque ortus, d. 11. cum calore crescens, d. 13. et 14. januarii dissipabatur, sudore interea iterum aucto. Epilepsiae paroxyfmi a d. 20. januarii paulo frequentiores d. 24. singulari ratione





ratione immutabantur. Eorundem enim loco, linguam tantum modo, quousque poterat, exseruit, variasque alias abominandas faciei gesticulationes saepius iteravit, quibus tandem poppyfinata et vomituritiones iungebantur. Lene emeticum d. 29. januarii post varios ejusmodi, et vehementem epilepsiae verae paroxysmum, cum magna praecordiorum anxietate, crebrisque vomituritionibus, propinatum, tantum ipsi levamen attulit, ut a d. 2. ad 10. februarii fere prorsus cessarent. De novo autem d. 10. et 12. exorientes tam gesticulationes, quam poppyfinata, idem emeticum d. 13. februarii sumtum, imminuit quidem, d. 20. februarii vero epileptici insultus una cum sudore denuo augebantur, et a d. 5. ad d. 16. martii epilepsiae paroxysmi una cum gesticulationibus adeo incresebant, ut d. 5. martii praesertim oscitans, et ad faciei livorem usque vomituriens, altera manu supra caput elevata, altera abdomen, quantum poterat, saepe fortiterque impetens, concuteret. Vomitoriorum d. 6. 9. et 12. martii parva dosi exhibitorum duo posteriora, nullum vomitum ciendo, aliquoties tantum alvum abundanter exonerarunt. Die 16. martii denuo in gena sinistra prope nasum oculumque, tumor fat insignis, durus, et parotis dextra duriuscula et tumida

comparuit, cum epilepticorum insultuum insigni levamine; ambo autem tumores d. 20. martii jam decrecentes, die sequenti prorsus evanuerant. Iidem postea tumores, iisdem locis, eodemque cum eventu, a d. 5. ad d. 7. aprilis conspiciebantur, id quod etiam, post vomitus quosdam spontaneos d. 21. maji tertium factum est, posteaquam d. 15. maji jam e continuantium numero, ob morbi pertinaciam, penitus exclusus, intra hos 163 dies centum et quadraginta, paroxysmos cujusvis epilepsiae generis sustinuerat.

14) D. E. Z. stramonii extracto egregie allevata n), scabie sicca, cum majore epilepsiae decremento, mense octobri 1769. laboraverat, qua, novembri extremo, vix secedente, nocte inter d. 4. et 5. decembris media, eadem iterum bis vehementer, et per plures horas corripiebatur, et ex eo tempore ad d. 15. maji 1770. drachmas undecim belladonnae sensim deglutivit. Postero die levissimas adhuc musculorum, artus, oculosque moventium, contractiones sentiens, hinc alacris optime valuit. A d. 16. decembris qualibet nocte vehementer sudans, magnum d. 19. capitis calorem, d. 20.

n) vid. l. c. pag. 299. no. 31.





d. 20. menstrua; et praegressos, nocte inter d. 22. et 23. decembris media, artuum spasmos, singultus dimidiam horam durans, cum reminiscētia absente, et vehementi sudore, exceperunt; quem menstruorum cessatio illico insequēbatur. Post leviores artuum spasmos, d. 25. decembris et d. 4. januarii nocturno tempore cum reminiscētia integra brevi transeuntes, mane praesertim sitire, plurimum mingere, oculorumque hebetudinem sentire coepit; levisque diarrhoea d. 5. cum borborygmis accedens, ad d. 8. januarii usque permanfit. Die 9. januarii e lecto surgens, ceu ebria hinc inde vacillavit, vertiginem d. 11. januarii larga narium haemorrhagia solvit, brevemque horrorem d. 13. nocte proxima largus menstruorum fluxus, d. 15. januarii cessans, excepit. Fluentibus autem iisdem, magna praecordiorum anxietate, et d. 19. januarii post iram singultu, per dimidiam horam, cum alternante finisiri brachii, dextrique cruris convulsione adfligebatur, quem vehemens sitis, magnusque capitis calor ruborque insecutus est. Idem calor ruborque a d. 26. circa meridiem quotidie faciem, totumque caput subito, cum insigni oculorum hebetudine, et vehemente siti, per integram horam, occupans, sumto demum d. 31. januarii leni emetico,

tico, cessavit. Leves d. 5. et 6. februarii artuum tremores, nocte proxima largus pectoris sudor, huncque d. 7. fluxus menstruus, non nisi oscitationibus, nocturno tempore d. 9. februarii horam durantibus, frigoreque dorsum decurrente, molestus, dieque 11. februarii cum ventris torminibus, et fat vehemente, brevi autem desinente, diarrhoea cessans, insecutus est, artubus interim agillimis, levissimisque existentibus. Illucescente d. 18. februarii, dextri brachii dolores, rheumaticis similes, hinc formicationis sensum, et sequente die spasmos ejusdem brachii percepit, quos lene emeticum, d. 20. februarii sumtum, sustulit; postero autem die mane revertentes artuum spasmi et singultus, nauseam cum ciborum adpetitu debili et levi diarrhoea reliquerunt, quam d. 26. februarii rhabarbarum cum paucis sale amaro, alvum novies evacuando, illico sedavit. Summam d. 4. martii circa meridiem, ortam praecordiorum anxietatem menstrua demum, sequenti mane ad d. 10. martii largiter profluentia, prorsus dissiparunt; revertentem vero, d. 13. martii circa prandium et coenam, praecordiorum anxietatem, cum insigni capitis calore, faciei rubore, et oris amaritie, horam integram durantem, lene emeticum d. 14. martii circa meridiem sumtum,





sumtum, insigniter allevavit. Mediocre d. 15. martii capitis calorem, ventriculi pressionem et dolorem totius corporis obtusum, sequente nocte spasmi brachiorum tantum, cum reminiscencia exultante trium horarum spatium durantes, atque hos ventris tormina, cum fluore albo, exceperunt. Hoc d. 20. martii vix cessante, faciei calor ruborque cum magna siti redeunt d. 23. illam lassam, anxiamque cum levioribus artuum spasminis reliquit; nauseam quoque cum ciborum adpetitu depravato d. 28. accedentem, nec vomitus spontanei d. 29. orti, nec lene vomitorium illico sumtum, nec epilepsiae paroxysmus sat gravis, d. 31. martii intempesta nocte quinque horas durans, penitus sustulerunt. Menstruorum etiam tempore d. 2. aprilis insigniter sitiens d. 4. prandii tempore copiosam pituitam sponte evomit. Die 7. aprilis de artuum spasminis, d. 11. fornicationis sensu; et d. 13. post singultum, levesque capitis et artuum convulsiones, de nausea denuo et lassitudine conquesta, d. 22. diarrhoea sat gravi cum vomituritione et ventriculi pressione ad d. 24. aprilis correpta est, quas d. 25. menstrua largissime ad d. 28. aprilis promanantia exceperunt. Alternanti hinc capitis calori cum diarrhoea d. 10. maji magna denuo capitis conquassatio,



quassatio, cum spumefcente ore et reminiscencia cessante, supervenit; dieque 14. maji post alvum segniorem, cum ventris inflatione, caput iterum incaluit, eaque, ex belladonnae usu nequaquam allevata, in eodem jam alternante valetudinis statu permanfit.

15) M. E. L. stramonii extracto o) quodammodo allevata, quae ex eo tempore raro graviores paroxysmos, sed ut plurimum leviores tantum sentiens, quorum accessu, ut d. 23. januarii 1770. vacillans, amictum solvere exuereque tentaverat, a d. 23. januarii ad d. 4. junii belladonnae sensim drachmas undecim cum dimidia deglutivit. Post levem ejusmodi d. 26. januarii accessionem, de capitis dolore caloreque conquerens, largiter sudare coepit. Die 3. et 6. februarii levissimo insultu afflicta et d. 5. vehementer sudans, d. 6. de vertigine ructibusque conquerebatur. Licet igitur lene emeticum, d. 8. februarii sumtum, sex vomitus cum levamine cievisset, d. 10. tamen levissimum et d. 14. februarii admodum vehementem epilepsiae paroxysmum experta est. Ejusmodi quoque  
gravem

o) loc. cit. pag. 333. no. 46.





gravem epilepsiae paroxysmum die 2. martii praesentem nocte proxima menstrua, a medio januarii retardata, exceperunt, quae, levissima d. 6. martii accessio et sequente die binae paulo fortiores, cum capitis dolore, insequiebantur. Rhetumaticos dorsi dolores, die 14. martii praesentes, venae-sectio, proximo die instituta, abstulit. De oculorum hebetudine conquerens, d. 18. et 28. martii circa meridiem duos paulo fortiores epilepsiae paroxysmos, d. 24. et 29. martii autem levissimas tantum accessiones, dieque 1. aprilis vehementem sudorem experta est. Menstrua a d. 7. ad 10. aprilis rite promanarunt. Post levissimum d. 14. aprilis insultum, de capitis obnubilatione per breve tempus, d. 15. aprilis cum parva vertigine revertente, conquerens, d. 18. 20. et 27. aprilis levissimas accessiones sensit et a d. 29. aprilis rixosa, d. 2. maji iratior facta, parum ineptiit. Levissimas itidem d. 5. 16. et 21. maji accessiones, somnolentiae tantum similes, die 25. maji menstrua ad d. 29. maji exceperunt, inter quae d. 28. post prandium epilepsia mediocriter accessit, id quod etiam d. 31. maji post iram rixamque factum est, ex eo tempore vero ad d. 20. junii bene valuit.



16) C. L. qui epilepsia nequaquam, ut anno abhinc mentis impos p) retulerat, a terrore anno 1763. incusso, sed, ut d. 21. maji 1770, mentis optime compos, ipse uberius explicavit, jam puer, sextum annum agens, ab ala molae pneumaticae capite adeo graviter laesus, ut mortuo similis in paternam domum reportaretur, primum correptus, ex eo tempore eadem interdium saepius, plerumque tamen noctu, quotannis vehementiore facta, absque ullo tamen furore, laboraverat, donec bello nuperiore finito, summo etiam furore affligeretur; d. 4. decembris 1769. e quatuordecim diebus et a furore et epilepsia liber, de dentium dolore tantum, carie exesorum, conquerebatur, cum belladonna, cujus ad d. 4. junii 1770. drachmas tredecim consumsit, uti inciperet. Gena sinistra proxima nocte intumescente, varia quidem incongrua, pro more suo, protulit, nequaquam tamen, licet d. 5. et 6. decembris bis epilepsia vehementer corriperetur, insaniit, adpetitu ciborum sequentibus diebus vario, siti autem plerumque majore existente. A die 13. decembris sequentibusque magnam urinae copiam dimittens, vesperi sesqui grano pulveris foliorum

Uu 2

bella-

p) loc. cit. pag. 311. no. 36.





belladonnae deglutito, sponte vomuit, nihil fere degustavit, largiter sudavit, dieque 16. decembris crebrius vomens, largiterque sudans, de torminibus circa umbilicum conquestus est. Sumto igitur d. 17. decembris sale amaro, bis insuper vomuit, saepiusque alvum deposuit, hinc admodum pacatus bene dormivit; quidpiam vero d. 18. decembris degustans, levi iterum nausea adficiebatur, quam, una cum ponderis ventriculi sensu, diarrhoea, proxima nocte sponte orta, penitus sustulit. A d. 20. ad 22. decembris mediocriter insaniens, medicinam respuens nihilque comedens, post levem d. 23. decembris insultum, vel decies insuper ab epilepsia quam vehementissime correptus, languescens; d. 25. decembris vero, parum sudans, admodum pacatus, beneque valens conspiciebatur. Die 3. et 5. januarii noctu somnians, varia quidem absurda protulit, interdiu autem adeo bene valuit, ut etiam alios maniacos verborum delinimentis pacatiores reddere conaretur. A d. 10. ad 23. januarii per intervalla ipse garriens ineptiensque, tunc demum pacatior, somno ut plurimum sepultus, multumque bibens, sequentibus diebus cantilenas sacras, clara fere semper voce, praelegit. Die 29. januarii pilulam repudiens, taciturnus, circa meri-

meridiem levi epilepsiae insultu, magna cum praecordiorum anxietate, magnoque cum capitis calore correptus, capillos modo evellens, modo flocculos, plumasque e lecto decerpens, conspiciebatur; brevi autem ad se rediens multumque bibens, bene dormivit, adpetiitque. Die 8. et 10. februarii per breve tempus paululum garriit, a d. 13. - 18. februarii vehementer infaniit, die 16. et 20. februarii levissimum epilepsiae paroxysmum sustinuit, quo cessante, mentis usum, cum bono ciborum adpetitu recepit, licet post pilulae deglutitionem matutino tempore, ut reliquorum plurimi, jam aliquamdiu pallefceret. Die 26. et 27. martii parum garriens, d. 28. et 30. martii levissimos epilepsiae insultus experiebatur, quorum posteriorem summa taciturnitas, plenariaque a cibo et potu abstinencia cum pulsu debili et justo frequentiore, exceperunt; die 4. autem aprilis sitis vehementiam potulentis vix exstinguere potuit. Die 5. aprilis iterum garriens, d. 6. demum parum degustare coepit, d. 7. aprilis jam longe pacatior. Post duos d. 8. aprilis levissimos epilepsiae insultus, mentis magis compos, optimo ciborum adpetitu gavifus est. Die 20. et 21. aprilis parum garriens, d. 22. sat vehementi epilepsiae paroxysmo correptus, sequente





tempore perbene valuit. Die 11. 20. et 21 maji, post levissimam, somnolentiae tantum similem accessionem, ad labores ipsi antea consuetos, sponte rediit, id quod antehac in aedibus nostris, ab ipso nunquam obtineri potuerat. Die 4. junii vero mediocrem epilepsiae insultum, summo mane vehementissimus, aliusque ejusmodi paroxysmus d. 11. junii insequabatur, donec d. 15. junii denuo obmutescens, medicamenta omnia una cum victu potuque sat diu pertinacissime respueret.

17) M. S. epileptico-maniaca ex stramonii usu per breve admodum tempus allevata q), a d. 25. decembris parva quotidie epilepsiae accessione, lypothymiae haud absimili, aliquoties correpta, paulo post, abdomine denudato, genitalia manibus titillando, subito in furorem acta, contubernales pugnis caedere atque mordere, idemque d. 31. decembris summo mane longe furiosior repetere tentaverat, cum illa ipsa vespera belladonna uti inciperet, cujus ad d. 4. junii drachmas quatuordecim et amplius sensim deglutivit. Die 2. et 3. januarii levioribus tantum spasmodicis afflicta, de oculorum caligine, dimidiam circiter horam post deglutitum pulverem foliorum belladonnae durante, conquerebatur,

q) l. c. pag. 320. no. 41.

rebatur, quae d. 4. et 5. januarii, imminuta licet  
dosi, ad coecitatem fere temporariam aucta, una  
cum capitis dolore, menstruis a d. 6. ad d. 12. januarii  
rite promanantibus, penitus evanescebat. Die 13 et 14  
levissimas accessiones, d. 15. vero fortiolem sentiens,  
d. 16. januarii post leviolem, duobus vehementissi-  
mis epilepsiae paroxysmis, quibus veluti lapis ri-  
gescebat, correpta, superatis iisdem in cachinnos  
effusa cantavit, omniaque, quousque manibus per-  
tingere poterat, palpavit et d. 17. januarii levissi-  
mam tantum accessionem experta est. A d. 15.  
januarii autem denuo de oculorum hebetudine, tres  
horas manente, conquerebatur. Post vehementem  
d. 27. januarii epilepsiae paroxysmum cum magno  
clamore, sine ullo tamen furore, a d. 28 januarii ad  
d. 1 februarii quotidie longe mitior ejusmodi; d. 3. et  
4. februarii post leviolem vehementior cum ejulatu,  
et rerum propin quarum palpatione; d. 5. 8. 9. et  
10. februarii autem quotidie levissima tantum ac-  
cessio observabatur. Membrorum vero lassitudi-  
nem d. 5. februarii cum ventris dolore, ciborum  
adpetitu imminuto et oculorum caligine, men-  
strua a d. 10. ad d. 14. februarii exceperunt. Re-  
diens ciborum adpetitus depravatio cum ructibus,  
sumto d. 20. februarii leni emetico, facile quidem





cessabat, levissimi autem insultus a d. 19 ad 27 februarii quotidie revertebantur. Die 5. martii exiguum capitis dolorem, d. 10. vehementem paroxysmum cum furore et d. 12. martii lenissimum experta est. Post catameniorum vero a d. 17. ad 21. martii fluxum, usque ad horum d. 16. aprilis reditum, non nisi oclies levissimos insultus, brachii dextri tantum spasms absolutos, dicque 21. aprilis lenissimos pedum spasmos percepit. Die 24. et 27. aprilis levissima lipothymiae simili accessione afflicta et d. 29. aprilis de magna oculorum hebetudine conquerens, pupillas valde dilatatas habebat, quae dilatatio vero, una cum visus hebetudine, dosi pulveris foliorum belladonnae a granis duobus ad sesqui granum imminuta, d. 5. maji jam prorsus evanuerat. Sic quoque post lenissimas, d. 10. 12. et 13. maji lipothymiae similes accessiones, d. 15. ad 21. maji, menstrua rite promanarunt. Inter haec d. 17. et 21. maji levissimis tantum dextri brachii spasms afflicta, mentis jam optime compos bene valet, cum raro adhuc lenissimis ejusmodi insultibus adficiatur.

18) G. E. R. qui, epilepsia primum anno 1757 a terrore contracta, cui postmodum mania et interdum fat vehemens jungebatur, in ejusmodi paroxysmo

roxyfmo mendicum, d. 4. octobris 1766. mala fortuna ipsi obvenientem, interfecerat, ideoque exeunte septembri anni 1769. duos et triginta annos natus huic delatus erat, in aedibus nostris, sexto quoque vel octavo die, epilepsia, cum subsequente mania, biduum vel triduum durante, laboravit. Hic a d. 4. decembris ad d. 1. maji belladonnae sensum drachmas quatuordecim cum femisse deglutiens, d. 6. et 7. decembris post vehementia ventris tormina, quolibet die bis alvum laxam deposuit, id quod etiam d. 17. 18. 20. et 27. decembris factum est. Die 12. et 13. decembris bis epilepsia vehementer correptus, valde sudans, hoc die, pro more suo nihil degustavit. Die 15. de pectoris dolore punctorio, brevi transeunte, d. 19. de crebriore urinam mittendi necessitate et d. 25. decembris de vehemente capitis dolore conquerens, d. 27. post levem, fortemque epilepsiae paroxysmum, largum denuo sudorem expertus est. Hinc bene valuit usque ad d. 7. januarii, quo circa vespere de lumborum dolore et abdominis pressione, ac si lapis intus haereret, conquerebatur. Sal amarum d. 8. januarii sumtum, ter alvum fortiter laxando, pressionem abdominis et lumborum dolores quidem abstulit, iidem vero postea vicissim modo caput,





modo dorsum, ad d. 20. januarii plus minus occupantes, non nisi d. 21. prorsus evanuerunt. Die 3. februarii duobus lenissimis, brevissimisque epilepsiae paroxysmis, cum subsequente largo sudore, et adpetitu ciborum amisso d. 5. februarii lene emeticum cum levamine sumfit. Die 6. fera vespera, ob meditationem, ut praedicabat, necessariam, e lecto surgens, vestimenta induens, in cubiculo per octavam horae partem obambulavit, seque iterum cantando exuens, ad dormiendum quiete composuit. Die 15. levi brevique praetereunte vertigine et d. 20. capitis dolore vexatus, d. 21. februarii ter sponte vomuit. Lene emeticum illico exhibitum quater insuper vomendo copiosam bilem cum pituita evacuavit; manentem vero d. 22. februarii capitis dolorem cum corporis calore, temperantia data brevi sedarunt. Post lenem denuo d. 5. et 6. martii diarrhoeam, rixosus, a d. 9. ad 11. martii de insigni oculorum hebetudine conquerens, nocte proxima, ob majorem animi pervicaciam, loris vinctus ineptire, aliosque mordere tentavit, d. 14. martii autem jam penitus resipuit. Die 19. et 20. martii duo lenissimi brevissimique epilepsiae insultus, illum, praeter consuetudinem bene adpetentem, reliquerunt. Ab ineunte aprili de oculorum hebe-

hebetudine, manuum, pedumque levi spafino, capitis obnubilatione et membrorum lassitudine per vices conquerens, d. 9. aprilis levem epilepsiae insultum, proximaque nocte binos fortiores paroxysmos, cum adpetitu denuo depravato, experiebatur. Venaesectionem d. 11. aprilis institutam, infania ad d. 18 dieque 19. aprilis vehemens epilepsiae paroxysmus insecutus est. Die 30. aprilis vero, post binos nocte praecedente mediocres epilepsiae paroxysmos, per dies quosdam adeo infaniit, ut totius generis humani salvatorem se praedicans, omnem medelam penitus repudiaret, nunc jam in eodem, quo ante coeptam curationem fuerat, statu obambulans.

19) Nobilis, e generosa stirpe oriundus juvenis, qui ex stramonii usu r) quolibet sexto, octavo et, quam diutissime, decimo quarto die aliquoties et nocturno tempore d. 25. decembris quinquies vehementer, cum adpetitu ciborum insigniter depravato, convulsus erat, a d. 26. decembris ad d. 14. maji 1770. pulveris foliorum belladonnae drachmas quatuordecim cum scrupulis duobus, sensim deglutivit. Bene dormiens, bonoque ciborum adpetitu gaudens, a d. 28. decembris ad d. 1. januarii quotidie

r) vid. loc. cit. pag. 287. no. 26.





quotidie et praesertim nocturno tempore duos vel tres et interdum sat vehementes epilepsiae insultus experiebatur, cum leni quadam diarrhoea. Die 29. decembris sequentibusque saepius pituitam excreans, d. 30, ab hora quinta pomeridiana post levissimum epilepsiae insultum ad septimam matutinam sequentis diei continuo dormivit, evigilans autem et vehementer sitiens, sequenti die ad d. 3. januarii usque cum copiosiore urina, largiter sudavit. Ex eo tempore de insigni oculorum hebetudine, per vices revertente, conquerens, alvum quotidie ter, quater, vel quinquies consueto laxiorem deposuit et, superatis d. 15. januarii tribus levioribus epilepsiae insultibus cum quatuor vehementissimis, magnam pituitae copiam sponte evomit; aequalis autem leni emetico sumto, insuper evacuabatur. Subitum d. 31. januarii faciei pallorem debilis epilepsiae paroxysmus, proximaque nocte alius ejusmodi insequabatur. Licet igitur parva ipecacuanhae dosis d. 2. februarii largas de novo tam superius, quam inferius evacuationes praestiterat, die tamen 3. februarii novem insuper leves insultus cum vehemente epilepsiae paroxysmo experiebatur. Orta hinc a d. 19. februarii per quosdam dies parva salivatione, paulo post insignem,  
d. 25.

d. 25. februarii in templo ortum subitum horrorem, cum magna tam capitis, quam oculorum obnubilatione, tota facies, cum oculorum rubedine quadam, nonnihil inflata, minutissimisque irregularibus maculis atro-rubris, praesertim in fronte, repleta conspiciebatur, quibus circa vesperam cum nausea tres leviores epilepsiae insultus accessere. Leni emetico d. 26. februarii cum levamine sumto (id quod eandem ob rationem, similique cum effectu, d. 18. 22. martii, d. 1. aprilis et d. 2. maji repetebatur) d. 27. februarii jam pectus et d. 28. femora etiam ejusmodi maculis obscure rubris scatebant. Febris inter haec expers, pro lubitu obambulans, de reliquo bene valuit, cum ex eo tempore leviores et levissimi tantum insultus ad d. 7. aprilis animadverterentur. Die 16. aprilis de lumborum dolore cum levi diarrhoea, brevi cessante, conquerens, d. 27. et 29. aprilis post meridiem in templo levem horrorem cum levissima oculorum obnubilatione experiebatur. Cum vero ab ineunte majore epilepsiae paroxysmi tam frequentia, quam vehementia denuo crescerent, d. 15. maji e continuantium numero exclusus, jam in eodem, ut ante coeptam curationem, statu versatur.





20) E. C. K. s) pulveris foliorum belladonnae  
a d. 31. decembris 1769. ad d. 3. junii 1770.  
drachmas quindecim sensum deglutiens, statim bene  
exinde dormivit, urinam largiter dimisit, men-  
struaque d. 3. januarii sine ullo incommodo rite ex-  
perta est, quorum fluxus d. 6. januarii post levissi-  
mam accessionem cessabat. Ejusmodi leviores  
etiam epilepsiae insultus d. 8. 18. et 21. januarii re-  
vertebantur. Die 13. de oculorum hebetudine per  
aliquot horas conquerens, die 29. januarii men-  
strua denuo ad d. 2. februarii promanantia experieba-  
tur, inter quae d. 1. februarii summo mane vehe-  
mentem paroxysmum, circa meridiem longe mi-  
tiores, cum imminuto ciborum appetitu sustinuit.  
Lene emeticum, d. 4. februarii sumtum, impedire  
non poterat, quin epilepsiae paroxysmi hoc mense  
crebrius vehementiusque illam invaderent. Hi a  
d. 6. ad 8. februarii cum vertigine conjuncti erant,  
cui d. 10. februarii leve delirium, brevi praeteriens,  
accedebat. Die 27. februarii de ventris torminibus  
conquesta, d. 28. post meridiem tumorem gingiva-  
rum dextri lateris, cum febricula et frigoris quo-  
dam sensu, vehementer dolentem percepit, quem  
d. 1.

s) vid. loc. cit. p. 327. no. 44.

d. 1. martii duo lenissimi insultus et d. 3. martii menstrua, d. 6. demum, cum epilepsiae brevi, ast forti paroxysmo cessantia, exceperunt. Die 8. martii remittens gingivarum dolor coxendicem sinistram occupaverat ita, ut vix sine claudicatione incedere posset, die 11. autem omnis dolor evanuerat. Post levem d. 12. martii insultum cum labris longa saliva manantibus, grana quinque ipecacuanhae d. 14. martii propinata, tres largissimos vomitus cum levamine cievere. Diebus 17. 18. 21. et 26. martii levissima accessio observabatur. Promanantibus a d. 31. martii ad d. 4. aprilis menstruis, d. 2. et 3. lenissimis, d. 13. et 14. aprilis levi et fortiori accessioni obnoxia, d. 15. et 16. aprilis post mediocrem ejusmodi, doloribus rursus genae dextrae, coxendicis sinistrae et lumborum vexabatur ita, ut vix, ab aliis sustentata, incedere posset. His autem d. 18. aprilis imminutis, levem iterum dentium stridorem, brachiique dextri spasnum sustinuit, qualis etiam d. 20. aprilis revertebatur. Et ex eo tempore, menstruis licet a d. 1. ad 3. maji, nec non a d. 3. ad 8. junii rite promanantibus, non nisi rarius levissimis accessionibus tentata, ad hunc usque diem sat bene valet.





21) G. F. R. qui post stramonii usum t) per intervalla adhuc plus minus delirans, sexto quoque, octavo, vel decimo quarto die unum vel plures epilepsiae paroxysmos, dieque 2. atque 3. decembris 1769. vehementes ejusmodi expertus erat, a d. 4. decembris usque ad d. 4. junii 1770. belladonnae uncias duas cum drachma dimidia sensim deglutivit. Vehementer exinde noctibus sudans d. 6. decembris somniando delirans „omnia domi „combusta, sibi que necessario domum revertendum „esse „ clamavit. Loris autem vinctus illico conquiescens, iisdem statim solutus pacatissimus reperiebatur. Interea ciborum adpetitu bono, corporisque et mentis alacritate gaudens, qualibet nocte vehementer sudare perrexit. Die 13. decembris majorem quoque urinae copiam excernere, atque in dies mentis magis compos fieri coepit. Die 18. decembris frequentibusque sudoris vehementia paulo imminuebatur. Sub finem decembris initiumque mensis martii domum denuo reversurus, facile ad priorem mentis quietem reducebatur. Die 8. januarii sequentibusque copiosam rursus urinam excrevit. Lene emeticum d. 4. februarii et d. 14. martii  
tanto

t) loc. cit. pag. 318. no. 40.

tanto cum levamine ipsi propinabatur, ut ab omni delirio prorsus immunis, toto hoc semestri temporis spatio non nisi novem paulo insignioribus epilepsiae paroxysmis, una cum viginti quinque levissimis accessionibus corriperetur, iisdemque, absoluta jam curatione, longe debilioribus factis, rarissime adficeretur.

22) I. E. S. v) quae a terrore, anno aetatis decimo sexto ipsi, bene valenti, menstruorum tempore, incusso, primum in lipothymias, sensum vehementiores, hinc in epilepsiam, eamque tandem cum furore conjunctam, inciderat, a d. 15. decembris 1769. quotidie binis vel trinis solito vehementioribus epilepsiae verae paroxysmis correpta, interdum plurimum; nocte vero perparum dormiens, insaniensque, menstruis, d. 23. decembris cessantibus, rite defuncta, a d. 24. decembris ad d. 31. maji pulveris foliorum belladonnae drachmas fere septemdecim et pilularum scrupulos duos sensum deglutivit. Proxima nocte largiter sudans, crebroque urinam dimittens, d. 28. cum adpetitu ciborum et somno moderatiore, parum, d. 30. vero, cum auctiore ciborum adpetitu, largius sudavit. Binas

d. 31.

v) Eadem, quae l. c. pag. 329. no. 45. invenitur.

X x





d. 31. decembris levissimas, lypothymicas quasi accessiones, menstrua d. 1. ad d. 4. januarii exceperunt. Haec a d. 4. januarii vehemens fitis, crebra mingendi necessitas, largiorque sudor insequebantur. Post lenissimum d. 13. januarii matutino tempore insultum, per totum diem ridendo, cantando et circumjacentia palpando, insaniit, quae insania demum fera vespera vehementi epilepsiae paroxysmo terminabatur. Die 27. januarii coenae tempore subito in furorem acta, circa undecimam horam praecinctorii redimiculo se ipsam, ad livorem faciei usque, strangulans, contubernales exoravit, ut, cum ipsi hac vice necessario moriendum sit, protinus interficerent, medicinam respuit, excrementa omnia ubicunque locorum dimisit, et ad sequentem usque diem insaniit. Post meridiem vero levissimum epilepsiae insultum menstrua, consopito omni furore, rite exceperunt, d. 2. februarii cum vehementi epilepsiae paroxysmo cessantia. Nocte inter 30. et 31. januarii media, quam vehementissime sudavit, crebroque urinam dimisit, ipecacuanha d. 4. februarii data, unicum tantum vomitum cievit. Die 13. februarii mediocriter insaniens, ad d. 19. qualibet nocte vehementem epilepsiae paroxysmum experiebatur, quorum loco d. 20. et d. 21. manuum pedum-



pedumque leves tantum spasmi observabantur. Hos d. 27. februarii menstrua, d. 1. martii cessantia, statim insequiebantur, quibus d. 28 februarii noctu bini levissimi insultus accedebant, manuum tantum supra caput complosione, et vehementi at brevissima tussi, suffocationem minitante, absoluti. Eadem manuum complosio, cum capitis in utramque partem levi conquassatione, et labris longa saliva manantibus, d. 4. et 5. martii observabatur. Die 8. martii prandii tempore, subito iterum vehemente tussi correpta, copiosissima sputa viscida, magno cum levamine (mentis enim magis compos facta, jam prae-teritorum recte reminisci, et ad quaesita apte respondere potuit) produxit, quae d. 9. et 10. martii, minore vehementia, sequentibus autem diebus, per vices tantum apparuit. Qualibet nocte d. 11. et 12. martii duobus vehementibus paroxysmis cum spuma sanguinea, ex ore nasoque propendente, meroque sanguine, e nare dextra exsillante, correpta, sumtis d. 13. martii granis quinque ipecacuanhae, quin-ques insigni cum levamine, magnam pituitae copiam cum bile evomuit, alvumque aliquoties laxam deposuit. Ab ineunte d. 18. martii ad meridiem usque vehementes dentium stridores, et capitis conquassationes cum spuma sanguinea, saepius expe-  
Xx 2 riebatur,





riebatur, revertente autem d. 19. martii eodem  
stridore cum larga spuma, ovum putre redolente,  
ippecacuanhae parva dosis, d. 20. martii, duos vomit-  
us, ita promovit, ut mentis optime compos, jam  
paroxysmi epileptici initium cum signis, illum prae-  
cedentibus, accurate indicaret, quod antea nullo  
modo praestare potuerat. Vehemens illa tussis,  
epilepticorum insultuum tempore exorients, cum  
diuturna copiosaque, et interdum uberrima, aquoso  
pituitosorum exscreatione, d. 23. 28. 30. 31. martii  
et d. 1. 5. et 8. aprilis, revertebatur. Menstrua  
a d. 31. martii ad d. 3. aprilis; item a d. 20-24.  
aprilis; nec non a d. 19-21. maji rite promana-  
runt. Lene emeticum d. 4. et 30. aprilis propina-  
tum, insignem iterum pituitae copiam cum leva-  
mine evacuavit. Die 7. aprilis vehementissimum  
epilepsiae paroxysmum ad faciei livorem usque  
sustinuit. Die 12. et 25. aprilis a media nocte  
garriens, interdum denuo adstantes exoravit, ut  
ipsam interficerent; hinc autem longe pacatior,  
d. 14. et 15. maji paroxysmorum epilepticorum  
loco, dextrum tantum brachium supra caput in-  
scienter elevavit. Leves has brachii dextri capitis-  
que a d. 20. ad d. 26. maji, concussiones, postea  
ad d. 2. junii, vehementiores factas, lene emeti-  
cum

cum rursus quidem imminuit, attamen aegra sensum fere in eundem, quo ante hanc curationem fuerat, statum recidit.

23) C. A. B. x) a d. 16. decembris 1769. quotidie bis tam interdiu, quam nocte, epilepsia sat vehementer correptus, asthmaticus, crassescens, mirumque vorax, ob lumborum et coxendicum quemdam dolorem, vix pedibus incedere poterat, cum d. 24. decembris pulvere foliorum belladonnae uti inciperet, cujus ad d. 31. maji drachmas septemdecim cum dimidia, pilularum vero scrupulos duos cum dimidio, consumsit. Hinc tranquille dormiens, modiceque sudans, d. 26. et 27. decembris levibus spasmodis tentatus, sequentibus diebus paulo melius pedibus incedere poterat, cum dolor ille, lumbos antea et coxendices occupans, jam pedis articulum obsideret, et post dies quosdam prorsus evanesceret. Die 29. decembris et 2. januarii alvus consueto laxior, cum levamine in dies magis conspicuo; dieque 5. januarii sequentibusque magna oculorum hebetudo observabatur, quae vero, imminuta belladonnae dosi, brevi cessabat. Post levem d. 8. et 15. januarii insultum, horrore tantum febrili similem, obtusum semper dorsi et lumborum

Xx 3

quen-

x) vid. loc. cit. pag. 309. no. 35.





quendam dolorem percepit; die 18. januarii seqq. magnam urinae copiam, quoad tactum hoc tempore semper frigidus, dimisit, adpetitu ciborum inter haec insigniter aucto. Sat vehementem d. 26. januarii epilepsiae paroxysmam perpeffus, sequenti die paulo difficilius pedibus incedens; dieque 3. februarii post leviozem ejusmodi, nauseam quandam percipiens, d. 4. februarii lene emeticum, die 15. martii repetitum, magno cum levamine sumfit. Duos vehementes d. 17. februarii epilepsiae paroxysmos, vehemens statim dorsi crurumque dolor, cum difficiliore incessu, molestaque corporis anteriora versus inclinatione, insequabatur, die 27. februarii post vehementem ejusmodi paroxysmum magis aucta, cui gravis quoque auditus superveniebat. Die 3. martii oculorum hebetudo revertens, postero die jam rursus imminuta, et brevi dissipata erat. Ceterum hoc mense, duos tantum lenissimos, cum vehementiore epilepsiae paroxysmo, perpeffus, bene valuit. Sinistri brachii vero gravitas, die 29. martii accedens, venae sectione, et sudore largo, proxima nocte sponte orto, prorsus evanuit. Sic quoque post parvam d. 1. aprilis deglutiendi difficultatem, brevi dissipatam, optime valuit. Post levem vero die 12. et 17. aprilis epilepsiae accessionem, denuo

denuo per quosdam dies, de axillae sinistrae, lumborum et pedum doloribus, conquerens, ciborum ingurgitationi semper nimium indulgit. A die 20. maji vero ad d. 1. junii crebrius iterum in epilepsiam incidens, jam in eodem fere, quo ante hanc curationem, statu, vix fatiandus, obambulat.

Ex omnibus igitur facile perspicimus, belladonnae pulverem, pilulasque, nec plura, nec graviora, symptomata, excitasse, quam infusum ejus aquosum, ab aliis, medicaminis loco, propinatum. Parva dosis tentaminis initio.

Praeter placidum et reficientem somnum, quo aliqui (no. 19. 20. 23.) jam primis diebus, longe plures autem sequenti tempore, fruebantur, nihil fere mutare videbatur. Et licet pauci (no. 7. 10. 12. 16. 19.) ex continuato ejus usu, semel iterumque, in somnum paulo diuturniorem inciderent, neminem tamen, sumta quoque largiore belladonnae dosi, somnolentum y) torpidumque conspexi; sed potius feminam (no. 22.), somno alias plus justo indulgentem, vigilantiores, alacrioremque reddidit.

Xx 4

Sic

y) vid. THEOD. GERH. TIMMERMANN Periculum Medic.  
Belladonnae &c. Rintelii 1765. 4. pag. 25.





Sic quoque nullus, belladonna utentium, tentaminis initio, de aucto corporis calore z) conquerebatur, nisi forsitan is, qui (no. 21.) secunda nocte jam insigniter sudans, tertia somniando „omnia domi combusta esse“ vociferabatur, corpore nimis incaluerit. Nec unquam in aegrorum examine, horis antimeridianis, pulsum debilem, celeremque a), ab aliis saepius adnotatum, nisi in iis, animadvertere potui, qui (no. 7. 11. 16.) mense martio et aprili, animo dejecto torpidi lecto adfixi tenebantur; postea vero, et in his, et in reliquis omnibus, ut plurimum naturalem, plenum, tardum, fortemque apprehendi.

Iterata vero sensimque aucta dosis, haud ita multo post, et

Urinae crebrius, largiusque profluvium quamplurimis (no. 1. 4-8. 11-14. 16. 18-23.); et

Sudoris quoque, plus minus largioris, eruptionem, variis (no. 6. 10-16. 18. 19. 21-23.), sat diu interdum permanentem, excitavit; e quibus etiam

z) vid. THOM. GATAKER Observat. on the Internal Use of the Nightshade. To which is added a Supplem. The fourth Edition 1757. 8. maj. pag. 37.

a) vid. Comment. de reb. in scient. natural. et medic. gestis. Volum. IV. P. II. pag. 264.

etiam femina (no. 14.), post artuum tremores, largum pectoris solius; epileptico maniaci (no. 11. 12.) vero aliquamdiu, frontis tantum, sudorem perceperunt.

Has tandem excretiones proxime excepit, vel etiam interdum antecessit, alvi notabilis quaedam laxitas (no. 1. 3. 8. 13. 18. 19. 23.), et subinde per totum curationis decursum conspicua, vel etiam levis quaedam diarrhoea (no. 1. 6. 9. 11. 14. 16. 18. 19.), brevi plerumque transiens; quae tamen, licet semel tantum (no. 14.), cum capitis calore, aliquamdiu alternabat. Alvi constipatione autem factis notabili, bini tantum (no. 12. 14.) per quosdam dies laborarunt, cum reliqui alvum ut plurimum naturaliter apertam quotidie haberent.

Ciborum appetitus interea, utut varius, ut plurimum tamen, egregie viguit. Plures quidem (no. 1. 4. 10. 12. 14. 17. 18. 20.) ad breve tempus imminutum, vel depravatum; et pauciores (no. 11. 16.) aliquamdiu prorsus deletum, perceperunt; alii vero interdum etiam insigniter aucto fruebantur.

De oris amaritie paucissimi (no. 8. 14.) tantum; de nausea vero, vomitionibus, ructibusque plures (no. 2. 3. 6. 8. 10. 12. 17. 19. 23.) conquerebantur;





bantur; nonnulli (no. 1. 4. 5. 8. 11. 14. 16. 18.) etiam vomitus spontaneos, et plerumque pituitosos, experti sunt, e quibus adolescens (no. 11.) solus, jam a belladonnae usu remotus, bis tantum pituitam viridescentem sponte vomuerat.

Leviora quoque, inter belladonnae usum, ventris tormina haud pauci (no. 1. 3. 4. 6. 8. 11. 12. 14. 16. 18. 20.) perceperunt; inter quos epileptico maniacus (no. 18.) de ventriculi pressione, proinde ac si lapis intus haereret; et puella (no. 9.) de obtuso tantum ventris dolore conquerebantur.

De parva oris siccitate, plures saepius adficien-  
te, juvenis (no. 8.) inprimis conquestus est. Alii autem sitim (no. 1. 5. 10. 12. 14. 16. 19. 22.), et interdum sat intensam, sentiebant, inter quos (no. 12. et 16.) praecipui sunt. De saliva viscida, palato et faucibus b) subinde copiosius adglutinata, juvenis (no. 4.) solummodo conquerens, cum aliis etiam (no. 3. 8. 19.) salivationem quandam, plus minus conspicuam, neque tamen ultra modum auctam, expertus est. Idem quoque (no. 4.) cum adolescente (no. 23.) deglutationem aliquamdiu parum

b) vid. Comment. de reb. in sc. nat. et med. gestis Vol. XI.  
Part. II. pag. 259.

parum impeditam sensit, dum femina (no. 10. de raucitate, et puella (no. 6.) de faucium dolore, paulo post ventrem occupante lenique diarrhoea soluto, conquerebantur.

Paucis ex belladonnae usu caput doluit. Si enim illos, quibus (no. 4. 8.) dolor iste jam dudum familiaris fuerat, excipiamus, non nisi quatuor (no. 10. 15. 17. 18.) restant, quibus iste aliquamdiu molestus fuit. Plures autem levi tantum brevique transeunte vertigine (no. 1 - 3. 9. 14. 15. 18. 20.) adficiebantur. Quidam (no. 15. 18. 19.) capitis obnubilationem senserunt, inter quos femina (no. 14.) brevi tempore temulenta conspiciebatur. Auditus gravitas adolescentis (no. 23.) auriumque susurri puellae (no. 9.) cum ventorum ex aure sinistra explosione, procul dubio huc etiam referri debent.

Oculis autem perplures aegrotarunt. Praeter juvenem enim (no. 1.) de oculorum ardore; et virginem (no. 5.), de oculorum pressione, ut ab inspersis arenulis, conquerentes; bini quoque (no. 1. 4.) oculorum dolorem; totidemque (no. 3. 19.) oculorum rubedinem quamdam sentiebant. Longe plures autem, matutino praesertim tempore, de insigni oculorum hebetudine, cum notabili pupillae dila-





dilatatione (no. 1 - 3. 5. 8. 14. 15. 17-20. 23.), plus minus diu manente, conquerebantur; dum adolescens (no. 11.) post belladonnae usum, vera demum caecitate, per tres septimanas, laboravit. Nullus tamen horum omnium visus quoddam vitium retinuit.

Belladonnae usus omnes fere, inprimis tamen (no. 2. 5. 7. 11. 16. 19.), tentaminis initio, jam pallidos facie reddidit. Plures quoque frigoris atque horroris sensum, vel epilepticorum insultuum loco (no. 1. 11. 23.), vel alia occasione (no. 14. 19. 20.) ceperunt. Inter quos viri (no. 12.) diuturna nasi frigiditas; adolescentis (no. 11.) genarum frigus, cum frons esset calida aliusque (no. 23.) totius corporis, quoad tactum, frigiditas, inprimis notari merentur.

Caloribus autem volaticis, pauci tantum (no. 1. 12. 18.), et quidem, praeter juvenem (no. 1.) belladonnae usui jam dudum adsueta, adficiebantur. Febricula autem non nisi feminae (no. 3. et 20), brevi tempore; et quidem illa, cum subsequente faciei erysipelatoso, haec autem, cum dolente gingivarum tumore, laborarunt. Cum vero complures alii, et in aedibus nostris, et in oppido ac circumjacentibus pagis eodem tempore, belladonna neutiquam utentes, iisdem faciei tumoribus



ribus laborarent, huic remedio, nec hos, nec febriculam adscribere licet.

Faciei autem rubori, quem Cl. TIMMERMANN c), quod ego sciam, primus observavit, quemque femina (no. 14.) jam e stramonii usu d) aliquoties experta erat, tres tantum, quos supra commemoravimus (no. 11. 12. 14.) aegrorum, obnoxii fuerunt. Hoc phaenomenon autem nequaquam tentaminis initio, sed belladonnae usu jam diu protracto (no. 12. 14.), et ab adolescente (no. 11.) jam dudum intermisso, comparuit. An vero disparentem faciei ruborem fornicationis sensus exceperit, id ideo certo adfirmare non possum, quia feminae (no. 14.) idem sensus jam dudum familiaris fuerat, reliqui autem (no. 11. 12.) tunc temporis sensationes suas verbis indicare nesciebant. Majorem vero istam mulieris (no. 3.), ut et minorem illam juvenis (no. 19.) faciei rubedinem, cum inflatione quadam conjunctam, prioribus vix adjungere licet, cum semel tantum, et a peculiari causa, tam ortae, quam dissipatae videantur.

Sic

c) vid. loc. not. y. citat. pag. 24.

d) Advers. Med. Pr. Vol. I. P. II. pag. 302.






Sic quoque belladonnae usus, nullum ab initio curationis anxium e) reddidit, nisi forsitan epileptico maniacum (no. 21.) huc referre velimus. Postea vero quatuor aegros in tantas (no. 13. 14. 16. 22.) praecordiorum anxietates coniecit, ut, cum nescirent, quorsum aufugerent, in suum corpus saevirent, vitaeque finem conarentur quovis modo accelerare. Respiratio tamen caeterum libera permansit, nec ullus praeter juvenem (no. 4.) de paulo difficiliore, ipsi alias non inconsueta, per aliquot dies conquestus est.

Menstrua, ex hujus remedii usu, parum mutata deprehendimus. Feminae enim (no. 2. 5. 9. 20.) regulari catameniorum fluxu, per totam curationem, gavisae sunt. Quibusdam (no. 6. 15. 17. 22.) menstrua quidem, et plerumque cum insigni morbi augmento, plus minus tardabantur, sed eo largiora quoque postea promanabant; cum aliae (no. 3. 14. 22.) eadem plerumque justo citiora, et priores (no. 3. 14.) largiora quoque, experirentur; et posteriores etiam (no. 14. 22.), licet aetate proveciores, narium haemorrhagia plus minus allevarentur.

Bella-

e) TIMMERMANN loc. cit. pag. 10. et 14.



Belladonnae effectibus forsan etiam, cum alii similia observaverint, adscribendi videntur dolores illi rheumatici,

- 1) lateris (no. 3. 8.)
- 2) pectoris punctorii (no. 11. 18.)
- 3) brachii et scapularum (no. 8. 14. 23.),
- 4) lumborum et coxendicum (no. 3. 15. 18-20. 23.), ut et

5) ab his derivanda incessus f) difficultas (no. 20. 23.), quam tamen adolescens (no. 23.) ex stramonii g) usu jam contraxerat. Quorsum etiam paralyfin temporariam adolescentis (no. 11.) juvenisque (no. 13.), belladonnae usu jam dudum intermisso, modo hanc, modo illam partem aliquamdiu occupantem, jure referendam censeo.

Cum scabies puellae (no. 6.), tentaminis initio jam erumpens, belladonnae usui vix adscribenda videatur; aliis dijudicandum relinquo, num maculae istae obscure rubentes minimae, planae, irregulares, angulosae, et nequaquam supra cuticulam elevatae, juvenis (no. 19.) post subitum horrorem in templo ortae; nec non pustula feminae (no. 15.)  
prope

f) Commentar. de reb. cet. loc. not. b) citato.

g) loc. cit. pag. 310. seq.





prope unguem digiti indicis manus dextrae, d. 23. aprilis, orta h), pro magnitudinis ratione magnam feri acris copiam fundens, et paucorum dierum spatio penitus sanata, effectus hujus remedii haberi possint?

Utut vero res se habeat, belladonna tamen inflammatoriam quandam dispositionem humoribus nostris vix inducere i) videtur. Sanguis quidem, juvenis absentis (no. 8.), ut ab aliis audiveram, tenui crusta inflammatoria obductus, dicebatur, mihi ipsi vero ejusmodi crustam in nullo alio, belladonna utente, conspiciere licuit. Sanguis potius quatuor juvenum virorum, (no. 4. 12. 13. 19.), qui in flore aetatis erant, durante belladonnae usu, e vena emissus, post quarundam horarum, in loco frigido, quietem, obscurioris paulo coloris k), magna supernatantis feri copia praeditus, nec satis coagulatus; et in reliquis plerisque (no. 1 - 3. 5. 9. 14. 15. 17. 18. 20 - 23.) egregie rubicundus, iusta feri  
copia

h) Journal de Medecine &c. Tom. XIV. Janvier 1761. pag. 19.

i) vid. Ill. de HAEN Rationem Medendi Pars II. Vindobon. 1757. pag. 45. et seq.

k) cf. TIMMERMAN loc. cit. pag. 29.



copia instructus, densus, fanissimusque conspici-  
batur. Sic quoque vulnere capitis colliso, et ad  
cranium usque inciso, feminae (no. 3.), ut et fe-  
mori dextro adolescentis (no. 11.) die 4. aprilis,  
bulliente fervidissima cerevisia longe lateque adusto,  
nec solito majorem inflammationem, nec copiosio-  
rem suppurationem excitavit. Prius enim die 10.  
maji, et posterius d. 28. aprilis, penitus sanata  
erant.

Haec omnia autem satis evincunt, belladon-  
nam notabili sopiendi, nec forsitan minore resol-  
vendi vi, et insigni acrimonia praeditam esse, qui-  
bus humores, continuato usu, quodammodo reso-  
lutos, partim versus colatoria se- et excretoria  
majore copia allicit, partim vero versus supe-  
riora potissimum propellit; et, dum nervos ca-  
pitis, et alimentorum canalis, peculiari ratione  
adgreditur, hinc spasmos, illinc vero atonias  
variarum partium temporarias, et interdum sat diu  
relinquit.

Sic enim, si ipsam epilepsiam spectes, varias  
exinde mutationes ortas esse perspicimus. Capitis  
in utramque partem conquassationes (no. 5. 6. 14.  
22.); singultus duarum (no. 6. 14.) feminarum;  
oscitationes crebrae (no. 14.) creberrimaeque, et





interdum ad livorem (no. 13.) faciei usque; una cum tussi, accessionum epilepticarum tempore, convulsiva, sicca (no. 6. 12. 22.), et interdum cum uberrima pituitae excreatione (no. 22.) conjuncta, merito huc referri debent. Majorem vero attentionem merentur, paroxysmorum epilepticorum mutationes ipsae (no. 1. 5. 11. 13. 15 - 17. 22.); quorsum, eorundem loco tremor artuum (no. 1. 14.) tantum, spasmi extremorum, tam superiorum (no. 6. 14. 17. 18. 20. 22.) quam inferiorum, et interdum adeo leves, pertinent, ut, cum plenaria mentis praesentia (no. 6.) conjuncti, epilepticis accessionibus veris ne adnumerari quidem possint.

Ut autem constitui possit, quid hujus remedii usus, in epilepsia habituali, boni, et mali, praestiterit, optimum esse duxi, septemdecim aegrorum, qui, extracto stramonii anno superiori usi erant, diversa utriusque curationis tempora, cum paroxysmorum epilepticorum, tam fortiorum, quam leviorum numero, collecta, in tabulam conjicere. Ex qua

## Belladonna.

## Stramonium.

## Paroxysmor.

## Paroxysmor.

| Histor. | Aegror.<br>Numer. | Curation.<br>Dies. | fortior. | levior. | Summ. | Curation.<br>Dies. | fortior. | levior. | Summ. |
|---------|-------------------|--------------------|----------|---------|-------|--------------------|----------|---------|-------|
|         | 2                 | 73                 | 21       | 36      | 57    | 97                 | 6        | 72      | 78    |
|         | 3                 | 113                | 16       | 21      | 37    | 94                 | 11       | 10      | 21    |
|         | 5                 | 99                 | 25       | 35      | 60    | 91                 | 23       | 18      | 41    |
|         | 6                 | 120                | 8        | 65      | 73    | 106                | 10       | 31      | 41    |
|         | 7                 | 151                | 2        | 19      | 21    | 100                | 15       | =       | 15    |
|         | 9                 | 120                | 4        | 57      | 61    | 95                 | 15       | 59      | 74    |
|         | 10                | 121                | 12       | 39      | 51    | 66                 | 7        | 8       | 15    |
|         | 12                | 158                | 90       | 13      | 103   | 62                 | 12       | 6       | 18    |
|         | 14                | 162                | 3        | 6       | 9     | 142                | 4        | 6       | 10    |
|         | 15                | 133                | 7        | 21      | 28    | 142                | 6        | 5       | 11    |
|         | 16                | 182                | 14       | 12      | 26    | 50                 | 22       | =       | 22    |
|         | 17                | 156                | 8        | 47      | 55    | 108                | 5        | 29      | 34    |
|         | 19                | 139                | 23       | 46      | 69    | 90                 | 11       | 33      | 44    |
|         | 20                | 156                | 9        | 35      | 44    | 131                | 16       | 23      | 39    |
|         | 21                | 182                | 9        | 25      | 34    | 94                 | 13       | 3       | 16    |
|         | 22                | 158                | 33       | 67      | 100   | 120                | 16       | 26      | 42    |
|         | 23                | 158                | 10       | 16      | 26    | 127                | 8        | 7       | 15    |

patescit, aegros sub (no. 2. 3. 5. 12. 15. 17. et 22.)  
 respectu epilepsiae nullam allevationem, sed potius  
 morbi, ratione vehementiae, vel frequentiae, vel  
 utriusque, augmentum quoddam; aegrum (no. 19.)





ratione vehementiae paroxysmorum, notabile augmentum; (no. 6. 10. 21. et 23.) vero majus minusve morbi augmentum, ratione frequentiae paroxysmorum, ex belladonnae usu percepisse. Aegros contra (no. 6. 10. et 21.), ratione vehementiae; et (no. 7. 9. 14. 16. et 20.) tam ratione frequentiae, quam vehementiae, plus minus, allevatos esse.

Cum plerique horum aegrorum, ab epilepsiae diuturnitate, mente insimul jam insigniter debilitata, vel prorsus alienata laborarent, quosdam interdum loquaciores (no. 6.) factos, ejulasse (no. 17.), sine ratione risisse (no. 5. 17. 22.), cantasse (no. 17. 18. 22.), plus minusve delirasse (no. 4. 5. 11. 15. 16. 13. 20.), vel prorsus furiosos (no. 4. 12. 17. 18.) factos esse, nemo forsan mirabitur. Quodsi vero flocculorum lectio, cum capillorum evulsione (no. 16.); saevities, quam aliqui (no. 12. 13.) in suam faciem, vel abdomen, pugnis exercuerunt; stupidi-que adolescentis (no. 11.) amentia, quemdam magis terrerent: ex praecedentibus tamen patet, haec omnia temporaria tantum fuisse, aliosque contra summe furiosos (no. 7. 12. 16. 17. 20 - 22.) hujus remedii beneficio, mentis magis compotes factos, liberio-

liberiores rationis usum, partim ad hunc usque diem, retinuisse.


Molesta autem haec, aliaque, inter belladonnae usum, subinde orta symptomata, ut v. c. capitis obnubilationes, vertigines, oculorum caligines, faciei rubores, tussis, anxietates cet. imminuta dosi, brevi plerumque, cessant, utpote qua istorum reditus optime praecaveri potest. Ea vero, quae belladonnae usu jam intermisso, interdum, licet rarius, comparere solent, ut v. c. caecitas, paralyxis, et creberrimi, quamquam leviores, variarum partium, cum mentis plenaria alienatione, spasmi, per roborantia cardiacis nupta, optime, felicissimeque fugata sunt. Generatim vero, minor belladonnae dosis, in quolibet tentamine suadenda, nec sine ratione cito nimis augenda erit. Licet enim Cl. GATAKER 1) consilium, secunda qualibet, vel tertia demum nocte, unum vel duo grana belladonnae propinandi, in hujusmodi indomabilibus morbis, utique nec sufficiens, nec satis efficax videtur; magnam tamen, mense februario et martio imprimis, exhibitam dosin, brevi iterum imminui, ita, ut postea rarius cuiquam, plus quam tria, vel ad

Y y 3

sum.

1) loc. cit. pag. 74. seq.





suminum quatuor grana, viginti quatuor horarum spatio exhiberem, quae mihi etiam, pro cujuslibet aegri morbique conditione, satis superque esse videntur.

Quamvis igitur belladonnae usus nullum ex iis aegris, quorum modo mentionem fecimus, a morbo prorsus liberavit, allevatio tamen, haud raro satis conspicua, quam nonnullis, non solum in imminuenda epilepsia habituali, sed etiam in mitiganda tollendaque mentis alienatione, praestitit, sperare jubet.

Parvam hujus remedii dosin, ejusmodi aegris, tuto, et cum levamine, exhiberi posse.



## IV.

## Tractatio de doloribus ad spinam dorsi.

Cogitanti mihi de gibberositate, ceu morbosa spinæ dorsi distorsione, cum aliarum quoque partium corporis humani perverso situ conjuncta, nonnulla de aliis quoque hujus spinæ affectionibus morboris præcipue de spasmodis et doloribus, ad eam ortis, simul in mentem venerunt, omnibusque recte pensatis, ad universam hanc doctrinam accurate pertractandam id maxime pertinere cognovi, ut, antequam commentationem de gibberositate jam delineatam ulterius elaborarem, hanc de doloribus, ad spinam dorsi ortis, præmitterem, quod præter considerationem fabricæ spinæ dorsi, variæ gibberositatis causæ ex hoc dolorum examine plenius intelliguntur. In hac autem doctrina tradenda ita versabor, ut mechanismo spinæ dorsi in universum considerato, non nulla de colicis, febrilibus, aliisque doloribus symptomaticis, ad lumbos præcipue natis, præmittam, dein vero ad idiopathicos magis dolores sive spasmodicos totius spinæ tensiones progrediar, quæ in sanis sæpe hominibus post immoderatos corporis natus oriuntur et ut plurimum ad luxationes et subluxationes vertebrarum referuntur,





revera tamen ex flatulentis, ligamentosis et musculosis tensionibus declarari et possunt et debent. Quibus omnibus in causis et symptomatibus indeque petitis signis consideratis, ad extremum nonnulla auxilia et remedia in doloribus his obortis adhibenda recensebo et dijudicabo.

Univerſa ſpina dorsi ex oſſe ſacro cum oſſis coccygis appendice et ſerie viginti quatuor vertebrarum compoſita, oſſibus coxarum ita inſigitur, ut a mobilibus extremitatibus inferioribus, quibus inferior trunci pars inſiſtit, feratur, ſuſum vero extenſa columnam referat, cui abdomen et thorax cum viſceribus contentis et extremitates ſuperiores anneſtuntur. Ipſum vero caput primae vertebrae impoſitum non ſolum ſuſtinetur, ſed pariter atque dorſum et humeri oneribus ferendis idoneum redditur.

Spina dorsi vero in ſtatu ſano et erecto corporis ſitu recta eſt, ita ut a ſummo vertice per mediam corporum vertebrarum et oſſis ſacri partem linea perpendicularis duci poſſit, ea tamen propter commodam corporis flexionem et motum ab anteriori et poſteriori parte varie ſeſtitur. Superior enim pars oſſis ſacri baſin aequalem ſiſtit, a qua corpora vertebrarum lumbarium non nihil antrorſum,



sum, et, ad dorsi vertebrae ascendendo non nihil retrorsum cedunt, et moderata hac curvitate in dorsi vertebrae continuata in progressu ad vertebrae colli antrorsum, in his ultimis tamen non nihil retrorsum vel recta magis vertuntur et ascendunt. Pro vario igitur cubantis, sedentis et erecti hominis situ columna vertebralis mobilitatem admittit, quae directionem principem parum mutat. Longe autem major mobilitas in ea conspicitur, si in motibus variis antrorsum, retrorsum et ad latera valide inflectitur, et non solum in partibus suis varie torquetur, sed etiam super extremitates inferiores in acetabulo ossium coxarum articulas cum basi trunci diverse movetur.

Haec spinae dorsi mobilitas non tantum per plurimas partes, ex quibus ea componitur, sed maxime ex nexu corporum vertebrarum, per interposita strata cartilagineo-ligamentosa summe elastica, efficitur, quippe quae in motibus variis compressioni cedunt et modice iterum resistunt, interdum etiam compressa noctu iterum extenduntur, inprimis si hominis cubantis situs extensus restituendo elateri fibrarum faveat, et pandiculatio matutina, praeter alia commoda, quae in motu musculari affert, elaterem cartilaginum intervertebraliū






etiam juvat, et ex hac quoque parte vigorem corporis instaurationat.

Minime vero sufficeret ordinata et successive versus superiora decrescens corporum vertebrarum magnitudo ad firmitatem spinæ conciliandam, in ea enim aestimanda processus, ad annulum quasi retrorsum adhaerentem affixi, magis attendendi sunt. Etsi enim transverforum et spinosorum usus in ligamentorum et musculorum adhaesionibus præcipue cernitur, in his tamen, sed in articularibus potissimum, firmitas quoque ex nexu et situ partium columnæ vertebralis cognoscitur. Processus nimirum articulares in lumbis utrinque se magis complectuntur, et nimias ad latera distorsiones coercent; in thorace vero imbricatum se invicem magis tegunt, et flexum antrorsum et retrorsum per annexas thoraci costas non nihil limitatum, in variis incurvationibus et extensionibus corporis egregie moderantur; in collo autem plane contigua et quodammodo declivia referunt, accedentibus aliis adminiculis, firmata.

Haec spinæ dorfi fabrica ad mobilitatem et firmitatem egregie conservandam accommodata vel ex ossium exsiccatorum figura satis declaratur, si tantummodo in vero ordine et situ sibi invicem coordinentur. Sed major accedit firmitatis vis in  
liga-



ligamentis et mobilitatis praestantia in musculis, quibus profecto auxiliis in validis etiam corporis motibus ossa conjuncta parum tantum, et rarissime vel nunquam ex vero suo situ plane removentur. Quamquam vero omnia, quae de ligamentis et musculis ab exercitatissimis anatomicis proposita sunt, longius repetere et enarrare, hujus tractationis ratio non patitur, nonnulla tamen, quae hanc doctrinam omnino illustrent, summatim modo indicare, instituto huic nostro consentaneum existimo.

Ad ligamenta itaque quod attinet, ea tantum repetam, quae sunt ad corporum vertebrarum firmitatem conciliandam composita. Cartilagines enim ligamentosae inter corpora vertebrarum posita, quae ligamenta intervertebralia appellantur \*) in exteriori et anteriori corporum vertebrarum ambitu strata fibrarum tendinearum, oblique se invicem decussantia, ab una ad alteram vertebam deferuntur, ex quibus interiora ad majorem obliquitatem accedunt, et circularia magis videntur, sub quibus tandem, quasi in centro fibrarum circularium massa gelatinoso-mucosa plus minus densata haeret. Attendendum quoque est ligamentum commune

\*) Confer. IOSIAE WEITBRECHT Syndesmologia p. 103  
seqq. Tab. XII.





mune anterius omnium vertebrarum \*) quod in anteriori spinae dorſi parte deſcendit, et ibi tenuius eſt, ubi major inflexio columnae vertebrabilis fieri ſolet. Eſſi itaque in lumbis tendines, a cruribus diaphragmatis dimiſſi, accedunt, in illis tamen ſtratum anterius ſive fascia longitudinalis anterior tenuior eſt. Huic quidem alia et poſterior accedit fascia ſive ligamentum commune poſterius, quod hic accurate conſiderare nil attinet.

Quemadmodum autem in maſſa cartilagineo ligamentofa vel fere gelatinofa ligamentorum intervertebraliſum, tanquam in molli matrice, corpora vertebrarum, nucleorum inſtar, haerent, in iis creſcunt, et ſubinde ad aliquam planitiem deferuntur, ſic etiam in marginem non nihil acutum et eminentem exſurgunt majorem in iis, qui corpora in adoleſcente aetate valide exercent, minorem in deſidi vitae genere detentis. Ex qua re etiam exoſtoſes, in ſpina dorſi enatae et a nobis impoſſe- rum examinandae, accuratius declarari poterunt.

Quoniam vero thorax et abdomen non ſolum, ſed etiam artus ſuperiores et tandem inoles capitis ipſa ſpinam antrorſum ducunt, et in naturali etiam ſtatu et erecto alias ſitu non nihil inclinant,  
muſculi,

\*) l. c. pag. 96. ſeqq. Tab. X.



musculi, qui spinam extendunt et retinent, adeo validi sunt, ut non solum molem viscerum et reliquas partes annexas, sed et accessoriam onerum gerendorum et movendorum molem sustineant et levant. Surgit enim ex posteriori parte ossis sacri et coxis conjunctis massa carnosae variis stratis ad vertebrae et collum usque, et lateraliter ad costas retrorsum flexas, annexa, qua spina dorsi regitur, et non tantum in erecto situ retinetur, verum etiam, necessitate id exigente, non nihil retrorsum extenditur, eaque non solum, sed et omnia, quae ei annexa sunt, in lateralibus motibus diriguntur. Huic autem tam validae musculorum actioni duo accedunt commoda, unum a partiali divisione et incremento stratorum accessoriorum, alterum a fasciis, musculosa strata coercentibus, quae nunc in universum dijudicanda sunt.

In depresso quidem inter spinosos et transversos processus loco multifidus spinæ musculus, ab osse sacro oriundus, stratis suis articulares processus tegit et non tantum retrorsum, sed quodammodo etiam ad latera vertebrae movet. Laterales autem motus magis dirigunt spinalis et semispinalis dorsi, quibus omnibus super impositi sunt





sunt longissimus dorsi et sacrolumbaris muscoli, quorum initia crassa in imo dorso nascuntur et ita per lumbos ascendunt, hic tamen maximam partem conjuncti, in ascensu vero in parte posteriori thoracis partim in vertebrae, partim in costas inferuntur, et ubique novis stratis accessoriiis magis firmantur, donec ad collum accedentes non ipsis tantum finibus suis, sed per musculos varios novos accessorios hanc partem summe mobilem dirigunt, et extendunt, ad extremum firmant caput, aliis crassis stratis ad occiput deductis. \*)

Jam vero si fascias musculosas a spinosis praecipue processibus ad scapulas, thoracem et abdomen dimissas summam contemplamur, alias minoris, alias majoris usus in coercendis stratis longitudinalibus deprehendimus. Etsi vero transversus abdominis nihil, obliquus internus vero aliquid in ortu suo ad constringendas carnes, in lumbis sitas, conferunt, hoc in loco tamen latissimus dorsi, obliquo interno adhaerens, ob strata carnosam ab imis costis deducta, humero, cui inferitur, levato et antrorsum extenso, non solum inferiorem partem thoracis dilatare, sed etiam longitudinales dorsi carnes

coer-

\*) Confer. B. S. ALBINI tabulae myologicae, inprimis. T. XV. cum relatione ad VI. VII. et VIII.



coercere juvat. Atque ita etiam res se habet cum cucullari et rhomboideo, musculis in scapulam insertis, ad carnes, in dorso ascendentes, coercendas, qui prima quidem specie parum valere videntur; quod si vero scapula cum extremitatibus superioribus antrosum ducta est, hunc usum vere habent \*)

In hac autem re potissimum declaranda ad serratos posticos superiorem et inferiorem maxime respiciendum est. Ille enim, ex spinosis processibus oriundus, super musculos ascendentes ducitur et ad costas superiores inseritur; at hic, ex communi tendine cum latissimo dorsi productus, costis inferioribus affigitur. Horum itaque in thorace ampliando insignis usus et tunc potissimum est, si inspirationis motus diutius continuari debet. Si enim vel superiores, costas superiores non adeo levant, nec inferiores, costas inferiores deprimunt, tamen cum extrorsum movere tentant, amplitudinem thoracis vere efficiunt: Quod si igitur, durante hac inspiratione, spina dorsi vel fixa retinenda vel amplius extendenda est, tunc tractus fibrarum longitudinalium et omnium stratorum laterales etiam motus quodammodo dirigentium ita coercentur, ut actiones

\*) l. c. tab. XIII. XVII. et XVIII. cum relatione ad tab. V. et VI.





nes conjunctae per tempus sat diuturnum continuari queant. \*)

Indicarunt hoc obiter IOH. RIOLANVS \*\*) et ADRIANVS SPIGELIVS \*\*\*) et accessorius horum musculorum usus a recentioribus myographis confirmatus est. Eundem tamen non concessit WINSLOVIVS †) cum partes musculorum longitudinalium his fasciis non tectae, hoc auxilio, si aliquod esset, quoque indigerent. Etsi vero strata tendinosa, non musculosa utrumque ferratum posticum in dorso intercurrentia et ab ALBINO indicata ††) ad hos usus magis infirma et cellulosa tantum videantur, in motibus tamen summi thoracis et inter thoracem et lumbos hanc fasciarum constrictionem maxime requiri, et hoc commodum in motibus spinæ validioribus ab artificiosissima hac fabrica pendere, persuasum habemus, et suo loco incom-

\*) l. c. tab. XVII. cum relatione ad VI.

\*\*) In Anthropographia lib. V. cap. 21. Edit. Opp. Lut. Paris. 1649. p. 322.

\*\*\*) De Hum. Corp. fabrica. lib. IV. cap. 8. Edit. Venet. 1624. fol. p. 112.

†) Vid. I. B. WINSLOW Exposition anatomique de la structure du corps humain. Traité des muscles. §. 1157.

††) Historia musculorum. lib. III. cap. V. p. 351.

incommoda in doloribus spinae dorfi explicandis accuratius indicare poterimus.

Quamquam vero de vasis arteriosis et venosis eorumque nexu quaedam moneri possent, ampliorem tamen descriptionem non postulant, quod pauca, quae argumentum nostrum concernunt, passim adspergi possunt; praecipuorum vero nervorum directiones et plexus, cum in causis spasmodicorum recte dijudicandis omitti nequeant, in universum hic declarandi sunt.

Spinalis medulla, ex oblongata ideoque ex encephalo descendens, in medio canali spinae dorfi haeret et nervis suis utrinque ex foraminibus intervertebralibus dimissis, cum multis et praecipuis corporis humani nervis conjungitur; propterea dolores, ex aliis quoque causis oriundi, ad hanc medullam spinalem transferuntur. Neque vero sufficit, has tensiones ex universali nervorum nexu declarare, sed specialis potius nervorum conjunctio debet attendi. Quemadmodum enim ex calva ipsa deducti nervi sensibus et motibus partium, ad sensus pertinentium, potissimum dicati sunt, sic spinalis medullae nervi fabricam musculosam totius corporis, imprimis in validis superiorum et inferiorum extremitatum, motibus regunt, ita ut et phrenici ipsi et accessorii WILLISII inde deriventur. Quinti pa-





ris ramificationes longius productae et dura nervi acustici portio sive sympathicus minor, ramis per faciem et confinia colli extensis, consentientes spasmos in variis vitae incommodis declarant, neque ideo generali a nobis declaratae divisioni adversantur. Nervi vero paris octavi, vagi dicti, vel sympathici medii nomine insigniti, ex calva egredientes, praecipui sunt, qui per organa et viscera, colli, thoracis et abdominis deducuntur, non tamen per se, sed in multiplici nexu cum nervo intercostali, consentientium motuum et spasmodorum causa sunt.

Nervus autem intercostalis, sive sympathicus magnus omnem ferme in motibus et spasmodis consensum explicare videtur. Ejus origo dubia quidem est, nexus tamen cum omnibus nervis medullae constans et certus, mechanismus in tot gangliis singularis, conjunctio in plexibus cum aliis nervis imprimis cum pari vago evidens, ita ut cum omnibus ferme reliquis nervis conjunctus, attentionem in motibus symptomaticis omnino exigat. Quamquam autem haec cuncta a nobis copiosius explanari nequeunt \*), tamen pauca de nexu abdominali in memoriam revocare juvat.

Nervus

\*) vid. WINSLOW *Traité des nerfs* §. 357. seqq. et Bartholomaei Evstachii tabulas anatomicas tab. XXVIII. et XXIX.

Nervus quidem intercostalis ad universam spinam descendit, praeterea autem in dorso ramos introrsum ad corpora vertebrarum collaterales dirigit, ex quibus confluentibus nervus collateralis sive splanchnicus oritur, qui in nexu cum pari vago et in formando ganglio seu potius plexu semilunari praecipue, quamquam et in reliquis plexibus, vim abdominalium viscerum in tot functionibus dirigit, et evidentissimum nexum cum nervis spinalibus tradit, cujus accuratior disquisitio varios motus spasticos in morbis explicandis illustrare poterit. Inprimis vero tenendum est \*), filamenta dorsalium, cum nervo intercostali in pectore conjuncta, tenuiora esse, etsi nervus ipse ibi crassior sit, et nervum quoque collateralem formet; sub diaphragmate vero, ubi nervus intercostalis magis supra corpora vertebrarum descendit, filamenta ex lumbaribus communicantia majora esse, licet nervus ipse minor videatur. Ex quo phaenomeno tantum hic concludere liceat, consensus tensionum in morbis spasticis hac in parte evidentiores fieri.

Atque haec sunt praecipua, quae, antequam ipsam tractationem ingrederemur, ex anatomicis de ossea, ligamentosa et musculosa fabrica itemque

Zz 2

de

\*) vid. WINSLOW, l. c. §. 428.





de nervorum nexu in universum praemittenda, putem. Cum vero de doloribus ad spinam dorsi idiopathicis praecipue nobis agendum sit, digressionem ad varios symptomaticos dolores non evitare potuimus. Quam ob rem nonnulla Auctorum nomina, quibus dolores, ad dorsum natos, insignire solent, examinare volumus.

Ac primum quidem morbus noster vi vocis *rachialgia* appellari posset, cum *ῥαχίς* spinam dorsi et *ἀλγέω* doleo denotet. Cl. SAUVAGES tamen hunc morbum in consideratione dolorum \*) ad colicam refert et colicam Pictonum, saturninam et alias, ab Auctoribus in morborum indicibus traditas, ut synonyma, recenset, quoniam Cl. ASTRUC, licet ex hypothesi, ejus causam ex nervis medullae male affectis declarat. Existimavi igitur, nostrum morbum ad lumbaginem a Cl. SAUVAGES declaratam referri debere. \*\*) Etsi enim hanc in universum ad varias acrimonias, ex abdomine ortas, quando stimuli ad lumbos et dorsum proserpunt, referat, ideoque varios quoque dolores symptomaticos huc pertinere

\*) Confer FR. EOISSIER DE SAUVAGES Nosologiam methodicam tom. III. part. I. de doloribus. class. VII. ord. V. no. XXIX. pag. 196.

\*\*) l. c. no. XXX. et species 10. pag. 209.

tinere dicat, tamen cum idiopathicum dorsi dolorem tantum in specie decima, quam lumbaginem a nifu, *effort de reins*, appellat, commemorat, lumbaginem recte cum aliis Auctoribus ad symptomaticos spinæ dolores referre debui.

Cum etiam Cl. DELIUS dolores ad dorsum ex varia causa catarrhali febrili, colica cet. considerandos suscepisset \*), is, quia nec rhachialgiae, nec lumbaginis nomen ex nosologia Sauvagæa adoptare voluit, notialgiam a *νωτός* dorsum et *ἀλγέω* doleo appellavit. Inspeimus etiam hoc consilio dissertationem de spasmo fixo PARACELSI, quam Cl. GEBAYER proposuit \*\*) qui vagum hoc, nec satis definiendum PARACELSI nomen, doloribus ad dorsum, inprimis ex causa haemorrhoidali natis, tribuit. Haec et alia, quae passim ab Auctoribus traduntur, ulteriori Lectorum disquisitioni relinquimus et ad brevem de symptomaticorum dolorum ad spinam dorsi tractationem accedimus.

Zz 3

Dica-

\*) vid. Diff. de Notialgia seu dolore dorsi eoque vario. Praeside H. F. DELIO proposuit P. H. Woerner Erlangae 1765. 4to.

\*\*) vid. Diff. de spasmo fixo PARACELSI Praeside C. S. GEBAYER proposuit. I. F. S. Doll. Erlangae 1746. 4to.






Dicamus autem primum de colicis doloribus, quippe qui non solum zonam coli, sed reliqua quoque intestina tensionibus molestis afficiunt. Plexus enim mesaraici, ad aortam descendendo, adeo ad spinam dorſi adhaerent, ut eidem anterieus quasi agglutinati videantur, ideoque non solum vagos spasmos in variis tubi intestinalis partibus efficiunt, sed spinam dorſi lumbarem etiam in consensum trahunt. Saepius ita accidit, ut vicina latera simul dolerent, et spasmi, ad thoracem et costas ascendendo, pleuriticos saepe dolores mentirentur, qui tamen protinus compescuntur, quando causa spasmodicorum intestinalium idoneis remediis discussa est.

Eadem est causa, cur saepe haemorrhoidales stases non tantum ad os sacrum, sed etiam ad lumbos atroces dolores, ad spinam ascendentes, efficiunt. Quamquam enim sanguine turgidae et saepe varicosae venae, non solum ad ani orificium, sed et altius in intestinis et mesocolo reperiuntur, atque rami venarum, ab hypogastrica oriundi, simili modo turgent, ex iis tamen dolor non tam declarari potest, quam ex nexu plexus hypogastrici, ad intestinum rectum usque descendens, cum nervis ossis sacri et vicinis spinalibus. Inde enim regrediendo ad lumbos produciturf tensio haemorrhoidalis,

lis, quae colicis doloribus, simili modo excitandis, occasionem praebet. Quae quidem omnia doloris ad spinam ascendentis incommoda non solum in haemorrhoidibus veris sanguineis, sed in aliis spuris mucosis, scirrhis et carcinomaticis intestini recti et vicini tractus coli morbis, ad haemorrhoidales vulgo relatis, observantur.

Non est praetereunda hoc loco consideratio tensionum et dolorum, qui in menstruorum accessu et difficili progressu, nec non in gravidis et puerperis existere consueverunt, cum varii spasmus post puerperia molesti hac ex re dijudicandi sint. In junioribus quidem puerperis saepe ex spinae dorsi infirmitate, cujus nimirum partes iustum robur nondum acquisiverunt, tensiones molestae facile excitantur et diu remanent. Gravidae enim molem abdominis, in graviditate auctam, vix ferre possunt, et quamquam saepe facili, nec impedimentis molesto partu infantem enituntur, tanta tamen saepius imbecillitas coxarum et spinae remanet, ut per plures hebdomadas cruribus non nisi vacillantes insistant, et si ex reliquo vigore corporis motus urgent, dolorum habitualium in spina dorsi, per totam vitam saepe molestorum, causam inferunt.





Neque vero solum in his, sed in adultioribus quoque feminis haec incommoda remanent, quando per validos in partu nifus ligamenta, musculos et nervos ad spinam dorsi lumbarem et conjunctas cum osse sacro coxas vehementer tendunt. Ex hac forte causa abscessus lactei crebrius ad spinam lumbarem et inferiores extremitates, quam aliis in locis, oriri arbitror. Quando autem, et his non obortis, puerperae remissionem nimiae extensionis et partium aequilibrium justa quiete non restituant, sed nimium deambulant, vel alia negotia cum spinae dorsi motu valido tractant, novis omnino et molestis tensionibus ansam praebent. Quae quidem damna in doloribus spinae habitualibus non modo in molliori vitae deditis, sed in robustis quoque feminis observavi, idque non tantum in menstruum ortu et vicissitudinibus, nec modo in graviditate iterum succedente, sed et in variis ex vicissitudine tempestatum oriundis incommodis atque morbis, quibus etiam difficulter opem ferri posse, non raro cognovi.

Similis mihi ratio esse videtur calculosorum. In his enim crebrius colica nephritica ob nexum plexus renalis cum mesaraicis, sed cum ea quoque ad spinam dorsi ascendentes tensiones oriuntur.

Dolor

Dolor in his molestus utrinque ad spinam lumbarem, ubi renes siti sunt, non ita manifestus est, observatione potius cognovimus in iis, in quibus calculi renalis praesentia per alia signa satis evicta est, molestum sensum non in ipsa regione lumbari, sed deorsum ad inguina, in sexu potiori ad testes et ad tractum cruralis nervi, praecipue vero inter ambulandum ad spinam dorsi lumbarem deductum esse. Cum vero dispositio ad genesin calculi in renibus difficulter tollatur, aliquod levamen dolorum affertur, si vel cubando vel sedendo, diu enim erecti stare aut obambulare nequeunt, dorsum pulvinariis densis et elasticis sustineatur, quo tensiones partium molestae mechanico hoc auxilio cohibeantur.

In ingressu febrium lassitudines spontaneae, tensiones vagae partium, inprimis crurum, consueta symptomata sunt, quae ex dyscrasia humorum, ut causa febrium, pendent, et motibus febrilibus, per intervalla excitatis, subinde discutiuntur. Saepius vero dolores ad lumbos, indeque ad spinam ascendentes non ultima morborum febrilium incommoda sunt. Hinc etiam factum est, ut lumbago febrilis, variolosa cet. inter species hujus morbi a CL. SAUVAGES relatae invenirentur. Hos quidem





dolores, ut cephalalgiam, febrili paroxysmo agitata crebro molestant, ex difficili sanguinis transitu per piaë matris vasa, in cerebro et in edulla spinali copiosissimis anastomosibus juncta, declaramus, nec hæc causa prorsus negligenda est: re tamen accuratius perpenſa, cognovimus, saburram viscidam et acrem, in primis viis hærentem et motam, tensiones ad spinam efficere, quæ sæpe ad encephalum usque transferuntur.


Hanc vero causam præcipuam esse, febres intermittentes tertianæ, quarum causa omnino ex colluvie acris et viscida, in primis viis hærente, repetenda est, ostendunt; hæc enim non colicos dolores, sed in paroxysmo ipso, quando materia morbi movetur, atrocissimos sæpe dolores ad spinam, ut symptoma, frequentissime declarant. Accidit enim, ut et tum, cum saburra ex primis viis sursum deorsumque emota est, paroxysmi quidem eo usque permaneant, donec dyscrasia acris et viscida, in sanguine et humoribus hærens, immutetur et corrigatur, dolores tamen ad spinam vel nulli vel longe mitiores sint. Ita etiam in validis febribus continuis ex alia causa, v. c. inflammatoria natis hoc symptoma non ita observatur, ut in intestinalibus.

Dum

Dum haec scribo, febris acuta continua biliosa gravidam afficit, quae de atroci dolore in dorso jam ab initio morbi magis, quam de ullo alio symptomate conquerebatur, ita ut abortum imminentem metuerem; primis vero viis, ut decet, purgatis, dolores ad spinam ferme omnes cessabant, et cum iis metus abortus evanuit. Ex quibus omnibus non temere concludo, variolas, morbillos, aliasque ex contagiosa humorum diathesi oriundas febres, hanc symptomaticam lumbaginem tum demum ostendere, quando acris et irritans humor in primis viis simul haeret, saepius enim animadverti, non semper post eruptionem exanthematis, sed postquam primae viae per diarrhoeam spontaneam, purgantia medicamenta et clysinata depuratae sunt, hoc symptoma non amplius urgere.

Longius sane hic progredi possem, si symptomaticos dolores, ad spinam oriundos, omnes persequi vellem, nam tabes dorsalis, hypochondriaca et hysterica passio, cardialgia et alii ex varia dyscrasia humorum oriundi morbi a nobis examinandi essent. Quando autem ea, de quibus haecenus exposuimus, recte perpendimus, facile perspicimus, posse et alios symptomaticos dolores eorumque causas inde discerni et in variorum morborum meliora





de la recte attendi. Post tot itaque ambages meum nunc est, de idiopathicis doloribus, ad spinam dorsi ortis, differere, id quod ex doctrinis praemissis facilius nunc intelligetur.

Cum in sanis de reliquo hominibus post validas corporis exercitationes, in primis in lucta et aliis vehementioribus spinæ dorsi nisibus dolor fixus in aliquo hujus spinæ loco subito oboritur, tum utplurimum in luxationibus et subluxationibus vertebrarum vel costarum in capitulis, ad spinam dorsi fitis, causa doloris oborti quaeritur, chirurgicum tamen examen abunde docet, raro subluxationes ceu vehementes distensiones harum partium oriri, planeque fieri non posse, ut verae luxationes, hoc est ossis articulati secessus ex sua sede, deprehendantur.

Germani nostri, quoad ego quidem sciam, triplici vocabulo, in his doloribus, crebrius observatis, declarandis utuntur, *verfangen*, *verbrechen*, *wehe thun*, quæ quidem vocabula cum promiscue adhibeantur et in aliis Germaniæ provinciis alia forsitan synonyma habeant, pro norma doctrinae cujusdam medicae haberi nequeunt. Mihi autem, de hac re cogitanti, visum est, ad eorum normam, tres dolorum ad spinam dorsi ortorum species constitui posse.

posse. In definiendis itaque doloribus, ad spinam dorsi ortis, idiopathicis, primo de tensionibus flatulentis, postea de tensionibus variis in ligamentosis partibus spinæ dorsi, denique de tensionibus ex stasi serosorum vel ex parte etiam sanguineorum humorum in fabrica musculosa agamus. Quam quidem rem, ubi in universum modum atque symptomata hujus affectus morborum declaravero, eumque ad differentias causarum fusius revocavero, ulterius declarare tentabo.

Interdum ex improvise, interdum post nixus quosdam, non ita validos, in lecto decumbentes vel sedentes vel obambulantes, et interea corpus in unum alterumque latus subito torquentes, porro in saltu aut terram uno pede vehementius pulsando, sæpius tamen post graves totius corporis nixus et inprimis spinæ dorsi contorsiones, insolitus, in aliqua spinæ hujus parte, inprimis in confiniis thoracis et lumborum, pungens et fixus dolor oritur, qui tensione sua ad latera lumborum et thoracis producit. Cum his sæpe organa respirationis male afficiuntur, ita ut præcipue profunda inspiratio brevis et non nihil dolens animadvertatur. Ut plurimum in quiescente corpore nullus dolor est, in primis si aeger, tensionibus obortis, accommodatum





datum sibi situm elegit, excitatur tamen vel in initio motus, vel in eo continuato. Aliquando tamen continuus dolor percipitur cum anxia respiratione. In lumbis ortus ibique primum fixus dolor non raro ita augetur, ut ad spinam dorsi totam ascendat, et paulo post etiam cephalalgiam capitis universi, vel dolorem ad occiput tantum moveat.

Nos quidem si vehemens motus et contentus nifus doloris causa est, vim aliquam spinae dorsi illatam esse arbitramur. Cum autem similis sensus et tunc saepe oriatur, cum quis, infimo ventre imprimis repleto, equitando vel currendo adversus ventum corpus vehementer agitavit, vel sudorem inde excitatum repressit, vento nimis a pulmonibus suscepto vel refrigerio subitaneo causa tribuitur. Similis effectus in pusionibus ejulantibus et pueris, vehementer clamantibus, observatur, et omnes, contra venti impetum celeri nimis cursu nitentes, simile incommodum ex imi ventris tensione et tumore sentiunt.

De doloribus ad aliquem spinae locum fixis, vel inde ad caput ascendentibus, vel pectus simul constringentibus, vel ex hypochondriis, ad scrobiculum cordis directis, potissimum nobis sermo est. Quemadmodum autem in his sensus doloris varie molestus est,

est, ita etiam diversas illius excitandi causas proponimus et remedia iis accommodamus. Etsi vero tensiones flatulentae, de quibus primo loco dicendum est, ad symptomaticos dolores, ut colici, melius referri videntur, attamen ex ipsa tractatione patebit, ob arctiorem nervorum ad spinam dorsi nexum ad idiopathicos aliquo jure referendos esse.

Inum ventrem sine omni doloris sensu ad spinam dorsi vehementer distendi posse, non solum repletio ventriculi et intestinorum a cibo et potu, vel ab aere ex his soluto et elastico facto, sed etiam ascites et hydrops faccatus, ex insigni mole aquarum in his cavis stagnantium orti, tumores mesenterii et ovariorum magni, ipsa denique graviditas confirmant. Etsi vero dolor ille ideo non percipitur, quod peritoneum, muscoli et reliqua abdominis integumenta subinde et lente extenduntur, in his tamen causis omnibus, et in graviditate potissimum, infirma corpora a sensu ad spinam dorsi molesto non libera reperiuntur. Quod si vero in has causas accuratius inquirimus, non a distensione universa, sed potius a particulari, aliquam partem intestini expandente, causa flatulenta dolor excitatur, quippe qui, his flatibus discussis, sua sponte cessat.

Neque





Neque vero aer, intestina distendens, per se causa est, cum aequali ratione totus tubus intestinalis vel magnus ejus tractus turgescit et expanditur, neque frictiones abdominales, tum temporis applicatae, et cucurbitulae magnae, passim appositae, dolorem excitant et intendunt, sed constrictiones partiales, quae in una alteraque et brevi interdum tubi intestinalis parte fiunt, magis molestae sunt. Etsi enim concessi, flatulentiam imi ventris extensionem interdum quoque dolores ad spinam excitare, tamen tum praecipue, cum tumidus venter non est, sed in universum contractus, spasmi, ab irritatione intestinatorum partiali orti, intenduntur, quod aerem elasticum in tumida quadam parte intercipiunt, cujus demum pressio ulteriorem nervorum tensionem efficit et dolores ad spinam auget. In omnibus autem his tensionibus ad collateralem sive splanchnicum nervum, imprimis respiciendum, arbitror.

Si enim in infantibus et in adultis etiam, qui sensus percepti indolem melius describere possunt, venter ultra modum tumet, et inprimis zona coli distenta versus ventriculum et diaphragma anterieus urgetur, regionibus hypochondriorum et scrobiculi cordis vehementer tensis, respirationis difficilis sympto-

symptomata molestiora accidunt, brevior illa fit et magis anxiosa, oesophagus ad cardiam et in toto suo tractu strictus, ructus sursum nitentes cohibet, et nisi tunc ab inferiori parte aeri et saburrae foeculentae acri et viscidae exitus conceditur, nihil levaminis affertur, sed nervus quoque splanchnicus ad crura diaphragmatis tenditur, accedente etiam dolore spinæ.

Si vero, partibus intestinorum, imprimis coli, constrictis aliisque vicinis expansis, imus venter ab anteriori parte non tumet, sed tumores passim oriundi retrorsum versus diaphragmatis crura urgent, tunc etiam in stricto et compresso ventre vagi tumores tactu percipiuntur, qui non solum plexus mesaraicos et vicinos spinales nervos male afficiunt, sed splanchnicus quoque nervus in consensum trahitur, tensio ad origines intercostalis sursum ad cervicem et occiput continuatur, ex qua causa dolor inde excitatus, longe vehementior est illo, qui a respiratione, varie intercepta, pendet. Quamquam vero uterque dolor interdum conjunctus est, tamen et in medela afferenda bene distingui debet. Quemadmodum enim in illo evacuatio largior morbum solvit, sic in hoc sola antispasmodica dolorem compescunt, et, tensione nimia cohibita, evacuationem faciliorem et liberiores reddunt.






Dolor autem, a tensis ad spinam nervis excitatus, potissimum in hypochondriacis et hysteriis affectionibus ad par vagum ducitur; in his enim non semper pulmo in respiratione libera impeditur, sed cardiae et gulae constriction, ab hoc consensu inducta, majorem habet molestiam. Per consensum etiam ulteriorem non raro laryngis stricture inducuntur, quod ex vulgo sic dicta suffocatione uterina, cum sensu moti globuli ad collum patet. In omnibus vero his doloribus consentientibus non tam ad mechanicam nervi totius tensionem, quam in nexu splanchnici et ejus origine intercostalis, declaravimus, sed ad acrimoniam, nervis inhaerentem et fibras medullares speciatim irritantem, respiciendum est, ita, ut tandem varia haec incommoda complicatum maxime et universalem spasticum morbum faciant, in cujus vera curatione ad acrimoniam singularem simul respiciendum est.

Transeamus nunc ad tensiones ligamentosas, ut causas spasm, dolorem ad spinam dorsi excitantes et intendentes. Sub visibus enim spinæ variis in magnis oneribus sustinendis, movendis et elevandis dolor vehemens ad aliquam spinæ partem subito oritur, etsi vero tum ut plurimum muscoli male afficiuntur, de iis tamen postea, nunc de inaequalibus

bus vertebrarum tensionibus dicam. Cartilagines ligamentosae, inter corpora vertebrarum collocatae, in tranquillis motibus elatere suo spinæ varias flexiones juvant, in vehementioribus autem nifibus saepe ultra modum tenduntur, et quamquam apophyses quoque tendi videantur, nunquam tamen tanta laesio inducitur; quae luxationem vere efficiat. Quod si vero, durante hoc nifu, vis aliqua externa spinam dorsi a parte posteriori petat, tum vel fracturam, vel aliquam etiam distorsionem, aut subluxationem articulum praecipue processuum fieri posse, largimur. De his autem, ut singularibus spinæ dorsi morbis, nunc nobis agendum non est.

Tanta tamen vis corporibus vertebrarum non solum in junioribus, sed etiam in adultis, quorum spina satis corroborata est, non raro infertur, ut ligamenta ultra modum tendantur, vel ex parte prorsus dilacerentur, vasa comprimantur et lacerentur, humor effundatur, et, licet in his partibus celeres abscessus non sequantur, lentae tamen corruptiones materiae effusae et abscessus ad spinam dorsi et osteosteatomata efficiant. Illi lentam corporum vertebrarum cariem, haec tumores inducunt, quibus partes vicinae comprimuntur et quamquam ossea strata in ipso tumore nascuntur,





ex parvis tamen abscessibus, passim ad hos tumores natis, cariosae etiam ossium vicinorum erosiones existunt. In utroque morbo post multos ad spinam dorsi excitatos dolores, macies et lentae febres aegrum demum consumunt. De his fusius egit Cl. HERRMANNVS \*) et osteosteatomata iconibus nitidis illustravit, pauca etiam de levioribus et frequentioribus ad spinam dorsi anterius exortis exostosis commemoravit \*\*) quas tamen nunc ad ductum iconis, a nobis exhibitae, illustrabimus.

In adultis saepe et tum, cum spina dorsi justum ad intensos motus suslinendos robur obtinuit, — validae tensiones non solum vertebrae ab una alteraque parte in corporibus diducunt, cartilagineum ligamentosum ultra modum tendunt et dilacerant, sed etiam ligamentum anterius vertebrale commune extendunt, ex qua re ob nervos proximos dolor ad spinam oritur, qui in quiescentibus iterum sopitur, interea tamen exostosis gignendis occasionem praebet. Ex tribus spinis, has exostoses monstrantibus, eam selegi, quae has mutationes egregie exprimit, quo commodam iconem exhiberem.

(\*) vid. Diss. inaug. IOH. GOTTHELF HERRMANNI de osteosteomate. Lipsiae 1767. 4to. §. 7. ad 10.

\*\*) l. c. §. 6.



berem. De ea in universum admonco, margines corporum vertebrarum inaequales esse, ac magis prominentes, in ultimis etiam colli et plurimis dorsi vertebrais, in media parte leviores quasdam eminentias apparere, in confiniis vero dorsi et lumborum et in ipsis lumborum vertebrais, tantas inaequalitates marginis esse, ut ubique ferme sat magnae exostoses conspiciantur. Hujus itaque potissimum partis delineationem ad argumentum nostrum uberius explicandum proposui.

Inter nonam et decimam vertebra dorsi utrinque eminentiae sat magnae *a. a.* apparent, ipsa vero undecima vertebra in parte dextra exostosin offert, *b.* quae in superiori parte  $\alpha$ . cum simili certe exostoli, ex decima nata, articulationem, deorsum vero super duodecimam vertebra unco quasi prominente  $\beta$ . super breviorē hujus eminentiam profertur, nec coalescit. Quemadmodum autem a latere sinistro inter nonam et decimam vertebra ad *a. a.* sic inter decimam et undecimam ad *c.* similis eminentia conspicitur. Multo tamen major est illa, quae a vertebra duodecima late sursum tendit ad *d.* et non tantum extrorsum, sed introrsum magis in cornu veluti extenditur. De reliquis eminentiis primae secundae et tertiae lumborum ver-





tebrae nihil commemorabo, sed tantum exostosem singularem ostendam, quae inter tertiam et quartam lumborum vertebrae a sinistro latere, ut ossiculum peculiare, *e.* corporibus vertebrarum interpositum est, lata tandem exostosis *f.* ex margine inferiore sinistro vertebrae quartae versus quintam descendit, quae tamen et hic a simili, ex quinta vertebra ascendente, excipitur, quam in icone non ita, ut priorem, indicare potuimus.

Hae exostoses verae et densae sunt, ex vehementius diductis corporibus vertebrarum natae, et longe differunt a crustis osseis, fungosis, agarici vel stalactitis in modum, super corpora vertebrarum ductis \*) de quibus quidem in gibberositatis senilis descriptione suo loco nonnulla proponam, ideoque tantum his obiter moneo, exostoses nostras densas, non fungosas esse, nec anchylosin efficere, sed motum aliquem, licet difficilem, spinae dorsi admittere.

Ejusmodi autem mutatio non uno impetu fit, sed sunt, qui ad duros hos labores saepe revertantur, cum tamen de doloribus, nunquam plane sopitis,

\*) vid. ALBERTI HALLER Elementa Physiologiae Corp. Hum. Vol. VIII. Part. I. pag. 318. Part. II. pag. 80.

sopitis, semper conquerantur. Senes quoque et ad labores hos perferendos minus idonei, etsi quiescentes, praecipue tamen tempestatum vicissitudinibus agitati, dolorem saepe, ultra modum auctum, experiuntur. Remanent enim ad has partes tenas obstructions lentae, quae liberum humorum circum, in senibus semper languidum, in his partibus non admittunt, ex qua causa etiam nervi, ad spinam dorsii excurrentes et conjuncti, tenduntur, irritantur, ideoque dolores hos ad spinam augent.

Restat, ut examinemus stases serofas vel leviter inflammatorias in musculis, a parte posteriore spinæ collocatis. Quando validae tensiones spinæ, imprimis in extensione successiva, vel etiam leves inflexiones ad latera in opere aliquo exequendo requiruntur, tunc, qui sanitati consulunt, inspiratione cohibita et, quantum fieri potest, continuata, motus hos moderantur. Strata nimirum musculosa multifidi spinæ, spinalis et semispinalis, sacrolumbaris et longissimi dorsii et alii minores ad vertebrae siti muscoli, in continua et diu protracta constrictione subsistere non possent, nisi fasciae, quae has carnes, in spina ascendentes, cingunt, eas in arctiori situ constringerent. Etsi vero ferrati, superior et inferior, in continuanda inspiratione





pectoris dilatationem urgent, et simul carnes ascendentes arctius complectuntur, tamen alii accessorii, latissimus dorsi et rhomboideus et ex parte cucullaris, scapulis et humeris tunc antrorsum ad onus movendum extensis, hanc compressionem juvant, atque ita efficiunt, ut onus movendum tolli et suo modo varie dirigi possit.

Hoc facto, et tum, cum moles movenda vel elevanda non tolli possit, muscoli, in hoc opus intenti, prius, onere relicto, relaxandi sunt, quo tandem exspiratio blanda diurnam inspirationem sequatur. Si vero exspiratio necessaria est, vel ex improviseo admittitur, antequam constrictiones validae muscutorum ad spinam cessent, musculosi fasciculi in statum aequilibræ blande se remittere nequeunt, sed spasmodice constringuntur, et ita humorum motum in vasis minimis et cellulis interceptiunt, vel etiam leves stases inflammatorias admittunt, ex quibus dolor intensus ad unam vel alteram spinæ partem oboritur et sæpe fixus manet. Raro quidem in his partibus abscessus ex sanguine stagnante nec facile resorbendo oriuntur, sed stases serosae potius, quae lente discutuntur, rigiditate plus minus insigni in his partibus relicta, cujus rei auxilia postea examinabimus.

In his et aliis nisibus musculorum, vehementer tensorum, Cl. POUTEAU luxationem quandam musculorum vel fasciculorum muscularium ita proposuit, ut musculosa strata ex situ suo prorsus secedere contendat \*) *deplacemens des muscles*. In qua re examinanda nunc paululum versabimur. Arbitratur autem Cl. Vir, fascias quidem validas musculos, durantibus etiam vehementioribus motibus, in suis sedibus retinere, si tamen interdum vel contractio violenta unius musculi inter congeneres, vel pressio valida congenerum contra unum, non tam valide contractum, vel tandem in compositis musculis unius partis contractio vehementior accedat, tunc constrictionem membranarum cingentium non sufficere; contextum potius cellulosum dilacerari, vasa sanguifera minima rumpi et fibras nerveas tendi. Urget ideo, hanc luxationem musculi, seu deductionem ex situ naturali in alium perversum dici posse et debere, eamque per dolorem et motus difficultatem cognosci. Auxilia denique, quae hic adhiberentur in emollientibus medicamentis applicatis, ac contractione inde moderata reddita, nec non in leni frictione et pressione

Aaa 5

musculi

\*) vid. CLAUDE POUTEAU *Melanges de Chirurgie à Lyon* 1760. 8vo. maj. pag. 405.





musculi, in verum situm reducendi, posita esse affirmat.

Sed venia experientissimi et nobis amicissimi Viri monuerim, ejusmodi luxationem cum cellulosi contextus et vasorum sanguiferorum, ad musculum ductorum, dilaceratione et nervorum enormi tensione factam, si forte acciderit, sine vehementi inflammatione et inde nato ab humoribus effusis et stagnantibus abscessu non esse posse, ideoque in laesionibus illis non nisi stasim aliquam statui posse, quae vel serosa est, vel levissime inflammatoria, tensionibus ad breve tempus molesta, et auxiliis adhibitis, sine ulla destructione partium discutienda. Quod si vero auxilia idonea negliguntur, tunc aliqua tantum stagnantis humoris resorptio fit, et in quolibet motu hujus partis dolor aliquis non tam acutus remanet, qui potissimum in vicissitudinibus tempestatum, expeditam humorum circulationem turbantium, tensionem reiteratam et molestam relinquit.

De auxiliis in his tensionibus applicandis nunc breviter exponendum est. In tensionibus infimi ventris flatulentis frictio abdominis robur intestinorum, per partes extensorum, restituit, aerem, cava partialia distendentem, discutit et ita spasmi-  
intesti-

intestinatorum remittentibus, etiam consentientes ad spinam dolores cohibet, et tollit. Fricção autem non tantum universi ambitus infimi ventris, sed potissimum ad tractum coli instituatur, ita ut a dextris incipiendo sensum per hypochondrium dextrum, per regionem epigastricam, ad sinistrum progrediendo, in latere sinistro ad flexus coli inferiores finiatur. Perverse igitur agunt, qui, pollicibus ad cartilagine[m] xiphoideam utrinque appressis, a tumido ibi scrobiculo cordis ad hypochondria utrinque descendunt, quam fricandi rationem aniculæ nostræ in infantum abdomine, flatibus distento, sæpe adhibent, et tenellos misere sæpe excruciant. Neque hæc fricção tentanda est antea, quam vel purgante medicina vel clysinæ intestina ex parte libera sint reddita; hac enim cura neglecta, sæpe spasmi, ex acrimonia orti, magnopere intenduntur.

Cum vero vola manus ficcior contra ficca abdominis integumenta, validius stricta, molestum sensum efficiat et præsentem augeat, manus et abdomen oleo inungenda sunt, quo, emolliente vi simul applicata fricção, blandior succedat. Etsi vero in hunc usum oleum purum vel butyrum non salitum sufficit, olea tamen carminativa cocta, qualia plerumque





rumque eliguntur chamomillae et anethi, praestantiora sunt, quoniam lenior halitus aromaticus in nervos tenfos penetrat, qua propter etiam unguentum de linaria, si aliqua olea destillata menthae, rutae et absinthii admixta habet, optimum ad abdomen fricandum remedium subministrant. Olea empyreumatica viam nervinam excellentiorem habent, sunt autem propter foetorem ingrata, succini tamen oleum et castoris axungia, nec non aliquando opium admisceri possunt. Ex hoc effectu forte aniculae excusandae sunt, quando in fricando abdomine infantum oleum vetustum lampadis, rancidum magis redditum, puro et recenti oleo praeferunt.

Neque vero tantum in tensione flatulenta, ad spinam dorsi derivata, sed magis tum, cum ligamentis vertebrarum, et musculis ad spinam vis illata est, vel pandiculatio crebrior vel lenta spinae dorsi extensio utilis est. Explicemus modum hujus extensionis, quem sequuntur artis chirurgicae imperiti homines, duce sola consuetudine, nec sine felici successu. Homo robustus in terra sedeat, calcibus, dum genua elevat, ad nates retractis. Ante eum pressius collocetur aeger, in terra quoque sedens, cruri-

cruribus antrorsum extensis, complicatis super pectus brachiis, ita, ut volae manuum alternatim in latera opposita thoracis applicentur. Prior tunc aegrum amplectens, dorsum ejus ad genua sua fortiter apprimat, et sensim paulatimque spinam ejus retrorsum extendat lente et recta, quo quidem modo molestae constrictiones solvuntur, et discussio ac resorptio stagnantis humoris efficitur.

Haec valida extensio super genua mihi non tam probatur, quam altera methodus, ubi homo robustus erectus, aegrum, ante se collocatum erectum, brachiis descripto modo super thoracem complicatis, vel, quod melius est, cubitis et manibus, flexis brachiis, versus faciem directis, musculis pollicis ad oculos suos applicatis ideoque capite non nihil antrorsum inflexo, habet. Hunc aegrum igitur, brachiis inflexis et ad pectus appressis, alter complectitur, totum corpus retrorsum elevat et non nihil agitat, ut spinae dorsi muscoli, quibus in nisu aliquo inordinato vis illata est, et qui spastice tenduntur et constringuntur, proprio corporis pondere blande extendantur et concutiantur, quo facto, stridore





dore et strepitu aliquo percepto, spasmus in musculis et tensio in ligamentis et nervis tollitur.

Quoniam vero in imbecillis hae lacerationes saepius accidunt, non inconueniens videtur, ut balneis subfrigidis et frictione spinæ per spongas, vel inunctione spinæ cum unguentis, paulo ante commemoratis, vel vino cum baccis lauri, juniperi aliisque acromatibus digesto, et cum his blanda spinæ dorfi frictione administrata, robur partium, ibi sitarum, concilietur. Etsi vero tales imbecilles, a validioribus spinæ tensionibus arcendi sunt, aequalis tamen et blanda agitatio in saltatione et aliis corporis exercitationibus nunquam intermittenda est. Posteaquam vero supra commemoratis auxiliis usi sunt in lectulo, corpore, quantum prae dolore fieri potest, extenso, et hac extensione vario modo tentata, discussionem ulteriorem juuent.


Quoniam porro spasmi, in corpore excitati, blando sudore succedente, saepius solvuntur, non inutile erit, infusis plantarum subaromaticarum scordii, agrimoniae, betonicae cet. vel arnicae,  
vel

vel roob sambuci in aquis analepticiis soluto, vel liquore cornu cervi, aliisque medicamentis alexipharmacis, quin etiam electuariis, quibus proportionata opii dosis addita est, discussionem humorum stagnantium et spasmi solutionem efficere.

Maxima etiam in his est vis medicamentorum antispasmodicorum. Fuligo splendens et castoreum non sine fructu adhibentur. Equidem saepius iis, qui de doloribus ad spinam, vel ex causa flatulenta, vel post nifum validum corporis inductis, conquesti sunt, hanc medicamenti formulam scripsi: concharum sine igne praeparatarum, nitri depurati ana scrupulum unum, pulveris castorei et fuliginis splendentis ana scrupulum semis, misce, dividatur in duas partes, quibus pulveribus multi cum fructu usi sunt.

Bajuli nostri, qui in oneribus dirigendis et movendis saepe his incommodis afficiuntur, et ipsi sumunt et aliis suadent sanguinem hirci exsiccatum, alii vires rubiae tinctorum laudant, et optimum et selectum pulverem, quem *Grapp* vocant, a mercatoribus sibi expetunt. Quoniam vero hoc  
genus





genus hominum spiritu ardente nimis delectatur atque commemorata medicamenta ut plurimum in liquore spirituofo concentrato fumunt, ita ut deinceps diu quiescant et sudent, dubium omnino est, utrum per sudorem, an per vim medicamenti specificam levamen habeant. Ceterum rubiae ~~tinctorum~~ vim non prorsus contemno, cum et in odore aliqua vis antispasmodica appareat, et ego hunc effectum etiam in infusis concentratis et decoctis saepius cognoverim.

### EXPLICATIO ICONIS.

9-12. Vertebrae dorfi a nona ad duodecimam.

I-V. Vertebrae lumborum a prima ad quintam.

VI. Pars ossis sacri superior in icone conspicienda cum duobus processibus lateralibus.

\*\* Hiatus ab exsiccatione ortus, inter quintam lumborum vertebrae et os sacrum, ob quem hoc ita reflexum erat, ut non, nisi superior ejus pars, icone exprimi potuerit.

a.a. Eminentia dextra et sinistra ad nonam et decimam dorfi vertebrae.

b. Exostosis undecimae vertebrae dorfi, sursum ascendens, in conjunctione cum decima dorfi vertebra

tebra articulationem veluti format  $\alpha$ . et deorsum ad conjunctionem cum duodecima dorsi vertebra uncatum processum  $\beta$  habet.

- c. Eminentia sinistra inter decimam et undecimam vertebra.
- d. Exostosis amplior a duodecima ad undecimam vertebra producta.
- e. Officulum subrotundum, non nihil eminens, inter tertiam et quartam lumborum vertebra infixum.
- f. Exostosis lata ex margine inferiori quartae vertebrae lumborum sinistrorsum ad quintam descendens.
- \* Processus transversus tertiae lumborum vertebrae tantum delineatus est, reliqui enim, quod ob siccitatem ossis destructi erant, in icone adumbrari non potuerunt.



## CONTENTA IN HAC PARTE.

- I. Tractatio de morbose lymphae ad colatoria organa conversione. pag. 579
- II. Commentatio de natura variolarum earundemque noxis propter insitionem metuendis. pag. 610
- III. De Belladonnae viribus et efficacia in epilepsia habituali tentamen Auct. Cl. GREDING. pag. 637
- IV. Tractatio de doloribus ad spinam dorsi. pag. 711









# INDEX.

## A.

**A**bdominalium viscerum situs praeternaturalis. 182. eius causa. 183. abdominis distensionis causae variae et incommoda. 735 seq.

Abortus ut signum in morbo acuto epidemico. 42. in femina, variolis laborante, observatus. 496

Abscessuum post variolas oriundorum causa et curatio. 498. ad spinam dorsi causa et effectus. 739

Aceti usus in febre putrida. 67

Acida acrimonia, vid. *Acrimonia*.

Acidorum usus et abusus in febre putrida. 67 seq.

Acrimonia acida in humoribus infantum. 619. eius a natura evolutio et expulsio in variolis. 621 seq.

Aeris vicissitudines ut causa morborum epidemicorum. 199 seqq. 206. quatenus a medico observandae. 200. elastici ingressus noxa in vulneribus pectoris. 520. regimen in eruptione variolarum. 482 seqq.

Alcalina remedia, num ad praeservationem variolarum conferant? 624. in curatione variolarum noxia. ib. vo-

latilia, eorum usus et abusus in febre putrida. 65

Alexipharmacorum usus et abusus in febre putrida. 64

Aloes usus in pertinaciori alvi obstructione. 425

Alvi laxitas extracti Stramonii. 341 seq. et belladonnae effectus. 697. constipatio rarior sub usu belladonnae. ibid.

Amuletorum usus in variolis faucium innoxius. 486

Anatomico-practicae observationes. 135 seqq. 181 seqq. 346. 352 sq.

Anelli, Dominic. inventa, methodus humores effusos ex vulneribus thoracis fugendi emendata. 528

Ani novi causa et formatio. 373

Animalium corporum evolutionis notio. 389 seq.

Anni temporum varietas, eius utilitas. 199. eadem ut causa morborum epidemicorum. 198 sq.

Antepileptici novi remedii praeparatio. 531 seqq.

Anxietas praecordiorum belladonnae effectus. 702

Appetitus ciborum auctus extracti Stramonii effectus. 340. auctus, rarius immi-

B b b 2 nutus



## I N D E X.

nutus belladonnae effectus. 697

Aquae potus nimii noxa. 595. fluviatilis usus in nitore faciei post variolas restituendo. 498

Aquarum mineralium abusus ut causa februm intermittentium. 549

Arteriarum novarum in variolis formatio dubia. 224

Asthmate hypochondriaco laborantis historia et defuncti dissectio. 180 seq.

Atrophiae infantum causae. 591. 598

Auditus gravitas belladonnae effectus. 699

### B.

Balnea, eorum usus et abusus in variolis. 477 sq. num eruptionem variolarum adjuvent. 479. easque ad certa loca derivent? 480

Belladonnae extracti aegris propinandi modus et dosis. 642. eius vires et efficacia in epilepsia habituali. 640 sqq. eius effectus specialiores. 695 seqq. eius usus in epilepticis cum usu extracti stramonii comparatus. 707. in minori dosi exhibendum. 709

Bezoardicorum in febre putrida effectus exiguus. 62

Breuerus, tubuli, ad suctionem vulnerum pectoris apti, inventor. 526 seq.

### C.

Cacochymiae in varioloso morbo effectus. 475

Caecitas temporaria belladonnae effectus. 700. 709

Calculi biliarii 260 in cadavere reperti. 449. renales ut causa dolorum et tensionum ad spinam dorsii. 728 sq. calculosorum levamen dolorum quomodo obtinendum. 729

Calor conclavium nimius ut causa morborum vernalium. 545. caloris et calidi regiminis noxa in infantibus. 598. calores volatici belladonnae effectus. 700

Camphorae usus et effectus in febre putrida. 62 seqq. 69. aceto solutae usus. 67

Capitis obnubilatio et dolor extracti stramonii. 338. et belladonnae effectus. 699

Cardiaci medicamenti notio. 507. differentia. ib. seq. cardiacorum blandiorum usus et abusus in febre putrida. 65

Catarrhalium februm vernalium symptomata et diagnosi. 550. curatio. 560 sq. 565 seqq.

Chyli in corpore humano sano evolutio. 393

Cicatrices foedae post variolas num pustularum incisione praecaveri possint? 492 seqq.

Ciliorum in variolis conglutinatio et secessus. 502

Coli intestini situs et angustia praeternaturalis. 182. 441 seqq. expansio singularis. 440 morbi et mortis causae. 444 seqq.

Colici

## I N D E X.

Colici dolores ut caussa dolorum ad spinam dorsi. 726

Colli tumores oedematoso erysipelacei vernaes. 555. eorum curatio. 556

Congestiones ferofae vernaes, earum caussae et diagnosis. 561. 563. curatio. 564

Contagiosi morbi quid sint? 205. eorum differentia. ibid. caussae et ortus. 206. eos observandi et curandi modus. 207 seq. morbi specifici acuti, eos observandi ratio. 208. 212

Contagium morborum, an interdum tantum parziale cutaneum? 35 seq. variolarum, eius indoles, communicatio ac evolutio. 242 seqq. cum antherarum pulvere comparatio 257

Convulsiones ut signum in febre acuta putrida. 43 seq.

Cordis rupti exempla. 142 auricula dextra rupta et fissa. 134 eius caussa. 139. de ea epicrisis. 138 seqq.

Corporis humani evolutio quid sit? 390 seq. incrementum. 616 seq. eius natura quomodo a medicis investiganda. 457 seq.

Corporum naturalium evolutio. 390

Cosmeticorum usus et abusus post variolas. 498

Croup, infantum morbus. 588

Cupri virginis et sulphuris praeparatio. 531. eius effectus in epilepsia habituali. 530. 542

Cuticulae divortium a cu-

te ut facile asseritur. 241. idem ut difficile 256

Cutis et cuticulae fabrica, incrementum ac evolutio. 221 renovatio in variolis negatur. 240. affirmatur. 254. renovatio an etiam aliis exanthematicis morbis tribui possit? 241. 255. eius nitorem post variolas restituendi remedia. 497 seq. cutaneorum in variolis vasorum incrementum et augmentum dubium. 223 seqq. 237

### D.

Deglutitio difficilis belladonnae effectus 698 seq.

Diabetes vera, quid sit. 602 lymphatica, eius caussae, noxa et curatio. 595 sq.

Diaetae ratio in morbis epidemicis. 46 sqq.

Diaphoreticorum usus et abusus in febre acuta putrida. 56 seqq. vernalium prophylacticorum noxa. 548

Diarrhoea stramonii. 342. et levis belladonnae effectus. 697. ut signum in morbis acutis. 39. lymphatica eius ratio et curatio. 590 sq. spontanea biliosa morbis epidemicis vernalibus accedens. 558

Dolores et tensiones ad spinam dorsi, de iis tractatio. 711 sqq. num a nexu nervorum universali? 721. symptomatici, eorumque diversa nomina. 724 sqq. caussae. 726 in gravidis et puerperis. 727 in calculosis. 728. ut febrile



## I N D E X.

symptoma. 729. idiopathici, eorum species et causae. 732 a tensionibus flatulentis. 735 ligamentosis. 738 seqq. a stasi humorum in musculis. 743 seqq. curatio per extensionem spinae. 743 seqq.

Dorsi spina, vid. *Spina*.

E.

Emplastrorum noxa in variolis faucium et tumore colli. 487

Empyematis operationis modus ac utilitas. 521. de ea monita. 522

Enteroepiplocele, de ea monita. 358 sq.

Epidemici morbi, eorum differentia. 195. 197 seqq. 205 eos observandi ratio. 202. specifici acuti, eorum ratio. 208 212 seqq. acuti putridi a. 1757 et 1758 Lipsiae grassantes. 21 seqq. vernales, de iis observationes singulares. 543. eorum causae. 544 seqq. curatio. 565 seqq.

Epilepsia, extracti hyoscyami. 88 seqq. et extracti stramonii effectus. 277 seqq. habitualis, in ea sulphuris venerei. 535 seqq. et belladonnae observationes et experimenta. 637. 643 seqq. et paroxysmorum singulares mutationes. 705 seqq. in ea belladonnae et extracti stramonii effectuum comparatio. 707 seqq. ea de mortui dissectio. 346

Epileptico maniaco, in iis extracti hyoscyami. 102 seqq. extracti stramonii. 311 seqq.

et belladonnae effectus. 654 sq. 663 seqq. epileptico maniacae defunctae sectio. 111 seqq.

Erysipelacei tumores vernales. 551 seqq.

Eunuchi, cur ut plurimum obesi? 582

Evolutio animalis, eius idea et notio. 389. corporis humani quid sit. 390. humorum in variolis, eius ratio. 615

Evolutiones in sano corpore humano universales. 393 seqq. earum genera. 396. distinctio in sanas et morbosas. 397. corporis humani mixtae. 397. morbosae, eas diiudicandi ratio. 398. partium solidarum. 402

Exanthemata cum febre non sunt vera crisis, sed metastatica. 235. ut signum in morbis acutis. 40. varia morbis vernalibus accedentia. 551 seqq. in epilepsiae curatione observata. 685. eadem varia num effectus belladonnae? 685. 703

Exanthematicos epidemicos morbos observandi ratio. 212 seqq.

Exostoses ad spinam dorsi. 740 seqq. icones declaratae. 752

F.

Faciei pallor effectus belladonnae. 700. rubor effectus eiusdem. 701

Faeces argillaceae inertiae bilis signum. 412

Febrilium motuum seu evolutionum morbosarum diiudicatio. 398. dolorum et tensionum

# I N D E X.

tionum ad spinam dorsi caus-  
sae. 730

Febris ut signum in morbo  
acuto epidemico. 42. de eius  
moderamine in morbis ver-  
nalibus monita. 570. conti-  
nua putrida petechialis Lipsiae  
1757 et 1758 observata. 215 seqq.  
34 seqq. lenta, eius causa. 600  
quartana, variolis durantibus  
evanescens, revertitur. 475

Febrium benignarum ma-  
lignarumque quoad evolutio-  
nes corporis humani sanas et  
morbosas ratio. 399. catar-  
rhalium vernalium sympto-  
mata et curatio. 550 seqq.  
oedematoso erysipelacearum  
vernalium observationes. 551

Fellis taurini usus in alvi  
obstructione pertinaciori. 411  
seq. 415. 423

Flatulentia causa dolorum  
ad spinam dorsi. 735. cura-  
tio. 746

Fomentationum usus et ab-  
usus in variolis. 477. 480. 488

Frictionis abdominis usus.  
746 seq.

Frigoris variarum partium  
sensus, effectus belladonnae.  
700

Fructus horaei artificiales  
cum variolis artificialibus  
comparati. 629 seq.

Fuliginis splendentis usus in  
doloribus ad spinam dorsi. 751

Furunculorum post vario-  
las causa et curatio. 498 seq.

## G.

Gargarismatum usus et ab-  
usus in variolis. 487

Glandularum morbi, cur  
hodie frequentiores? 571. fol-  
liculofarum in faucibus et  
pulmonibus usus. 586

Glutinosi adscititii sponta-  
nei notio et ortus. 600

Gonorrhoea benigna, num  
in ea simul lymphae nutritiae  
dispendium fiat? 583. eius ef-  
fectus morbosus. 584

Gravidarum dolores et ten-  
siones ad spinam dorsi. 727  
731. vomitus causae. 358

## H.

Haemoptoicorum varia cor-  
poris constitutio et inde pen-  
dens progressus morbi. 157 seq.

Haemoptysis in morbo acu-  
to epidemico. 42. eius causae.  
146. 151. 167. quando in ea  
venaesectio? 151. habitualis  
curatio. 152

Haemorrhagiae, earum  
causae easque sistendi modi.  
165 seqq. narium vid. *Nares*.

Haemorrhoidalium vaso-  
rum turgescientium incisio. 177

Haemorrhoides, earum dif-  
ficilis conditio ac prognosis.  
178. ut causa dolorum ad  
spinam dorsi. 726. mucosae  
lymphaticae. 591

Herniae, de iis animadver-  
siones. 354 seqq. ut causae  
diverticulorum intestinalium.  
373. signa diagnostica cur in-  
certa? 380. curatio. 381. cru-  
rales cur in feminis crebrius  
reperiantur inguinalibus? 360  
cruales aliis morbis superve-  
nientes. 433. 444. 448. cru-  
rales, eas disquirendi difficul-



## I N D E X.

tas. 348. inguinalis cum crurali complicatae observatio. 348 seq. inguinalis ex processu intestini ilei observatio. 375

Hernioforum vomitus causae. 355 seq.

Herniotomiae administratio in hernia crurali dubia. 357 seq.

Hiemis vicissitudines ut causa morborum vernalium. 544 seq.

Hirudinum usus in haemorrhoidibus. 177

Hominis evolutio cum fructificatione plantarum comparata. 248 seq.

Humorum secretionis ratio et diversitas. 581. in corpore humano sano evolutiones. 393 seq. in corpore infantili conditio ac evolutio. 616 seq.

Hyoscyami extracti vires et effectus in melancholico maniacis et epilepticis. 73 seqq. effectus specialiores. 112 seqq. usus dubius in vertiginosis. 114 in haemoptoicis. 117

Hypochondriacis superveniens haemoptoe quatenus venae sectione curanda. 159 seq.

### I.

Icterus febribus catarrhalibus epidemicis vernalibus accedens. 559 seq.

Ilei intestini conditio in hernia inguinali cum crurali complicata sectione cadaveris disquisita. 353 seq.

Infantium morborum causae. 233 seq. ad acrimoniam

acidam dispositio. 619. humorum et sanguinis natura viscida. 616. atrophiae causae. 591. sudoris colliquativi causae et noxa. 598. tussis catarrhalis a conversione lymphae morbofa ad pulmones. 587 seq.

Inflammationis vera ratio. 187. venosae ratio. 178

Inguinales tumores ex metastasi materiae catharrofae. 556 seq. herniae vid. *Herniae*.

Inoculatio variolarum, super ea responsum facultatis medicae Lipsiensis. 119 seqq. de eius usu dubia. 627 seqq. contra eam et pro ea argumenta. 123 seqq. eius administratio. 132 seq. eadem ut causa progeniei vitiosioris. 632 seq. eius noxa in sanguinem et partes solidas. 631 seqq. cur frustra saepe instituitur. 636

Insectorum morsus exanthematum morbosorum in plantis causa. 218. 247

Intestinorum affectiones variae extracti stramonii effectus 341. inflammatio venosa in cadavere observata. 183 seqq. tunicarum fabrica et actio 363 tunicarum extensio ab affluxu sanguinis. 364. motus peristaltici ratio. 365. crassorum differentia a tenuibus. 366. extensiones et angustiae cur in crassis saepius eveniant, quam in tenuibus. 366. tenuium processus seu diverticula. 369 seqq. eorum causae. 376. in quo potissimum loco intestini orian-

## I N D E X.

orientur. 371 seq. num in prima intestinorum delineatione existant, vel ex causis morbosae orientur? 373 seqq. eorum delineatio in foetu asseritur. 378. iidem ut causa herniae. 375. signa diagnostica et cura. 381. processus quomodo in colo orientur. 367. distensio in coeco quomodo fiat eiusque diversitas. 368 seq.

Ipecacuanhae usus in febre acuta putrida. 54. cum rhabbaro mixtae usus. 56

### L.

Lac, eius secretio et usus. 584 seq. lymphae nutritia abundat. 580

Languoris universalis causae et symptomata. 604

Laxantium usus in febre acuta putrida. 55.

Ligamentorum ad firmitatem spinæ dorsi facientium ratio et usus. 715 seq. eorum tensiones. 738 seq.

Ludwigia, Sophia Regina, de eius morbo et morte commentatio. 407 seqq. morbi causae praedisponentes. 408 symptomata et curationis methodus. 413 seqq. mors 436 cadaveris dissectio. 439 seqq.

Lumbago, num ad symptomaticos dorsi dolores referenda? 724. febrilis, eius causae. 730

Lymphæ nutritiæ ratio. 225 seq. ortus, circulatio, ac usus. 579. 581. eius in cor-

pore humano sano natura, evolutio et usus. 395. evolutiones morbosae. 400. eadem in statu sano ad singularia tantum colatoria dimittitur. 580 conversio in lac mammarum. 580. 584. ad sperma virile. 582. ad colatoria organa, de ea tractatio. 579 seqq. ad mucic colatoria in glandulis folliculosis. 586. ad pulmones. 587. ad nares. 588. ad fauces, vias salivales et ventriculum. 589. ad intestina. 590 in salivam. 592. ad renes et urinam. 595. ad cutim in sudore colliquativo. 598. ad abscessus et ulcera. 599. conversionis morbosae ad colatoria organa causae a vitio dietæ. 603. a morborum perversa medendi ratione. 605 prognosis. 607. curationis monita. ib. seqq.

### M.

Maniaci, in iis extracti hyoscyami effectus. 79 seqq. maniaci epileptici, in iis extracti stramonii. 311 seqq. et belladonnae observationes. 663 seqq. maniaci melancholici, de iis extracti stramonii observationes. 260 seqq.

Masticatoriorum remedium abusus. 594

Medicamenta topica, de eorum usu in variolis diff. 473 seqq.

Medicorum dieta in morbis epidemicis. 48. dissensus, de eo in commodum artis sa-



## I N D E X.

lutaris convertendo oratio. 452 seqq. practicum diffusio quomodo in salutem aegrorum et artis convertendus. 466 seqq.

Medullae spinalis nervorum nexus, directiones, plexus et usus. 721 seq.

Melancholico maniaci, de iis extracti hyoscyami. 73 seqq. et extracti stramonii observationes. 260 seqq.

Menstruorum fluxus usu extracti stramonii restitutus et copiosior. 342

Mercurialis salivatio in lue venerea caute instituenda. 592 seq.

Mercurii vivi usus in pertinaciori alvi obstructione. 421 447. ex eius connubio cum cupro paratur sulphur cupri. 531

Mesenterium, in eo inflammatio venosa observata. 183

Morbi, eos ad evolutiones corporis humani sani observandi ratio. 397 seqq. epidemici vernaes, de iis observationes singulares. 543. 550 curatio. 565 seqq. epidemici annis 1757 et 1758 Lipsiae grassantes. 21 seqq. eorum causae. 30 seqq. diagnosi et prognosis. 34 seqq. prophylaxis et curatio. 46 seqq. putridi, de iis meletemata. 189 382

Mors naturalis eius causa. 618. subita a cordis auricula rupta. 134. huius causae diiudicatio. 138 seqq.

Muci faucium et pulmonum secretio, usus et differentia. 586

Musculorum spinæ dorsæ valor et actio. 717. 743. luxatio. 746. in iis stasis humorum. 743. ferrati postici superioris et inferioris usus et actio. 719 seq.

Musti fermentatio cum inoculatione variolarum comparata. 628

### N.

Narium haemorrhagia critica, eius usus in febribus continuis et variolis. 231 seq. muci cum lymphâ nutritia remixti excretio nimia. 589

Nervei fluidi elaboratio, evolutio ac usus. 395. evolutiones morbosae. 401 seq.

Nervi medullæ spinalis, eorum directiones, plexus et usus. 721 seq. intercostalis ratio et nexus cum nervis medullæ spinalis. 722 seq.

Nicotianæ herbae fumi abusus. 594

Notialgia, morbi species. 725

Nutrienti assumpti evolutio in corpore humano sano. 393. largioris noxa in desquamatione variolarum. 495

Nutritii succi, hominis incrementum et vasculorum augmentum efficientis, ratio. 225 seqq.

### O.

Oculi, eos in variolis a labe praeservandi remediorum diiudi-

## I N D E X.

diudicatio. 484. de eorum cura in exsiccatione variolarum monita. 501. eorum hebetudo aliaque affectiones extracti stramonii. 336. et belladonnae effectus. 699

Oedemata vernalia. 555  
557

Oleoform medicamentorum usus in frictionibus abdominalibus. 747

Omentum in sacco hernioso callosum. 350. 354. eius situs et ratio in herniosa defuncta observatus. 352. eius tensiones ut causa vomitus in herniosis. 355

Opii vis cardiaca, de ea disquisitio. 504 seqq. effectus in successiva operatione animadvertendi. 511. 513. eo Turcae liberius utuntur. 506. vis cardiaca et febrim excitans. 505. 510. non absolute cardiaca sed magis debilitans. 511 seqq. vis aphrodisiaca. 513 usus in pertinaciori alvi obstructione et spasmo. 430. de eius usu monita. 515 seq.

Oris amarities effectus belladonnae. 697. siccitas eiusdem effectus. 698

Ossium evolutio sana et morbosa. 403 seq. emollitio et morbosus status ab insitione variolarum metuentus. 633

Osteosteatomatum ortus. 739

Ovuli humani vesiculae cum vesicula variolosa comparatio, de ea dubia, 226

## P.

Palpebrarum in variolis conglutination. 501

Pandiculationis usus. 748

Paralysis temporaria belladonnae effectus. 703. 709

Pasquallati, Jos. Bened. antepilepticum novum parandi modus. 531 seq.

Pectoris cavitas, ex ea humores noxios educendi ratio. 521. vulneris forfice inflicti observatio. 525. vulnerum suctio, de ea commentatio. 517. vulnerum difficultas et suctionis necessitas. 520. vulnera, in iis empyematis operationis modus et utilitas. 521 ad eorum suctionem instrumenta minus apta. 522. suctioni inserviens instrumentum novum. 527

Pediluviorum usus et abusus in variolis. 477. 480. eas a facie non derivant. 480

Peruviani corticis usus summus in febre contagiosa putrida. 68. usus et abusus in morbis vernalibus. 574

Pestis causa contagium universale aereum non est. 207

Petechiae verae laethales. 28 num diaphoreticis curandae? 57 seq.

Phthiseos prognosis. 163

Pituita vitrea, quid? 600  
602

Plantarum gemmae, flores et succi, de iis observationes. 219. exanthemata morbosa, eorum causa. 218. 247 amararum extractorum usus in



## I N D E X.

in morbis vernalibus. 572  
ex iis vernalibus succorum re-  
center expressorum usus. 573

Pfyllorum mos vulnera su-  
gendi. 518

Puerperarum tensiones ad  
spīnam dorsi eorumque causa.  
727 seq.

Pulmonum dispositio mor-  
bosa et laesio a nimio sangui-  
ne. 146 seq. muci viscidi ni-  
mii ratio, differentia et no-  
xa. 586 seq.

Pupillae oculi dilatatio ef-  
fectus belladonnae. 699 seq.

Purgantium remediorum  
prophylacticorum usus et ab-  
usus in morbis vernalibus.  
547. 565. cet.

Puris resorptio quomodo  
fiat? 490

Purpurae genesis. 566 seq.

Pustulae variolosae, quid?  
623. earum incisio frustra-  
nea. 490

Putredo animalis, de ea  
meletēmata. 189 sqq. 382 sq.

### Q.

Quartana, durantibus va-  
riolis, evanescens, denuo re-  
vertitur. 475

### R.

Resolventium remediorum  
usus et abusus in febre con-  
tagiosa putrida. 66. in mor-  
bis vernalibus. 572 seq.

Resolutionis inflammato-  
riae a putrida differentia. 51

Rhachialgia, morbi spe-  
cies. 724

Rheumatici dolores effe-  
ctus belladonnae. 703

Rheumatismi vernaes. 561  
seqq.

Rubiae tinctorum usus. 751

### S.

Salivatio effectus belladon-  
nae. 698. eius in variolosis  
ratio. 488. lymphatica in sa-  
livatione. 592

Salium mediorum usus et  
abusus in morbis vernalibus.  
572

Sanguinis in corpore in-  
fantili ratio. 616 seq. in cor-  
pore animali usus ac muta-  
tiones variae. 579. evolutio-  
nes in corpore humano sa-  
no. 393. et aegro. 398. in  
pulmonibus copiosius collecti  
causae et curatio. 146. in-  
flamatorii et putridi diffe-  
rentia et similitudo. 186. in-  
flammatoria dispositio effe-  
ctus belladonnae dubius. 704  
stasis in venis, inflammatio-  
nem mentiens. 178

Scabies epilepsiae habitua-  
li. 652. maniae accedens. 667  
effectus belladonnae dubius.  
703. variolis durantibus dis-  
parens, iis superatis, reverti-  
tur. 475

Secretionis humorum ratio  
et diversitas. 581

Sinapismorum in febre pu-  
trida effectus exiguus. 60

Singultus effectus stramo-  
nii. 343

Siphonum usus ad educen-  
dos ex vulneribus pectoris  
effu-

# I N D E X.

effusos humores cur minus aptus? 528

Sitis stramonii. 339. et belladonnae effectus. 698

Solidorum corporis humani debilitas ut causa et effectus putredinis vitae. 383 evolutiones sanae et morbosae easque observandi ratio. 402

Somnus, eius vis cardiaca. 509. effectus hyoscyami. 113 stramonii. 336. et belladonnae. 695

Spasmus ut signum in febre acuta epidemica putrida. 43 seq. fixus Paracelsi. 725. spasmus ad spinam dorsi num a nexu nervorum universali? 721 seqq. symptomatice eorumque diversae causae. 726

Sperma virile lymphae nutritia abundat. 580 seqq.

Spinae dorsi mechanismus. 712 seqq. de eius spasmis et doloribus tractatio. 711 seqq. exostoses. 740

Spirituosorum remediorum usus et abusus in morbis vernalibus. 573

Sputatio lymphatica, eius causa et curatio. 589

Stramonii extracti vires et efficacia in melancholia et mania. 259 seqq. effectus specialiores. 336. in corpus humanum actio. 344 seq. usus in epilepsia. 277

Sudationum prophylacticarum usus et abusus. 548. 597

Sudorifera remedia, vid. *Diaphoretica*.

Sudor ut signum in morbis acutis. 39. belladonnae, 697. hyoscyami. 112. stramonii effectus. 342. eius in eruptione variolarum differentia. 482. nocturni diu durantis causae et noxa. 598 colliquativi infantum. ib. et adultorum causae et noxa. 599

Suffocatio stridula, infantum morbus. 588

Sulphur venereum seu cupri praeparandi modus. 531 cum eo experimenta in cane instituta. 533. eius in epilepsia habituali effectus. 535 seqq.

Suppurationis nimiae noxa. 489. 599

## T.

Tabaci fumi abusus. 594

Tabidorum diarrhoea lymphatica. 591

Tempestatum vicissitudines ut causa morborum epidemicorum. 198 seqq. quatenus a medico observandae. 200

Thoracis vulnera, vid. *Pectus*.

Tormina ventris belladonnae effectus. 698

Tubuli ad suctionem vulnerum pectoris apti inventio et delineatio. 527. 529

Tumores erysipelacei et oedematosi vernaes. 551 seqq. polyposi ventriculi cum vomitu cruento excreti. 173 seqq.

Turcae



## I N D E X.

Turcae opio ante praelium utuntur. 506. ab eo languidam venerem experiuntur. 513

Tussis infantum convulsivae causa et curatio. 149 adultiorum quatenus venae-sectione curanda. 150. catarrhalis a nimio muco pulmonum et conversione morboſa lymphae ad pulmones. 587

### V.

Variola, quid sit? 487

Variolae, earum inoculatio, vid. *Inoculatio*. Non sunt vitalium actionum, sed morbi potius effectus. 233 iisdem cur plurimi homines afficiantur. 244. de earum natura et noxis propter infectionem metuendis commentatio. 610 seqq. de iis positiones practicae. 474. sub earum decursu silent alii morbi praegressi et revertuntur. 475. iis non commode morbi nomen datur. 611 seq. de iis observationes et experientiae. 230. 614 seq. num per eas naturalis quaedam corpori contingat depuratio? 615 seqq. non sunt vera crisis, sed metastatica. 235. an ne potius eradicandae, quam infectione propagandae sint? 635. earum cum gemmis et floribus plantarum. 278 seq. cum antherarum pulvere comparatio. 257. 278 seq. contagiosae indolis communi-

catio et evolutio. 242 seqq. contagium iis producendis solum non sufficit. 257. earum miasma quatenus benignum aut malignum. 252 seq. miasmatis indoles halituosa cum fermento comparata. 625 sq. num sint acidae viscidaeque indolis? 622. senum rariores sed difficiliores. 242. in iis ad cacochymias corporum accedentes bene attendendum. 475. cur in facie ut plurimum copiosiores? 480 seq. in iis regimen quoad aerem externum. 482. an eruptio liberiori aere adiuvetur? 483. in iis applicandorum balneorum usus et abusus. 477 seqq. benignae, earum humor optimus num sit purulentus? 227 252. symptomata in stadio primo num in alias causas coniicienda sint, quam in variolas? 233. earum ceu abscessuum maturatio num externis remediis in suppuratione adjuvanda? 487 seqq. eas in faucibus praeservandi et topicis remediis curandi ratio ut noxia iudicata. 486. earum materies insita cur variolas producat? 625. num variolarum incisione puris resorptio praecaveatur? 490 sq. cicatrices foedae impediuntur. 492. sub earum crustis num nova vasa formentur, negatur. 237. affirmatur. 254. de earum desquamatione observata. 237. 493. in crustarum secessu remediorum diiudi-

# I N D E X.

iudicatio. 494 seqq. cutis nitorem adiuvantia remedia. 497. earum vestigia in fetu quinquemestri. 496. variolae vesiculae cum vesicula ovulum humanum sistente comparatio, de ea dubia. 226 variolosi odoris ratio et comparatio. 235. 254. succi influxus cum succo plantarum comparatus. 249 sanguinis et miasmatis mutatio a haemorrhagia narium critica. 231 sqq.

Vasorum in integumentis distributio et evolutio. 221. incrementum. 223. novorum formatio. 251. in variolis dubia. 224. 237. eadem affirmata. 251

Venaesectionis usus et abusus in febre acuta putrida. 50. in haemorrhagiis. 165. in haemoptoicis. 145. 151. in vomitu cruento 165. 169. in tussi pulmonicorum. 147. in spasimis. 148. in tussi infantum convulsiva. 150. prophylacticae usus in pulmonicis. 161. venaesectionum prophylacticarum vernalium usus et abusus. 569. citius institutarum noxa. 547 seq.

Venarum infarctus, inflammationem mentiens. 178. 183

Venenatorum vulnerum fectio et curatio. 518

Venereae luis difficilis curatio. 592

Veneris nimiae et imaturae noxa. 582

Ventriculi tunica nervoso vasculosa a sanguinis affluxu

extenditur, et callosa redditur. 173. 364. tumores tunicati cum vomitu cruento excreti. 173

Ver, eius vicissitudines ut causa morborum vernalium. 544. de his observationes. 543. 550. eorum causae. 544. curatio. 565. vernalium curationum prophylacticarum abusus ut causa morborum. 549

Vertigo hyoscyami. 114. et belladonnae effectus. 699

Vesicatoriorum usus et abusus in febre putrida. 59. sqq.

Vestitus feminarum ut causa morborum vernalium. 546

Victus hiemalis ut causa morborum vernalium. 546 seq.

Vini vis cardiaca et narcotica. 510. usus analepticus in febre putrida. 65

Viscidum adscititium, vid. *Glutinofum*.

Vitrioli cyprii connubium cum mercurio et usus antepilepticus. 531

Vomitoriorum usus in febribus intermittentibus vernalibus. 568. usus et abusus in febre putrida. 54

Vomitum causae in genere. 355. in gravidis. 358. in herniosis. 355. effectus stramonii. 340. et belladonnae. 698. cruenti causae. 167. ope venaesectionis curatio. 165. 168 sqq. cum tumoribus polyposis excretis coniuncti casus et curatio. 173. 176

Vrina



# INDEX.

Vrina ut signum in febre  
putrida. 40. eius se et ex-  
cretionis utilitas. 594. ni-  
miae et lymphaticae noxa.  
595. largior excretio stramonii.  
342. et belladonnae effectus. 606

Vulnera, eorum differen-      Waldheimensis ptochotro-  
tia et coalitio. 517. spon-      pheci situs, et ratio. 637 sqq.

EMENDANDA.

pag. 9. lin. 2. victu lege victui.

- 34. lin. 10. acrimoniam — natam et auctam lege acrimonia nata et aucta.
- 47. lin. 10. verocitas l. voracitas.
- 80. lin. 4. copiosam l. copiosum.
- 89. lin. 12. foedor l. foetor.
- 90. lin. 17. hebdomatibus l. hebdomadibus.
- 99. lin. 5. percepta l. percipiens.
- 142. lin. 11. conglutatum l. coagulatum.
- 155. lin. 23. purulent l. purulenti.
- 159. lin. 23. haemoptes l. haemoptoes.
- 161. lin. 16. experiuntur l. experiantur.
- 173. lin. 15. hydatites l. hydatides.
- 181. lin. 2. tantum l. tantam.
- 185. lin. 13. alia l. aliae.
- 209. lin. 9. solidorum et fluidorum l. solidarum et fluidarum.  
lin. 22. fluidorum l. fluidarum.
- 217. lin. 19. singulos l. singulas.
- 313. lin. 13. augusto l. augusto.
- 338. lin. 3. derivanda l. derivandae.
- 344. lin. 16. suppressio l. suppressionem.  
lin. 23. deducenda l. deducendam.
- 387. lin. 10. indiganda l. indaganda.
- 392. lin. 9. animadvertionibus l. animadvertionibus.
- 414. lin. ult. promeridiana l. pomeridiana.
- 416. lin. 23. ipsa l. ipsi.
- 438. lin. 10. ipsae l. ipsi.
- 445. lin. 12. ductum l. ductam.
- 452. lin. penult. viritutis l. virtutis.
- 453. lin. 5. fumman l. funnum.
- 454. lin. 20. eorum l. earum.
- 487. lin. 12. Quod sic l. Quod si.
- 514. lin. 12. aliquos l. aliquas.
- 533. lin. 13. Aqua — tritum lege aqua — trito.
- 583. lin. 12. gonorrhaea l. gonorrhoea.
- 617. lin. 15. ritae l. rite.
- 728. lin. 6. lactei l. lacteos.

